

Zeitschrift: Annalas da la Societad Retorumantscha

Herausgeber: Societad Retorumantscha

Band: 6 (1891)

Artikel: Probitad porta felicitad

Autor: Bühler, J. A.

DOI: <https://doi.org/10.5169/seals-178723>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>



Probitad porta felicitat.

(Da J. A. Bühler.)

I.

Nos magnific Grischun conten üna quantitat dellas plü bellas valladas e contradas in sias muntagnaš gigantas; e non eis üna dellas ultimas de medemas la fructifera declivitat al grand Curvèr, la quala s' extenda da Salogf fin a Motta. Questa bella contrada, volta vers il solegl naschent, compiglia principalmein il territori dellas duas piçnas vischnauncas de Mon e Stierva. Al pei de questa pitoresca plaunca ramuran la Giulia e l'Albula, quals dus flumins s' unischan a Casti e continueschan allura in rapida cursa lur via sut il nom dell' Albula vers il Rhein, passand las terriblas speluncas e cavorgias dellas Myras. Questas duas piçnas comunitads gia nomnadas, be circa üna buna mezz' ura distantas üna dall' autra, sun circumdadas, in lur prima vicinanza, da bels èrs e stupenda prada e da bellas acclas cun lur edificis necessaris; ün pau plü ault se recattan blers e bels primarans e pasculs, e süsom, nella regiun alpina, se derasan ils pasculs alpins et alps fin ad üna altezza da circa 8000 peis. Stand sün il fil de questa bella muntagna, ün gauda ün magnific prospect della bella vallada de Schons.

Er diversas parcellas de selva sun sparsas qua e là sün quest territori, protegend las diversas culturas dals vents e promoyend la fertilitad della contrada. Nels bein cultivai èrs creschan

stupends ördis e segals; bels conivs (chanfs, covens) e camps de glin orneschan er la cultura de quellas vischnauncas è comprovañ, che las massèras da Mon e Stierva conoschan, tgei fa da bisögn nella casas dels contadins, frant che in bleras otras communitads del Grischun la cultivaziun de coniv e glin eis u negligida, u quasi tralaschada del tot, perquei che las femnas cattan per plü comodeivel da comprar lustrign ester da mangola. Aschia ils humens ston in blers locs er filar e teisser — cun moneida, frant che lur mugliers e figlias s' occupeschán ils longs invierns cun tramagls.

Cumbein che ils contadins de questa contrada capischan fitg bein la necessitat da cultivar totas las plü necessarias qualitads da früts de campagna per se far, tant seo possibel eis, independents dad otras contradas e dal exterior, els non imblidan dad er prestar lur plü granda attenziun al allevament de muvel e stan in quest rapport a pèr als contadins dellas valladas limítrofas, il che comprova che els non han il giudici nels calcagns. Il muvel ha da furnir üna substanziala part del nutriment et er la moneida per comprar bleras caussas necessarias, las qualas il contadin non sa sez producir. Tras üna giudiciusa öconomia la beinstanza de questa contrada eis üna generala, cumbein che ün non po snegar, che ils ultims decennis han er qua tras lur extravaganta temperatura et auras lunaticas periclicau il beinstar de blers.

Ils habitants de questas communitads appartegnan alla vera razza rhaeto-romana e discurran ün sonor dialect da nos romansch che se distingua favoreivlamein tras forza e harmonia. Da corp els sun grands e ferms, vers exemplars d' üna generaziun alpina. Els s' occupeschán quasi exclusivamein cun l' agricultura e cun l' allevament de muvel, sun però er amaturs della caçia e han blers buns caçiadurs cun bun ögl e següra nerva. Nella cultura els marschan precautamein cun ils auters Grischuns e se distinguan er tras ün senn religius, tras probitad, diligenza e constanza e specialmein er tras ün senn öconom. Per l' emigraziun in terras estras, u zun in terras ultramarinas ha questa populaziun pauc gust, e da rar ün banduna sia amada vischnaunca per cercar sia fortuna in terras esteras. Quei sarà er il motiv, pertgei ils vegls costums de questas vischnauncas se han mantenii fin al temps present.

A mezza via tranter Mon e Stierva se recatta ün piçen acclaun, appartenend a Mon, il qual porta il nom Sanagn. Al

principi del 17 seculs haveva quest acclaun treis casas et intgüns clavaus. Üna de quellas casas apparteneva a Peder Caleira, il qual haveva maridau anno 1592 la propera giuvna Gnagna, nata Giloin, oriunda da Dèal. Peder Caleira non era ün hum rich, possedeva però tant, che el poteva alimentar sia numerusa familia senza la laschar patir; ma el stoveva esser activ dall' alva fin alla sera tard, sche el voleva poder subsister cun honur. Sia muglier Gnagna gli assisteva in totas lavurs cun grand zeli e pisserava dasperas per la numerusa familia in tots rapports cun exemplara diligenza. Ella regulava e terschenava ses infants cun la plü granda pazienzia et ils instruiva er in fatgs de reli-giun; ella als mussava er da bein e gentilmein se deportar e d' amar la propertad. Ils infants prosperavan fitg bein, cum-bein che lur vivanda era da totafatg simpla e frugala. Anno 1606 havevan ils dus conjugals gia 8 infants, 5 figls e 3 figlias. Ils dus prims infants eran dus frescs mats tgi savevan gia sustener ils geniturs in totas lavurs campestras. Il terz figl tgi haveva a peina passentau siu 10avel ann, fageva gia il cavrèr a Mon. Peder Caleira vezeva cun plascher, che ses infants havevan tanta premura da sustener tenor lur forzas la familia, et el calculava gia, co el tras il bun agüt de ses infants savessi cun il temps ingrandir siu funds. Üna sera Peder schet a sia muglier: „Mia cara Gnagna, nos Tgetg (Francesc) e l' Albert se sviluppeschan excellentamein e nus sun gia ün grand agüt; els sun tots dus fitg diligents e capischàn er fitg bein totas lavurs che els han da far. Ma er ils auters infants creschan e prenderan ün bun exemplel da lur fradegliuns plü vegls. Ma quala lavur volein nus allura dar in 3 fin 4 anns a tots noss infants tgi seran allura habels da lavurar? Quella caussa mit dat bler da pensar, e naschet tandem in mei l' idea, che nus dovessen far imprender noss dus prims mats ün mastregn. Tgei dis tü, cara Gnagna, de quei?“

Alla buna muglier s' implenittan ils ögls cun larmas, durant che siu hum tenet quest discurs. Ella respundet allura vezibla-mein attristada: „Car Peder, tü has tota raschun da voler pis-serar in questa maniera per noss infants; er jeu hai gia bleras gadas pensau de quella caussa, ma jeu sto confessar che jeu sentit semper ün grand cordöli, cur mi vegnit indament, che arrivi ün di il moment da stover laschar bandunar ün u l' auter de noss infants la casa paterna in üna amò aschi tenera etad.

Ma il nus resterà nagut auter da far, che da far imprender noss infants qualunque mastregn per als saver segürar lur futura existenza. Ma jeu hai pensau aunc d' üna autra caussa, lá quala nus podessen forsa er trer in consideraziun. Tü sas che las minieras d' aur al Piz coçen dan bler guadagn als vischins dà Lansch. Il transport dellas mineralias auriferas dat bler occupaziun, e sche jeu non me sbaglia, ün adovra er blers mats giuvens per carradurs. Tgi sa, sche nos Tgetg e l' Albert non cattassen tala lavur tras nos parent a Lansch, il qual er s' occupescha cun caussas dellas minieras. Cur noss figls fussen allura ün pau plü grands, els cattassen forsa lavur nellas minieras, e la lavur in medemas sei er fitg lucrativa, sco ün discurra qua e là. Ün giuven da Lansch tgi ha a peina 20 anns, hagi già guadagnau l' ann passau passa 200 renschs e mantegni facilmein cun sia paga la mamma e çinc auters fradegliuns plü piçens. Havessen er noss figls tala fortuna, sche arrivassen nus plü spert e plü facilmein alla amegliuraziun de nossa presenta situaziun. Tü podesses totüna ir üna gada a Lansch per t' informar de quella caussa.“

„Ma mia cara Gnagna“, respondet Peder, „tü non stos imblidar, che las lavurs nellas minieras sun fitg grevas e nel medem temps er periculusas, stante che las cavas s'minaçian suvent cun ruina. Gia blers minaturs sun daventai disgraziae in questa maniera, et üna tala sort jeu non voless preparar a noss infants.“

„Quei eis vèr, miu car Peder“, respondet la buna muglier, „ma ün se sto er fidar de Deus; il qual sa pertgürar e proteger ün human in üna miniera, sco el il protegia dalla disgrazia in üna ferma casa. Las bleras de quellas disgrazias succedan per mancanza da precauziun da part dels lavurants sezs. Quantas disgrazias succedan cun ils contadins sün là bella campagna, nella selva et er nels clavaus! Na, miu bun Peder, per la tema de disgrazias jeu non voless impedir noss figls da quels laschar cercar lur fortuna nellas minieras, e sche tü reflectas quella caussa plü madüramein, tü tez catteras, che jeu non hai mala raschun.“

Peder se laschet tandem persvader da sia muglier che il füssi avantagius da saver plazzár ses dus figls a Lansch pro il directur dellas minieras et impromettet dad ir üna gada a Lansch per mirar, sche el savess realisar quest plan che sia buna muglier gli haveva raccomendau. Nel present moment la caussa non

fageva giust prescha, havend el e sia familia da present lavur plü che avunda. El haveva surpriu da terrar (pinar, smerscher) nel „God dels Planets“ l' ariglia per ün clavau che ün vischin da Mon voleva fabricar, e ses dus mats il savevan assister in quella lavur cun sramar las plantas che el haveva terradas. Nel medem temps els savettan far provisjun da lenna per l' inviern proxim cun quella rama che il contadin da Mon gli haveva cedida. El haveva uss er da fenar siu prau a Sanagn sper sia casa; el et ün dels mats segavan, l' auter mat e la mamma inserdavan, voltevyan il fein et eran succureivels da rastellar e portar il fein in clavau. In summa la lavur non mancava da present a Peder Caleira et a sia familia. La mamma haveva er amiò da serclar ils èrs da segal e da regular l' ort avant casa, il qual furniva blers legums alla familia per il long inviern.

A peina che quellas lavurs alla bassa eran finidas, arrivet il temps da fenar nels primarans (colms), e Peder possedeva er ün tal sù Darschapetta. El prendet sia intèra familia cun se e se rendet da s. Lurign zieva mezdi in siu primaran, inua el calculava da star circa duas emdas. Essend l' aurà daventada ün pau pluviusa et inconstanta, il mava be plaunin cun il fenar; ma Peder non restet perquei inactiv; el mava nella selva vicina a far lenna per l' inviern e ne faget üna bella provisjun. Cur el tandem returnet cùn sia familia a Sanagn, el stovet se preparar a meder et a ciunciar sia granezza et allura da far resdiv. Aschia passet il temps, che el a peina accorschet, et avant che el pensi, l' autun era gia arrivau, il qual gli portet novas lavurs.

Durant quest long temps ils dus conjugals havevan suuent discurs da lur Tgetg et Albert e füttan ussa perüna, che Peder dovei ir ün dels proxims dis a Lansch per mirar, sche lur dus figls fussen reçerts in qualitad da carradurs dalla direcziun dellas minieras del Piz coçen. Ils carradurs non havevan dad ir cun lur manadüras fin allas minieras, anzi be fin al ur sut dell' alp da Lansch. Fin là tragevan humens robusts las mineralias sün schliusas. Per manadüras ün haveva quasi be bovs che tragevan a corn. Üna tala manadüra üna confidava er be a mats plü giuvens, essend sün l' intèra via negün pericul. Humens eran be paucs tranter ils carradurs; la granda part de quels eran be mats da 15—16 anns et er intgünas mattas robustas. Perquei havet Peder er speranza che la direcziun dellas minieras accepti ses figls tgi, a proporzium de lur etad, eran fitg grands e fermes.

Peder pigliet dunque curascha e jet ün di a Lansch per mirar, sche ses dus mats cattassen là qualche serveç. Il prim el visitet siu parent, per s' informar ün pau meglier de quella caussa; ma il parent non gli det granda speranza da cattar lavur per ses mats a Lansch, schend che seien gia carradurs avunda per las minieras e che ils minaturs seregiens prest necessitai da far vacanza pervia del inviern che sei avant la porta. Peder però, essend uss a Lansch, non voleva returnar a casa senza almeins far la tentativa da plazzar ses mats in qualunque qualitat. El jet dunque pro il directur dellas minieras e supplichet quel per ün' audienza. Il directur gli concedet l' audienza et il demandet, cun tgei el gli sappi servir. Il pauper Peder revolvet e smugliet sia capella ün moment e non saveva, co el dovesse comenzar sia supplica; tandem però el proferit siu giavüsch da saver plazzar ses dus mats, essend el ün hum cun greva casada tgi hagi bisögn del guadagn de ses infants. El racquintet er al directur, che ses dus figls seien fermes per lur etad e da speras adesters e diligents nella lavur.

„Ma miu bun hum“, schet il directur, „haveis vus allura er ils bovs, sche voss dus figls doveien far ils carradurs?“

A quella demanda Peder stava qua sco impedriu. El non haveva pensau a quella caussa; anzi el credeva, che las minieras possedien sezzas ils carrs et ils bovs e fineschien be ils carradurs. El confesset dunque al directur, che el sei ün hum pauper e non sei in cas da sez saver furnir las manadüras per ses figls, e schend quei al signur, el pensava da s' absentar, vezend che el non poteva haver speranza, che ses figls cattassen qua paun e serveç. Il directur, vezend l' imbrugl nel qual se recattava il bun Peder, gli schet cun vusch amieivla: „Miu bun amitg, nossa so-cietað ha negüns carrs per il transport dellas mineralias; nus pagein als carradurs üna certa diurnada et ils laschein sezs procurar per lur carrs e bovs. Que sera dunque difficil per vus da cattar manadüras per voss mats, sche vus sez non haveis talas. Ma sche voss figls sun giuvens adesters, sco vus sincereis, jeu als savess forsa procurar ün auter serveç. Jeu hai da present bisögn d' ün fresc e svelt giuyen per ün mess; jeu hai suuent da trametter ordras als capos nellas minieras e sto dunque haver ün giuven adattau per quest serveç. Sche ün tal serveç conven ad ün de voss figls, sche mi saveis vus ün dels proxims dis presentar quel tgi vus credeis il plü habel per quest serveç. Sche

il giuven mi plaschà, sche vögl jeu far üna prova cun el. Quei che concerña la paga, jeu gli darà quei che el merita.“

Peder s' absentet, ingraziand al signur directur per sia benevolenza et impromettet da se presentar cun ambas dus ses figls, per che il signur directur sappi cerner quel tgi gli plaschi il meglier. Arrivand cun quella novitad a casa, l' intèra familia s' allegret del success che havet hagiu il bab a Lansch. Ma nel cor della mamma prest se faget sentir üna reacziun, pensand ella da forsa in paucs dis perder ün de ses infants. O, quant tener eis il cor della mamma! Sche blers figls pensassen a quella sancta flamma, els mai l' offendessen cun nauschs deportaments. La mamma però non se voleva opponer alla voluntad del bab, savend che quel vögli be il meglier a ses infants. Ella saveva er, che la familia haveva bisögn d' agüt et era er persvasa, che ses infants seien prompts da portar ün tal, sche als se presenti l' occasiun. Ella faget ussa quei che ella tenet per il plü necessari; ella faget nempe ils proxims dis ün habit nov a ses dus figls per che els se possien presentar al signur directur in decenta vestimenta. Quantas larmas ella spandet durant quella lavur, saveva negün auter che Deus in çel. Ils dus figls però, il Tgetg e l' Albert, podevan a peina aspectar il di de lur presentaziun, cumbein che els dall' autra vart gia sentivan üna certa increchantüna da bandunar casa.

Tandem arrivet il di, cur il bab voleva presentar ses dus figls al directur dellas minieras. Alla mamma currittan las larmas, cur ses dus figls bandunettan la casa paterna; er ils dus mats havevan il cor plein; ma els tenettan çelada lur dolur per non augmentar il cordöli della cara mamma. Arrivai a Lansch, il bab manet il prim ses figls in casa de siu parent per amò discurrer cùn medem, sche el non fussi propens da prender a donsena ün da ses mats, in cas che il signur directur dellas minieras acceptassi ün da quels per siu mess. Il parent se musset prompt d' acceptar il convictur, sche il directur non salvi il giuven in casa sia. Regulada questa façenda, Peder manet ses dus figls in casa del directur e cattet medem a casa. El faget cun üna gada intrar Peder Caleira cùn ses mats in sia stanza. Avant comenzar il discurs cun Peder, il signur consideret ils dus giuvens, e Peder vezet subit, che ses figls havevan fatga üna buna impressiun sün il directur; pertgei quel fageva üna çera sereina e bucca rienta. Allura il signur directur schet a Peder: „Vus mi

presenteis qua voss dus figls, per ils quals vus chercheis occupaziun. Que eis in dretg, ün sto comenzar a bun' ura a far guadagnar il paun ils infants. Se volvend als dus mats, el als schet: „Uss mi schei vus, co vus haveis nom!“ Ils dus' giuvens nomnettan frescamein lur noms, senza però mussar sfrontadezza. Questa ingenuitud dels giuvens plaschet al directur. El discurret amò ün pèr plaids cun ils mats e se volvet allura vers il bab de medems, schend che ils mats gli plaschien e che el sei propens da far üna prova cun il Tgetg. Il signur nomnet allura la paga che el vögli dar al giuven et impromettet er d' amò alzar quellà in curt temps, sche il giuven s' adatteschi bein per siu serveç e fetgi siu dovrè a sia contentezza.

Peder relatet allura al signur, che el hagi già procurau per la donsena a siu figl; el hagi qua a Lansch ün parent, il qual hagi impromess da prender medem in casa sia e da haver pisser per il giuven. Ma il signur directur respundet: „Na, na, vos figl stat in casa mia. La paga che jeu gli hai destinada, sto la societad pagar per il serveç de mess; ma il giuven ha allura aunc peda avunda, da far a mi il servitur in temps de vacanza; e per ils serveçs che el fa a mi, gli dun jeu bugen la donsena, et in qual buna mana non gli dovei mancar, sche el mi serva a mia contentezza. El havrà pro mei er amò occasiun d' imprender inzatgei, sche el vol. Da temps de vacanza el sa visitar la scola cun mes dus infants; sche el imprenda ün pau da leger e quintar, forsa er amò da scriver, que gli darà er negün dann per sia vita futura. In mia familia nus discurrin italian, e vos mat ha aschia er buna occasiun d' imprender questa lingua che non eis difficile ad ün Romansch. Dunque sche vus essas content cun mia offerta, sche sa il mat in treis dis intrar in miu serveç.“

Peder Caleira era contentissim cun l' offerta del signur, ingraziet a medem per sia buntad e benevolenza e bandunet allura la habitaziun del directur. Nel sortir da casa el schet amò a medem, el gli raccomandi er amò siu second figl Albert in cas che s' offerissi üna plazza per quel. Il signur gli impromettet dad er pensar al Albert, sche el catti plü tard ün serveç per quel. Allura il bab bandunet Lansch cun ses dus figls e se rendet per la plü curta via a Sanagn per portar las allegreivlas novas de lur ho-dierna fortuna a sia muglier. Quella s' allegret cun siu mariu della fortuna che lur Tgetg haveva oz cattada. La paga che il signur directur haveva impromessa al giuven, non era giust ün

grand capital; ma ella era totüna bein servida alla familia. Ils buns geniturs non manchettan da far far l' itéra familia üna oraziun per ingraziar a Deus per siu agüt.

Ussa donna Gnagna haveva quels treis dis da far plü che avunda per procurar a siu car Tgetg tot quei che el haveva amò de bisögn; ella faget gia l' auter di bugada per lavar las paucas camischas del figl; ella faget er pezzar ils calzërs e mesürar ün pèr novs; pertgei sche Tgetg haveva mintgamai da far ün viadi fin allas minieras, sche stoveva el esser bein provist cun calzërs. Aunc avant che il terz di spunti, era il piçen fagott del Tgetg fatg, e prest arrivet er l' ura de sia partenza. Quei era ün serius moment per il pauper mat; il cor gli batteva da be mirar sün la mamma e sün ses cars fradegliuns, cun ils quals el semper se haveva bein convegniu. Cumbein che siu viadi non era long et il lög de sia destinaziun na fitg distant della casa paterna, el fageva totüna vess da bandunar casa.

Tandem arrivet il moment de sia partenza; el det il maun a tots ses fradegliuns e bütçet la mamma cun larmas nels ögls. La mamma il strenschet al sein matern, eridand sco ün infant; ella l' accompagnet amò ün grand tot sut Sanagn, e cur il figl la bandunet, ses ögls l' accompagnettan aschi lontan sco ella il podet çerner. Tgetg, havend superada la dolurusa scena del camgiau, jet frescamein inavant, et in circa ün' ura e mezza el arrivet a Lansch e jet directamein in casa de siu patrun, il qual il reçevet cun tota cordialitat e gli faget subit mussar siu dormitori, per che el sappi prender dalla rein siu piçen fagott. Ma a Sanagn la mamma non se podeva acquietar; la necessitat da stover trametter ün de ses infants in üna aschi tenera etad in ün auter lög pro esters, la voleva quasi far rumper il cor, e que duret intgüns dis, fin che ella se haveva ün pau calmada. Gia zieva treis dis ella roget siu mariu da voler ir üna sera a Lansch a mirar, tgei fetgi il car Tgetg e sche quel sei content cun siu serveç e cun il patrun. Ma Peder declaret, che el non hagi peda dad ir a Lansch nel present moment, el hagi memia blera lavur da far e sei la sera memia fatigau per amò da notg far ün viadi da treis fin quatter uras. La buna donna capit fitg bein quei e provet dad in autra maniera reçever novas da siu car figl; ella tramettet nempe ün di in absenza del hum siu second figl Albert cun ün piçen pachet, contenent intgünas bagatellas, a Lansch per tant plü prest reçever novas da siu car figl absent. Albert cattet siu

frar saun e fresc e portet la sera ün cordial salüt dal Tgetg als geniturs cun la remarca, che el stetti fitg bugen in siu serveç, essend il patrun e la patruna fitg buns et amievels cun el e sia donsena excellentissima. Da quellas novas bab e mamma s' allegrettan, e donna Gnagna savet la notg sequenta per la prima gada dormir quietamein.

Ma Tgetg haveva in verdad cattau buns patruns a Lansch. Il signur directur Morin era ün hum tgi non teneva autra schenta be per tgauns, na el era in tots rapports fitg human e benevolent e non marterisava ses servients e lavurants. Perquei Tgetg fuss er bugen sagliu tras ün föc per siu patrun e fageva tot las commissiuns da quel cun la plü granda promptezza e sveltezza. Ün di el accompagnet il patrun allas minieras al Piz coçen. Signur Morin non fageva suvent la via allas minieras, essend quella fitg stentusa et el ün hum memia pesant per ascender muntagnas. Ma cur signur Morin visitava las minieras, ils minaturs parevan da haver festa. A peina che signur Morin arrivet pro las cavas, ils capos dels lavurërs se presentettan gli per il salüdar e dar rapport davart l' avanzament dellas lavurs nellas minas e la conduita dels lavurants. Signur Morin se musset fitg content cun las informaziuns reçertas. El visitet allura amò las cavas per mirar, sche tot sei in bun urden. El returnet allura pro las camannas dels minaturs, las qualas se recattavan ün toc sut las minieras, e prendet là, insembel cun ils capos dellas minas, ün refresc. El als presentet er siu nov mess, il Tgetg Caleira, e det il comand, che ün dovei mintga gada, cur quel arrivi allas minieras cun sias ordras, dar al giuven ün bun refresc a spesas della direcziun. Signur Morin haveva raschun dad esser content cun las prestaziuns dels lavurants. Las minas se musettan da present fitg ubertusas et impromettettan ün grand guadagn, il che faget üna buna luna al signur directur.

Tgetg faget ögls gross, vezend quel di tantas caussas novas, dellas qualas el haveva fin ussa gnanc la minima idea. El era intrau nella cava granda per guardar, tgei ils minaturs fagessen. Fin ussa el immaginava, che ils minaturs hagien be da scalprar dalla spelma l' aur nativ; ma uss el observet be crappa e non saveva capir, co ün vögli far aur cun quest material grisch. El se havess bugen informau da bleras caussas, ma el non havet la curascha e gagliardia da demandar dals minaturs sclariments de quellas caussas, et aunc bler meins da siu patrun, il qual el non

voleva unfisar cun sias deniandas. Stante che la temperatura sün las alturas era fitg bassa, signur Morin faget prest da returnar a casa per non pigliar ün sfredament in quellas regiuns che eran gia ferm cun ün pei nel inviern.

Ils proxims dis Tgetg stovet far diversas gadas la via allas minieras per portar ordras als capos de medemas. El fageva quella stentusa via a proporziun in fitg curt temps; pertgei el era svelt et ün bun pedunz, adüsau da currer per las muntagnas. Quella sveltezza plascheva fitg al patrun, et el gli dava beinduras üna buna mana, cur el era da speciala buna luna. Questa moneida, recerta aschi inaspectadamein, ardeva nel sac del pauper giuven; el la havess fitg bugen remessa a sia cara mamma. Ma co far quei? El pigliet üna domengia curascha e demandet siu patrun, sche el non ascassi zieva mezdi ir a Sanagn per visitar ses geniturs. Il patrun gli det bugen il permess, non havend il giuven quel di nagut da far. Tgetg se mettet subit in viadi et in meins che ün' ura el arrivet a Sanagn. El cattet be la mamma e ses fradegliuns plü piçens a casa; il bab et ils auters infants eran ii a Mon a vesperas. Il prim moment la mamma pigliet üna granda tema, vezend siu car Tgetg aschi inaspectadamein intrar in stüva. Ella l'imbraçet cun impetuositad et il bütet cun granda tenerezza, schend: „Tgei ti maunca, car Tgetg, che tü vegnas aschi inaspectadamein a casa? Es malsau?“

Tget, cun ögls larmants d'allegrezza la respondet: „Na, cara mamma, jeu non sun malsau, anzi jeu stun fitg bein; ma jeu vus hai oz voliu far üna visita cun lubienscha del patrun e vus porta inzatgei.“ E schend quests plaids el tiret da sia gilloffa ün papir et il remettet alla mamma cun bucca rienta. La buna mamma sviluppet il papir e faget allura ögls gross, vezend in quel üna pugnadetta bella moneida. „Ma miu car Tgetg, dinunder has tü questa moneida?“ Tgetg la schet, che el hagi recerta questa moneida in diversas gadas da ses buns patruns per buna mana e la hagi oz voliu portar alla mamma, savend che ella sappi adovrar fitg bein quella. Ün' ögliada carina da part della mamma ingraziet al bun figl per quest regal vegniu dad ün ura aschi opportuna. Prest zieva arrivettan il bab et ils auters infants a casa, e Tgetg stovet ussa comenzar a raquintar da sia vita a Lansch. L'intéra familia tadtava cun bucca averta il raquint del giuven, e tots s'allegravan, che Tgetg hagi cattau aschi buns patruns. La mamma voleva ir a cuschinlar inzatgei

al figl, ma quel declareret che el sei fitg content, sche la mamma gli detti ün pau paun et üna bucadetta caschöl. La mamma gli portet ün toc paun e mettet ün bel quader d' ün magnunc sün la meisa. Tgetg laschet gustar il caschöl della mamma; ma quella non voleva laschar partir da casa siu car figl cun bucca schütga (süttä) e jet per üna coppina cun latg, il qual gli gustet fitg bein.

Tandem Tgetg s' elevet, declarand che el stoppi uss se metter in via, sche el vögli amò arrivar da di a Lansch. Albert demandet ils geniturs da poder accompagnar ün toc il frar, il che quels gli lubittan. Tgetg det siu maun a tots members della familia, bütet sia cara mamma e bandunet allura rapidamein la stüva per far üna sperta fin alla dolorusa scena del camgiau. La mamma, cumbein che la partenza de siu car infant la sageva fitg mal, se musset questa gada plü quieta e tranquila, savend ussa che siu car figl hagi patrun humans tgi pissereschien fitg bein per il giuven. Tgetg haveva er impromess als gèniturs da vegnir ün' autra gada in visita, sche ils patrun gli permettien da se poder absentar per qualche uras. Ma l' Albert accompagnat il frar fin a Casti, pertgei el haveva bler da discurrer cun siu car Tgetg. La fortuna de quest ultim faget nascher in el la brama, dad er el cercar ün simil serveç sco quel del frar, et el suppli-chet Tgetg, che quel pudessi far tot possibel, per cercar gli üna tala piazza. Tgetg impromettet ad Albert da cun buna occasiun discurrer üna gada cun siu patrun de questa caussa, et Albert se contentet cun questa promessa; pertgei el saveva che Tgetg tgi l' amava sco ün ver frar, teneregi siu plaid. A Casti ils dus frars se separettan et jet scodün per sia via cun tota prescha. Arrivau a casa, Albert raquintet als geniturs, tgei il Tgetg gli hagi impromess. Pür zieva la çeina la mamma communichet alla familia, per qual motiv il Tgetg sei oz vegniu a Sanagn in visita, e tot la familia benedit il prudent giuven tgi oz haveva dada üna aschi bella prova de siu bun cor vers ses cars geniturs.



II.

Vers la fin del November crodet üna strementusa nevaglia nellas muntagnas grischunas, et ün audiya, che fussen idas bleras lavinas in diversas valladas. Er al Piz coçen eran intgüns periculus laviniers, e la societad dellas minieras concludet d' interrumper la lavur nellas minas fin alla proxima primavèra. Ils minaturs füttan licenziai, e scodün jet a casa sia cun il guadagn dell' estad e del autun. L' ingress dellas cavas füt fermau cun aissas, per che las cufflas che regian suvent sün quellas alturas cun üna strementusa vehemenza, non implenischien ils corridors sutterans et impedischien la primavèra la continuaziun dellas lavurs. Signur Morin, il directur dellas minieras, tgi era ün Clavennasc, era intenzionau da far üna visita a sia citad natala e cun quella occasiun render quint de sia administraziun a Plurs, inua ils vers socis della societad habitavan. Essend la nevada aschi granda, el non ris-chet da prender sia familia cun se, sco el haveva hagiу planissau; ma el communichet ün di a siu servient Tgetg Caleira, che quel il stoppi accompagnar sün siu viadi e che el sappi la domengia proxima ir a Sanagn pro ses geniturs per als comunicar, che el fetgi cun il patrun quest viadi a Clavenna. Essend da quel temps la fredaglia fitg mordenta, Morin faget far a Tgetg la necessaria vestimenta d' inviern, per che il giuven possi surportar il freid. Cur Tgetg havet reçerta sia nova mondura, el jet üna sera cun il permess del patrun a casa, inua el podet restar dus dis. Intrand Tgetg nella stüva dels geniturs nel moment che la familia çenava, negün il conoschet il prim moment in sia nova uniforma. Co se miravigliettan ils geniturs e fradegliuns che lur Tgetg fageva la figura d' ün bel signurin!

Tgetg se mettet a raquintar las bleras novitads e co el sei in precint da far ün viadi a Clavenna cun siu patrun. La buna mamma pigliet üna granda tema, audind che siu car figl dovei far ün viadi sur las aultas muntagnas dad üna tala fredaglia. Ella penset er als periculs de lavinas e laschet gia currer las larmas. Ma Tgetg la confortet, schend che siu patrun prendi üna schliusa cun dus cavalls cun se e che il famegl, il qual ils meini, sei adüsau da passar la muntagna del Septimer e conoschi er las lunas dell' aura. La mamma s' acquiettet ün pau, pensand

che il signur patrun de siu Tgetg havregi bein er ün pau cura de sia propria pell e non passi la muntagna dad uras periculusas. Passada la prima beneventaziun del cár figl, la mamma penset alla ceina de medem; ella jet in cuschina e gli faget üna buna suppa, la quala il figl laschet plascher. L'auter di che era üna domengia, Tgetg jet cun il bab et ils auters fradegliuns a messa a Mon. Quels da Mon se miravigliettan della comparsa che faget il giuyen Caleira; ses compagns da Mon havessen hagiu üna granda cuveida da far üna lutga cun el per mirar, quant ferm che el sei daventau a Lansch; ma Tgetg non voleva saver nagut da „far a vençer“ cun ses vegls compagns. Zieva mezdi el jet a Stierva per visitar siu padrin tgi era ün Stiervaun. Er quel se miravigliet da ver siu figliol in ün aschi bun stadi e gli det ün rensch per regal. La sera la familia Caleira a Sanagn tenet üna longa conferenza cun il figl tgi doveva in paues dis far ün aschi long viadi. Ils geniturs non manchettan da dar a lur figl saluteivlas admoniziuns e buns conseglis. La mamma l' animet alla pietad e probitad e l' advertit dallas nauschas compagnias che corrumplien ils buns costums e meinien ultimamein il human alla perdizion. Tgetg impromettet a ses buns geniturs da se deportar bein e da far conscienziusamein siu serveç et acquistar la contentezza de siu bun patrun.

L'autra sera Tgetg se rendet a Lansch, e treis dis plü tard el partit cun siu patrun per Clavenna, e passettan diversas emdas, fin che els finalmein ricevettan novas dalla familia Morin a Lansch, che il signur et il Tgetg seien arrivai fortunadamein a Clavenna. Ils geniturs ingraziettan a Deus per questa alle-greivla nova.

Dintant la familia Caleira manet üna vita quieta a Sanagn. Lur provisiun da victualias la laschet sperar da saver passentiar il rigurus inviern senza stover patir. Ma ils displaschers non la dovevan restar spargnai. Lur vischin a Sanagn, il qual ün nella intéra contrada nomnava be il Giacum da salvonnas, comenzet a dar fastidi als Caleiras. Giacum da salvonnas habitava a Sanagn üna casa nauscha cun sia muglier Mengia. Giacum lavurava da treçer; el fageva treçias, giuncias e salvonnas e similas caussas, las qualas el vendeva nellas vischnauncas limitrofas; el mava er a diurnada als contadins per lavurar da siu mastregn. Funds el possedeva pauc; el podeva a peina invernar üna vacca nauscha et ün pèr cauras cun siu pavel. La moneida che el guadagnava

cun siu mastregn, el spendeva la granda part per bevrandas alcoholicas e daventet cun il temps ün insurportabel bevoli tgi cercava semper dispüta cun ils humans, tgi vegnivan cun el in contact. La familia Caleira haveva bler da patir da quest rustic schani. Sia donna Mengia era ils prims anns de siu matrimoni stada üna brava femna; ma nella compagnia de siu insolent hum, e condemnada a passar la scola della quotidiana miseria, ella daventet cun il temps er ün' autra, e donna Gnagna Caleira haveva piçen plascher da se conversar cun üna tala cantunèsa. La Mengia da salvonnas, sco ün la nomnava er fitg suvent, vegniva quasi ogni di in casa de Peder Caleira a far imprestar inquala caussa, sco p. e. farina, latg, ovs, üna buccada caschöl et autres similas caussas; ma da render üna caussa imprestada mai non la vegniva indament. Donna Gnagna Caleira fageva bugen ün serveç ad üna vischina, ma in quella maniera, sco vischina Mengia abusava sia buntad, ella non se voleva plü laschar complascher. Vegrind ün di Mengia in casa dels Caleiras per far imprestar farina da cuschinlar, donna Gnagna la declaret, che ella non la detti plü la minima caussa, sche ella non rendi üna caussa imprestada.

Mengia pigliet la rabia e bandunet sia buna vischina senza la salüdar, jet directamein a casa e racquinet a siu hum quei che Gnagna la haveva renfaçiau. Il treçer comenzet a ramurar e quei principalmein a raschun che sia muglier haveva negüna farina in casa et el temeva dad oz stover restar senza gentar. El badunet sia casa nauscha e comenzet avant sia porta da clamar da totas aviras vers la casa de ses cantunès. Gnagna tgi era in cuschina, audit quella ramur et intelliget er intgünas de quellas infamas çiancias del nausch bevoli; ma ella non se laschet ver avant quel e non faget menziun a siu Peder da quella brutalidad del vischin, per che non naschi qualche dispüta tranter ils dus humens. Ma il Giacum da salvonnas repeteva ogni di sias aviras, cur el vezeva u credeva che inzatgi de ses cantunès fuss inzanua da vicin. Sortind ün di Peder Caleira da sia stalla, el audit quellas çiancias del imprudent vischin e sentit granda cuveida da responder al vegl ruzaun; ma el supprimet sia rabia, capind che il sei meglier da non comenzar dispütas cun da quella nau-scha schenta. El jet dunque in sia casa, senza dar oreglia al nausch provocatur, e raquinet a sia buna muglier, tgei el hagi audiu dal cantunès avant la casa. Sia donna gli communicet, che ella

hagi bleras gadas audiu ramurar aschia il nausch Giacum, ma ella hagi plü bugen taschiu, per che non naschien dispütas cun quest nausch hum.

Volend evitar totas litas e contesas cun il nausch vischin, Peder e sia brava consorta non laschavan accorscher, che els hagien audiu ils affrunts de medem et evitettan scodün inconter cun il vegl; ma quel cercava mintga di d' offender il Peder e quest ultim füt tandem stuffi de quellas provocazijs. Ün di, cur il vegl pusper brunclava e ramurava avant sia casa nauscha, Peder bandunet sia stalla e jet directamein vers siu adversari et il demandet, tgei motivs el hagi da continuamein cercar da voler ingiuriar ses vischins. El hagi ussa audiu avunda quellas çiancias et aviras e non sei intenzionau da se laschar affruntar mintga di dad ün tal subject sco el sei. Sche el non cedi cun quellas provocaziuns, cerchi el la dretga via per serrar la bucca ad ün schani sco el sei; el hagi materia avunda per far tascher ün tal baderlunz sco el sei. In summa Peder musset ün pau ils dents al imprudent vegl et il faget capir, che el non il temi.

Il vegl ruzaun non restet debitur la resposta, dimperse el comenzet cun aulta vusch ad ingiuriar il Peder pir che mai. Peder gli schet, che el il sfraccassi sche el non fussi ün miserabel subject senza credit; ma el vögli in autra maniera fermar gli la bucca, e schend quei, el returnet in casa sia, senza badar allas columnias del vegl; ma l'auter di, che era üna domengia, el jet a Mon e lamentet il vegl al mistral regent cun la supplica da quel voler citar e demandar, sche el insisti in sias titulaturas adovradas conter siu vischin Peder Caleira. Il mistral impromettet da citar l'imprudent Giacum, il qual el conoscheva fitg bein per quei che el era. Et in verdad, dus dis plü tard füt il Giacum da salvonnas citau tras il saltér da comparer avant il mistral per responder ad üna querela de siu vischin Peder Caleira. Il pauper baderlunz pigliet tema, vezend che Peder voleva proseuir sia sminaçia. Giacum era per tant plü in grand imbrugl, stante che el, cun raschun, non saveva renfaçiar üna soletta caussa blasmabla a Peder; anzi, el stoveva, voleva el dir la verdad, confessar, che Peder Caleira gli haveva fatg blers buns serveçs et il susteniu in blers dis de miserias. Sia donna Mengia tgi plü u meins cuviva a siu tyrann üna lecziun, gli faget la tema amò plü granda, gli fagend indament tot las expressiuns columniantas che el haveva adovras vers ils vischins Caleiras.

Il di fixau el comparet avant il mistral e quel il recevet cun seriusa çera. Il mistral gli communichet là querela del Peder Caleira et il demandet, sche il sei ver, che el hagi adovradas talas e talas expressiuns ingiuriantas vers siu vischin Peder. Giacum non sneget che el non hagi adovradas expressiuns ün pau fermas conter siu vischin, ma el non hagi hagida l' intenziun d' ingiuriar medem, et el sei er prompt da retirar totas expressiuns che podessien contener u involver üna ingiuria u columnia. Zieva questa declaranza il mistral gli det ün ferm reprimandi, che el se laschi transportar da sias malas lunas; il füssi plü prudent, sche el imitassi in totas caussas siu bun vischin Peder tgi sei ün hum, il qual gaudi generala stima. El licenziet allura il vegl, l' admonind da ceder cun quellas çiançias, aschiglioc el hagi l' altra gada d' aspectar ün rigurus castitg per sia rusticidad. Giacum bandunet la casa del mistral, fitg content dad esser scappau be cun ün reprimandi. Havend però vis, che il mistral non haveva tractada quella caussa per üna bagatella, el se pertgüret da repeter sias ingiurias al vischin Peder.

Al principi del Schanèr crodet üna granda nevada nellas muntagnas et er la fredaglia füt fitg mordenta. Ils humens tgi havevan lur muvaglia per part nels primarans, havevan ogni di da far stentusas vias. Peder Caleira però haveva già siu muvel a Sanagn; el haveva uss a proporziun bella vita, stante che el sper il pavlar del muvel saveva far pauc auter che tagliar ün pau lenna. Havend dunque buna peda, el jet ün di a Lansch per s' informar dalla donna del signur inspectur dellas minieras, sche ella non hagi recertas novas da Clavenna, tgei siu figl Tgetg fetgi. La signura gli communichet che siu hum e Tgetg seien fortunadamein arrivai a Clavenna et erien, cur ella hagi recertas las ultimas novas, tots dus sauns. Ella sperì, che siu mariu returneregi al plü tard in quatter emdas; sche ella receivevi però qualche nova importanta avant siu return, ella vögli tramerter ün mess a Sanagn. Peder ingraziet alla signura e returnet contentamein a casa sia. Sia buna muglier s' acquietet uss er, savend che siu figl sei almeins arrivau fortunadamein al lög de sia destinazion.

Paucs dis plü tard se deraset la fama, che existi in divers locs della terra la nauscha pesta u moria. La tema daventet generala in tot las vischnauncas, inua ün haveva audida questa trista nova. Et in verdad la malattia contagiosa comenzet a se

derasar qua e là cun granda vehemenza; da rar che ün, tgi haveva pigliada questa sgrischeivla malattia, müciava cun la vita. La derasaziun de questa sgrischeivla malattia s' extendeva semper da plü, e tandem ella arrivet er nellas contradas alpinas del Grischun. Remedis per questa malattia ün conoscheva negüns, e tgi la pigliava, haveva negüna speranza da müciar cun la vita. Er nellas valladas della Giulia e dell' Albula era quest terribel mal compars e haveva gia in curt temps occasionau nellas di-versas yischnaucas üna granda mortalitad. Er a Sanagn ella haveva fatga üna visita e büttet in fossa il conoschent Giacum da salvonnas. Audind Peder Caleira e sia muglier, che lur vischin Giacum hagi la moria, els fagettan tot lur possibel per sustener lur vischina Mengia, tgi era mez desperada, u pervia della per-dita de siu hum, u forsa er be per tema che ella sezza podessi pigliar questa nauscha malattia. Ma a Sanagn morit negün auter che il Giacum, e sia timida muglier Mengia revegnit zieva qualche emdas dalla tema da stover perder sia pell. A Mon et a Stierva la malattia haveva decimada malamein la piëna populaziun. La malattia haveva durada in quella contrada be circa ün meins, allura ella svanit fin al proxim autun.

Conter la fin del Schanèr Peder reçevet üna inaspectada visita, nempe la visita dal patrun de siu Tgetg. Peder e sia buna donna pigliettan üna granda tema, supponend che maunchi inzatgei a lur car figl; ma il patrun portava üna çera sereina e schet cun bucca rienta: „Non temei, vos figl eis saun e fresc; ma jeu il hai laschau a Plurs. Miu amitg, il signur Fabian Go-metti, il prim e plü rich soci de nossas minieras a Lansch me ha supplicau da gli ceder quest svelt servient; et impromettend el a vos Tgetg üna per da bler plü granda paga che quella, la quala jeu gli pos dar, jeu hai laschau a Tgetg la libra voluntad, dad intrar in quest nov serveç. In consideraziun della granda paga Tgetg se resolvet d' acceptar la nova piazza gli offerta. Jeu non il cedet bugen a miu amitg, ma per far a quel ün plascher, jeu det il permess a Tgetg da restar pro miu amitg Gometti.“ Durant quest discurs dal signur directur a donna Gnagna eran saglidias las larmas; ma il signur directur la schet: „Non seies trista et afflita, mia buna donna, vos Tgetg eis uss in ün serveç, sco ün catta tals fitg da rar. Signur Gometti eis ün hum richissim e fitg human vers ses servients; er sia signura eis üna excellenta donna tgi porta il cor in maun. Jeu sun persvas, che

vos bun figl havrà a Plurs ün excellent serveç. Sche jeu non havess saviu quei a bel principi, jeu non il havess cediù a miu bun amitg. Jeu sai er, che vus haveis bisögn del susteniment de voss infants, e jeu era persvas, che vus seregies contents da laschar intrar vos figl in quest nov serveç, essend che el guadagna in quest serveç, senza prender in consideraziun las frequentas bunas manas cun las qualas miu amitg eis fitg liberal, treis gáda da plü che fin ussa in miu serveç. Jeu vus conseglia dunque d' approbar il pas de vos figl et il laschar cun tota fidanza in quest nov serveç.“

Audind questa relaziun del signur directur, Peder e sia consorta se declarettan contents da laschar lur Tgetg a Plurs in casa del signur Fabian Gometti et ingraziattan amò al signur directur per sia benevolenza vers lur figl. Ma il signur directur als schet: „Vos figl eis ün brav giuven in tots rapports e jeu il hai pers fitg nuides, e tgi sa, sche jeu non il havess alla fin snegau a miu amitg, sche jeu non havess saviu, che vus haveies aunc ün second figl ün pau plü giuven, il qual savessi intrar in miu serveç e tgi er non sei crodau lontan dal lenn. Jeu sun dunque oz vegniu a visitar vus per vus relatar il pas de vos bun Tgetg, ma nel medem temps per vus supplicar da mi ceder vos Albert et il laschar intrar quel in miu serveç sut las medemas condiziuns sco il Tgetg. Jeu sun persvas, che Albert serà er ün bun giuven e farà er siu serveç cun la medema exactezza sco siu frar. Et uss jeu vuss supplicescha be aunc da mi dar üna resposta affirmativa. Vus saveis che vos Tgetg eis stau fitg bugen in casa mia, e jeu vus pos sincerar, che el ha bandunau fitg nuides miu serveç; vus podeis er esser persvas, che jeu tenerà vos second figl Albert giust aschi bein in casa mia, sco il Tgetg.“

Donna Gnagna se volvet vers siu mariu e schet: „Tü sas, Peder, che nos Albert ti eis ün grand agüt, cur tü has dad ir a pavlar, et il serà cert difficil per tei da far totas lavurs solet.“ Ma Peder respundet subit a sia muglier, che el se possi er contentar cun l' agüt d' ün dels infants plü piçens, et il sei dunque negün motiv da tener l' Albert a casa. Sche ella sei dunque contenta da laschar ir l' Albert a Lansch pro il signur directur, sche ne detti el er bugen siu consentiment. Quest discurs tranter ils dus conjugals musset cun üna gada al signur directur, che la buna muglier Gnagna non perdeva bugen siu second figl; el se volvet vers ella e schet: „Mia buna donna, haveies negüna tema

da laschar vegrir vos figl in casa mia; jeu vögl pisserar per el sco sche el fuss miu figl. Jeu hai accort a vos figl Tgetg, che vus haveis dada üna fitg buna educaziun a voss infants; e giust perquei jeu giavüscha da prender er vos second figl in miu serveç. Jeu cattass da quels giuvens plü che avunda tgi intrassen bugen in miu serveç; ma jeu vögl esser segür da finar ün giuven bein educau, del qual ün se po fidar in totas occasiuns. Ussa saveis vus il motiv per il qual jeu giavüscha vos figl per miu servient, e jeu spera, che vus il mi concedeies. Vus saveis er, che vos Tgetg era fitg bugen in casa mia e vos figl Albert serà tractau giust aschi bein sco siu frar.“

Donna Gnagna se volvet a siu mariu, schend: „Car Peder, fai dunque quei che tü vol; sche tü te priveschas del agüt del Albert, sche eis tü quel tgi patischa il plü. Fai dunque giust quei che ti plascha!“ Peder non faget ün long studi; ad onta dellas larmas che el vezeva glüschr nels ögls de sia cara consorta, el schet al signur directur: „Jeu sun content da laschar intrar nos Albert in siu serveç, savend che El e sia signura han tractau benissim nos Tgetg, e nus sperein che El e sia signura consorta havregien la medema cura per nos second figl sco per il prim. Ma gia damaun nus non savessen trametter il mat a Lansch; nus il havein aunc da proveder cun diversas caussas necessarias per l' ascar presentar in üna casa de signuria. Ma mia muglier farà cert tot siu possibel da prest vestir il mat et il proveder cun il plü necessari.“ Gnagna affirmet quei che siu Peder haveva dit, et il signur directur respondet allura cun vusch amieivla: „Mia buna donna, vus saveis far tot quei cun buna commoditat, que eis totüna che il mat intreschi treis fin quatter dis plü prest u plü tard. Jeu sun contentissim, che vus lascheis intrar vos figl in miu serveç e vögl bugen conceder gli tot il temps necessari per il saver revestir e proveder cun il necessari. Ma jeu havess uss amò ün giavüscht, nempe da vèr vos Albert per saver discurrer ün pèr plaids cun el.“

Peder schet al signur, che el hagi tramess l' Albert a Stierva cun ün utensil, ma el stoppi cert prest arrivar. A peina pronunciò quests plaids, l' üsch della stüva s' avrit et Albert intret nella stanza, faget però ögls gross, vesend qua in stüva il directur dellas minieras, il qual el conoscheva, essend stau diversas gadas in casa del directur a Lansch, cur el haveva stoviu portar inzatgei al frar Tgetg. Albert era bein vestiu fitg simpel, ma la vestimenta

che el portava, era netta; er sia façia e ses mauns eran bein lavai e nets, e quei faget sün siu ventur patrun üna bunissima impressiun. Il bab Peder schet ad Albert, el dovei dar il maun al signur directur, et il figl s' avicinet cun tota ingenuitud, ma cun decenta modestia al signur e gli porschet siu maun et il salüdet e beneventet. Al signur directur plaschet quest contener del mat, et el gli schet: „Teidla, miu bun Albert, non vol tü vegrir a Lunsch cun mei?“ Albert faget ün inclin e schet: „Sche il frar Tgetg vol returnar a casa, allura jeu vögl bugen vegrir a Lunsch pro El e Gli servir, che El serà content cun mei.“ Il bab Peder gli communichet ussa, che el sappi ils proxims dis intrar in serveç pro il signur directur, stante che Tgetg hagi uss ün auter serveç a Plurs. De quella novitad Albert s' instupit, non havend fin ura audiù da ses geniturs, che Tgetg intenzionavi da müdar serveç. La mamma gli racquintet ussa l' intèra historia del Tgetg e co il signur directur hagi giavüschau da prender el in serveç et il bab e la mamma seien stai contents cun questa proposta del signur, sche er el la vögli acceptar. Albert se musset subit prompt dad ir a Lunsch. Allura il signur directur s' absentet contentamein e returnet a casa sia. Sès dis plü tard Peder accompagnet siu second figl a Lunsch et il presentet a siu patrun, l' exhortand da far siu serveç a contentezza del patrun e della patruna.

Albert se musset fitg adester, svelt e fidel in siu serveç a Lunsch, da maniera che il patrun e la patruna eran fitg contents cun el. De quei ils geniturs a Sanagn s' allegravon fitg. Cur arrivet tandem la primavèra, comenzettan ils minaturs del ann passau a returnar a Lunsch, et inturn mez Avril las lavurs nellas minieras füttan er recomenzadas. Que det uss üna nova vita all' intèra contrada. Blers humens e blers possessurs de manadüras cat-tettan nov guadagn. Gia vers la fin del Matg ün faget nellas minieras ün catt da granda importanza, descuvrind üna fitg ubertusa veina d' aur; quei det nova vita nellas minieras e cir-culavan nella contrada las plü extravagantas ciancias dalla for-tuna dels minaturs. Nel Sercladur ün cattet in üna cava ün filum dalla grossezza della camba d' ün hum. Quella extraordinaria richezza d' aur faget necessaria la plü granda precauziun da part della direcziun e dels intenders, stante che ün temeva che po-dessen succeder involadiçs e defraudaziuns da part dels singuls minaturs, ils quals fagevan las grevas lavurs e stovevan finalmein

laschar la grama a quels, tgi gia havevan las bursas pleinas. Il directur a Lansch stoveva mintga di visitar las minieras per tener bun urden, e nos Albert Caleira stoveva er semper accompagnar il patrun sün la muntagna; il fruntava aschizun, che el stoveva far questa via da Lansch allas minas del Piz coçens duas fin treis gadas a di, cur il signur patrun haveva imblidau inzatgei a casa che el stoveva haver sün la muntagna. Il succedeva er, che il directur stoveva er pernottar cun siu servient sün la muntagna, il che signur Morin non fageva tant bugen, stante che el non cattava giust granda commoditat in siu dormitori sün la muntagna.

Duranç quell' estad la societad dellas minieras haveva fatgas grandiusas façendas, e cur füt tenida a Plurs üna radunanza generala dals members dell' intèra societad, seodün da quels reçevet üna granda quota. Il directur Morin a Lansch tgi era soci della societad, haveva er reçert üna granda quota, e supra de quei la societad gli haveva concessa üna splendida gratificaziun per sia circumspectusa administraziun dels affars della societad. Cur il plova sün ils grands, il dagutta er beinduras sün ils piçens. Morin era ün hum da bun cor e cuviva er bugen inzatgei ad auters, cur il maya bein cun el. El se regordet in questa sia fortuna er de ses servients e det a scodün üna buna mana, postut al Albert Caleira, a siu giuven servitur, el haveva fatg ün rich regal, il qual il bun giuven subit portet a ses cars geniturs.

Arrivand las burascas autumnalas quest ann a bun' ura, ün stovet quest ann serrar las minieras plü prest che d' ordinari, cumbein che l' explotaziun dellas cavas era amò üna fitg buna. Temend però che podessen succeder durant l' inviern defraudaziuns nellas minieras, la societad concludet da laschar durant l' inviern dus guardians sün la muntagna. Ün reparat la baita della direcziun et indrizet in quella üna stüva che ün saveva scaldar; ün faget er üna granda provisiun de lenna per ils dus guardians et ils providet cun la necessaria vivanda; pertgei dad aulta nevada que era impossibel als dus humens da vegnir sezs a vall per prender victualias sün la muntagna. Havend fatgas totas quellas preparativas, ün fermet las minieras sco ils anns antecedents, et ils minaturs bandunettan la muntagna, laschand ils dus guardians solets in lur cadevula habitaziun. Paucs dis plü tard vegnit üna seconda neiv, la quala faget da totafatg impracticabla la muntagna, et ils dus paupers guardians dellas minieras eran totalmein

isolai da tot il mund. Els eran però provists cun badils e provavan ogni di da far e batter ün toc via vers la vall. Ma las lavurs che els fagevan durant il di, ils suffels della notg cuvrivan cun aults cufflaus, da maniera che il fuss stau absolutamein impossibel als dus humens da vegrir a vall.

Conter la fin del November la populaziun della contrada füt da novamein allarmada tras las novas che la pesta hagi in divers locs da novamein comenzau a furiar cun granda vehemenza. La tema era üna generala nell' intèra terra, ma na senza raschun; la malattia era questa gada bler plü vehementa che l' ultima primavèra. Ils paucs docturs conoschevan absolutamein negün remedi per quest mal, e tgi il pigliava, saveva far nagut auter che se raccommendar alla grazia del çel e se preparar alla mort. Il plü remarcabel era, che la malattia non se deraset in totas casas d' ün vitg; ma in quellas casas, nellas qualas ella haveva tenida sia intrada, stovevan tot ils members della familia ceder, e be da rar che ün müçiava cun la vita. Ün audiva mintga moment sunar ils curs de morts nellas diversas vischnaucas, e quei fageva üna fitg trista impressiun sün la populaziun. In diversas vischnaucas eran er ils spirituals morts da quella terribla malattia, el il fruntava che ün plevan stoveva proveder ils moribunds et ils vivents da duas vischnaucas. Ma tots se suttamettevan bugen e cun grand zeli a questa periculusa e stentusa lavur. Per fortuna la perioda della malattia non duret ditg; già in circa otg emdas la malattia çesset totalmein e bandunet la contrada giust aschi rapidamein sco ella era vegrida. In üna vischnanca exista amò oz la tradiziun, che ün hum hagi audiu durant la notg ün fracass in strada; el saglit sü dal letg, pigliet sias caulcias, mettet üna camba nella caulcia et avrit la fenestra. El vezet passar per la strada üna numerusa processiun funerala; l' ultim nella processiun era be cun üna camba nellas caulcias, e quei era giust il hum tgi mirava da sia fenestra. Quel eis allura stau l' ultima victimà della malattia in questa vischnanca.

A Sanagn questa gada la malattia contagiosa non haveva tenida sia intrada; anzi la familia del Peder Caleira stava fitg, bein et era prosperusa. Er a Lansch non haveva la malattia fatg grandas devastaziuns questa gada; in questa communitad eran mortas be treis persunas della pesta. Il signur directur Morin fuss bugen fugiu cun sia familia a Clavenna, sche el non havess récertas novas da là, che la moria sei là fitg nauscha:

El restet dunque a Lansch; el teneva però serrada sia casa per non vegnir in contact cun auters habitants del lòc e cun ils passants. Al Albert Caleira, tgi haveva negüna tema della malattia, il pareva fitg longurus da mai ascar sortir da casa. El prendet perquei permissiun dal patrun per intgüns dis e jet a Sanagn. Ses geniturs e fradegliuns havettan ün grand plascher de sia visita. Havend passentada circa ün' emda a casa, el stovet returnar a Lansch pro ils patruns. Stante che la pesta era ussa prest cessada del tot, signur Morin faget cun sia muglier tgi l' ann passau haveva stoviu restar a Lansch, ün viadi a Clavenna per visitar ses parents. Essend però l' aura memia freida, el stovet laschar ses infants a Lansch sut la vigilanza della veglia cuschinunza e del Albert, il qual havess er fatg fitg bugen quest viadi cun ils patruns per vèr siu frar Tgetg a Plurs.

Signur Morin haveva procurau per üna buna instrucziun a ses infants durant l' inviern; el haveva nempe supplicau il rev. sig. plevan da Lansch, che el detti mintga di duas uras scola a quels, e stante che Albert Caleira stoveva adüna accompagnar ils infants, el se podet er profitar de questa instrucziun. Havend el üna buna testa, el havet prest impres a leger; el comenzet er cun il scriver e faget er in quest art bels progress. Il signur plevan haveva siu grand plascher cun quest talentus giuven e faget tot siu possibel per che quel vegni inavant nel leger e scriver. Albert mussava granda diligenza in scola, e cur el vegniva zieva la scolà a casa cun ils infants del patrun, el s' occupava er amò durant l' altra part del di cun sias scienzias de scola. Quei plascheva zun fitg al bun instructur, e quel pigliet ultimamentein er la curascha d' instruir siu discipul ün pau nell' arithmetic, della quala Albert haveva ün special plascher. In curt temps el conoscheva andantamein las quater specias. Il progress del Albert era per bler plü grand che quel che fagevan ils infants del patrun, stante che el era plü grand e plü giudicius che quels. La sera Albert repeteva cun ils infants del patrun las lecziuns che els havevan regertas durant il di dal signur plevan. In questa maniera er ils infants fagevan a proporziun grands progress, e lur instructur era fitg content cun els.

Cur signur Morin e sia muglier returnettan da Clavenna, els se musettan fitg contents cun ils progress che lur infants havevan fatgs durant lur absenza. Els portettan fitg bels regals alla cuschinunza et ad Albert, per remunerar lur buna cura hagida

cun ils infants. Ma ad Albert plaschevan avant tot las bunas novas che ses patrunz gli portettan da siu car frar Tgetg. Il patrun gli relatet che Tgetg stetti fitg bugen a Plurs, che ses patrunz il laudien e seien fitg contents cun el. Tgetg sei er creschiu zun fitg e fetgi uss quasi la comparsa d' ün mat creschiu. Il patrun consignet er ad Albert ün pachet che Tgetg gli haveva tramezz cun ils patrunz e gli schet, el sappi l' auter di ir a Sanagn cun quest pachet et il remetter a ses geniturs, ils quals allura seregien certamein contents cun lur figl a Plurs. Quellas novas rallegrettan il bun Albert, e l' autra damaun a bun' ura el jet cun lubienscha dels patrunz a Sanagn per portar quellas bunas novas als cars geniturs. El cattet quels in buna sanadad et als remettet il pachet del frar. Avrind la mamma il pachet, ella cattet in quel per scodün de ses infants ün piçen regal; ma in mez del pachet ella anflet in ün papir 50 renschs in pezzas d' aur. De quels uçells ella haveva amò vis paucs et ella e siu mariu s' allegrettan fitg del susteniment de lur bun figl. Albert passentet ün fitg agreabel di nella casa paterna e returnet pür conter sera a Lansch pro ses patrunz.

La familia Caleira a Sanagn saveva fitg bein adovrar ils danèrs reçerts dal figl a Plurs. Peder havess gia da ditg innà bugen comprau üna vacca, ma la moneida gli mancava; uss el jet gia l' auter di ad Alvaschein, e la sera el returnet a casa cun üna bella vacchetta che el haveva comprada per 16 renschs. L' autra moneida reçerta da Plurs el applichet per pagar intgüns debits currents. Zieva haver fatg quels pagaments, il gli restet aunc circa 20 renschs in cassa per il temps futur. Quella summetta restet long temps intacta; pertgei da quel temps las familias de contadins conoschevan negün luxus; ün non haveva bisögn da zucher e caffè e d' autres specerias che consumeschan oz in di blers danèrs quasi in ogni casa de contadin. Ultra del sal ils contadins compravan negüñas caussas estras. E per lustrign ester els non spendevan danèrs; lur diligentas mugliers filavan sezzas la launa et il glin e fagevan lur vestimenta cun lur products. E giust donna Gnagna Caleira era in quest rapport üna femna öconomia tgi havess podiu servir a bleras otras per ün exempl.

Üna sera zieva haver orau il rosari, donna Gnagna mettet a letg ses infants seo il solit. Returnada in stüva, ella schet a siu mariu: „Miu bun Peder, mi disch co quei eis possibel, che nos Tgetg nus sa trametter in ün aschi curt temps üna summa

da 50 renschs. Qua pro nus ün paga al plü 10—12 renschs pagglia ad ün famegl creschiu tgi sa far tot las lavurs. Co eis quei dunque possibel che nos figl nus sa trametter zieva a peina ün ann üna tala summa? Dovess el forsa haver acquistada questa blera moneida in maniera ingiusta? Jeu sto confessar che questa demanda me ha occupada tot quels dis, e jeu non me pos liberar dad üna certa tema che nos Tgetg se hagi in quest ann müdau e non observi plü ils principis che nus gli havein inspirai. O qual torment che quei mi fa di e notg!“ Peder la respondet: „Er jeu hai gia pensau a quella caussa e non sai mez capir, co ün mat da quindesch anns dovess nel termin d' ün ann saver spargnar üna summa da 50 renschs in qualitat d' ün servitur. Jeu metta bein confidanza nella probitad de nos Tgetg; ma la caussa mi eis totüna indeclarabla. Per far fin a tots dubis inquietants jeu sun intenzionau dad ir ün di a Lansch a demandar il signur inspectur Morin, tgei el pensa de quella caussa; el mi sa cert dir, sche Tgetg ha saviu guadagnar tanta moneida a Plurs in ün aschi curt temps.“ Sia muglier era contenta cun quest plan e l' animet da prest l' exsequir, aciò che els possien prest acquistar lur tranquilidad.

La proxima domengia Peder jet da veras a Lansch per consultar il signur Morin in quella caussa che fageva tant scrupel als conjugals Caleira. El cattet a casa il signur directur e quel il recevet cun granda curtesia. El racquintet a Peder, tgei stupend giuven Tgetg sei daventau a Plurs e co quel il hagi supplicau da salüdar ses cars geniturs e fradegliuns. „Mirei, miu bun Peder Caleira“, schet signur Morin, „vus non conoschesses plü vos Tgetg. El eis in verdad ün stupend giuven e fa üna bella comparsa. L' intéra familia de ses patruns l' aman sco sche el fuss ün figl della familia. Vus podeis esser fitg content che Tgetg ha cattau ün tal serveç. Vos figl farà certamein cun il temps sia fortuna a Plurs.“

Audind il laud de siu figl, Peder stava qua tot perplex; ils plaids del signur Morin fagevan bein a siu cor, ma uss gli vegnit indament il scopo de sia visita a Lansch, et el daventet inquiet e non cattet il plaid da comenzar la demanda, la quala el voleva far a signur Morin. Quel observet questa timiditat del bun hum e gli schet che el sei prompt da dar gli aunc plü sclariment, sche el quei giavüschi. Peder pigliet tandem curascha e schet: „El mi ha dau ün bun rapport de miu figl; ma — ma jeu gli sto

totüna comunicar üna caussa che m' inquietescha. El ha hagi la buntad da nus portar da Plurs ün pachet da miu Tgetg. Avrind mia muglier quest pachet, ella cattet, ultra d' intgüns regals per noss infants, ün summa da 50 renschs in pezzas d' aur. Questa blera moneida nus ha fatg grand pisser; mia muglier e jeu, nus non savein capir co nos figl ha saviu spargnar tants danërs in ün curt ann, e jeu sun oz vegniu express a Lansch pro El per il demandar, sche nos Tgetg ha saviu guadagnar üna tala summa in ün aschi curt temps.“

Signur Morin respundet cun emozion: „Miu bùn Peder, ha veies negüna tema, che vos figl hagi acquistada questa moneida in miniera ingiusta. Sche jeu non sbaglia gli dan ses patruns uss üna paga da 20 renschs. Il passa quasi gnanc ün di, senza che el survegni üna bella buna mana. In casa de ses patruns se raduneschan suvent grandas societads de signuria, et ils signurs mai non bandunan la casa hospitala, senza dar üna buna mana als servients della casa. Jeu sun persvas che vos Tgetg vegnirà in ün ann ad üna paga da 100 renschs, sche ün compiglia er quei che el receiva per buna mana. Na, na, miu bun amitg, vos Tgetg eis ün fitg galant e honest giuven e non farà mai tort a ses patruns. Ma vus non stoveis metter Plurs in comparaziun cun las vischnauncas da questa part dels munts. A Plurs svola in ün di plüra moneida, che in üna de nossas vischnauncas in ün ann intèr.“

Peder discurret uss aunc cun siu figl Albert e bandunet allura la casa del signur Morin, content cun l' informazion reçerta. Er sia muglier Gnagna s' acquietet ussa, ma non imblidet dad orar mintga di per siu figl absent. — Signur Morin racquinet a sia muglier il discurs teniu cun Peder e quella se miravigliet cun el della probitat de quest simpel contadin.



III.

La primavèra arrivet quest ann ün pau da tard; ma alla fin del Avril la lavur nella miniera al Piz coçen füt comenzada. Ils minaturs esters eran gia arrivai otg dis avant che ün savet

comenzar las lavurs. Quels robusts schanis portettan qualche vivacitad nella vischnaunca de Lansch, et ils vischins de quella eran fitg lets, cur quels humens bandunettan il lòc per se render nellas minieras. Las minieras e cavas ün haveva cattadas intactas; tot era in urden; negüns laders havevan tentau d' intrar nellas cavas per involar aur. In circa 15 dis era tot puspei in moviment, e gia las primas lavurs fatgas nellas cavas, laschettan sperar che la societad faregi er quest an bunas façendas nellas minieras. Nel meins de Matg la societad da Plurs tramettet intgüns de ses sociis a Lansch per laschar interquirir il stadi dellas minieras et examinar ils quints dell' administrazion de medemas. Tranter quels commissaris se recattava er il patrun del Tgetg Caleira, e Tgetg il haveva podiu accompagnar. O, quala allegrezza sentit il bun giuven, cur siu patrun gli haveva comunicau, che el possi yegnir cun il patrun sün quest viadi. Conter la fin del Matg questa societad de viadi arrivet a Lansch, inua ün haveva gia preparau ün quartier per questa signuria. Tot quels signurs havevan fatg quest viadi a cavagl, et ils servients de medems, tranter quels er il Tgetg Caleira, havevan stoviu ir a pei e tener pass cun ils signurs; pertgei els havevan dà regular e pavlar ils cavalls, cur la societad se fermava inzanua. Las stradas però eran aschi nauschas, che ün bun pedunz podesseva facilmein sequitar a quels cavalcants tgi non eran adüsai da far grands strapazs. Quest viadi non dovet passar senza üna disagreabla aventura. Nella pitgogna del Crap tranter Conter e Casti, il cavagl del signur Gometti, patrun del Tgetg, se spaventet däd üna caglia moventa, faget ün pèr terribels sagls e büttet a terra siu cavalier. Signur Gometti non se haveva nel crodar podiu liberar dalla staffa e füt straschinau per la strada nauscha; ma per fortuna Tgetg era per intgüns pass avant ils cavalcants et observet la disgrazia amò a temps; il gli reussit da pigliar il cavagl de siu patrun e da quel tener ferm. Ils auters cavalcants descendettan subit da cavagl e liberettan il signur Gometti da sia penibla situaziun.

Uss ün interquirit subit las plagas del disfotunau cavalcant e cattet, che el haveva reçerta üna ferma contusiun nella testa e dislogau ün braç; er il pei che era restau nella staffa, gli doleva che el a peina saveva passar. La compagnia de viagiators era in grand imbrugl e non saveva co far per transportar il disgraziau fin a Casti. Essend Tgetg conoschent in questa

contrada, ün il tramettet subit a Casti per cercar humens tgi possien portar il feriu fin a Casti. Tgetg curret sco da svolar fin a Casti et in circa duas uras arrivettan quatter humens da Casti cun üna poltrunaçia et intgünas cuvertas da launa. Uss ün plazet il vulnerau signur Gometti sün la poltruna e l' inzugliet bein bein nellas cuvertas et il portet allura cun tot adatg a vall vers Casti. Tgetg sequitet als portaturs e manet al frein il cavagl de siu signur. Arrivai a Casti, ün clamet subit un chirurg tgi per fortuna se recattava da plü intgüns dis a Casti, e quel prendet il signur Gometti in cura. Zieva treis emdas il pazient saveva bandunar la stanza e far piçnas passeggiadas nel conturn del vitg, e l' emda sequenta ün il transportet a Lansch in casa del signur directur Morin, inua el voleva restar, fin che el hagi recuperada la forza per far il viadi a casa. Il soggiorn del signur Gometti a Lansch duret circa dus meins, e durant quest temps siu servitut Tgetg Caleira haveva suvent occasiun da visitar sia casa paterna a Sanagn.

La nova che seien arrivai a Lansch signurs da Plurs, faget prest la ronda tras las vischnaucas límitrofas et arrivet tandem er a Sanagn; ma Peder Caleira e sia familia non savevan, che lur car figl Tgetg sei arrivau cun quella compagnia. Ün di cur el lavurava sün siu funds sper la casa cun sia muglier e ses infants, els observettan ün cavalcant tgi veginiva da Mon vers Sanagn. Peder e sia muglier fagevan da totas sorts supposiziuns, tgi quest cavalier podessi esser et inua quel vögli cavalcar. Tranter Mon, Sanagn e Stierva non era giust üna via commoda per cavaliers, et els non se podettan regordar da haver vis üna gada ün cavalcant sün questa strada. Fratant che Peder e sia muglier discurrevan dal cavalier, quest ultim s' avicinet spertamein et arrivand el nella vicinanza del funds de Peder, donna Gnagna schet a schiu hum: „Ma mira, Peder, tgei bel e fresc giuven eis quest cavalier!“ Ma co s' instupittan tots dus conjugals, vezend che il cavalcant manet siu animal tras la porteglia che conduiva avant lur casa. Arrivau fin alla casa, il cavalier saglit da cavagl e fermet quel ad üna vera sper la porta della casa; allura el se volvet e jet cun pass rapids vers la familia tgi lavurava. Nella distanza da circa otg pass el traget sia capella e donna Gnagna clamet cun vusch vibranta: „Nos Tgetg, nos car Tgetg!“ Il proxim moment mamma e figl s' imbraçettan cun üna immensa tenerezza e las larmas saglittan alla mamma et al figl.

Passada la prima emozion la mamma demandet a Tgetg, havend quel dau il maun al bab et als fradegliuns: „Ma mi disch, miu car Tgetg, dinunder vens tü et allura amò a cavagl?“ Tgetg se mettet a rir e racquinet allura a ses geniturs il cas success cun siu patrun e che el se recatti uss a Casti, inua il patrun giaschi infirm. Ils buns geniturs deplorettan la disfortuna arrivada al patrun, sentittan però cun plaschèr, che lur ear figl hagi ussa buna occasiun da visitar la casa paterna. Ils buns geniturs fagettan ussa intrar lur figl in casa, e l' intèra familia era raspada alla meisa per tadlar il rapport del figl arrivau. Tgetg racquinet da Plurs, da ses buns patruns, dal bun tractament che el hagi in quella casa, co el hagi gia diversas gadas stoviu accompagnar il patrun in qualitat d' ün servitur sün ses viadis a Clavenna et a Como e tgei remarcabilitads el hagi vissas in quellas interessantas contradas e citads. O co se miravigliava tot la familia che il bun Tgetg, tgi haveva be 16 anns, haveva gia vis üna aschi granda part del mund! Ma tot in üna gada la mamma saglit in pei e schet: „Nus stein tots qua e tadlein las novitads de nos Tgetg et imblidein da gli porscher ün refresc! Mi disch, miu car Tgetg, tgei ti sai jeu portar che ti plaschess? Üna coppa cun latg forsa? Ne vol plü bugen ün toc carn secca?“

Tgetg respundet alla mamma, el hagi absolutamein nagut da bisögn, el sei stau pauc plü che üna mez' ura sün via e vegnivi giust dalla meisa. In summa Tgetg declaret che el vögli nagut et accepteschi nagut; sche el havessi fam u seit, allura el suppli cassi per inzatgeï, non essend quei però il cas, sche non possi el acceptar üna caussa. Vezend la mamma che que era da deçert al figl, ella non insistet da gli voler portar ün refresc. Tgetg declaret allura als geniturs, che el stoppi prest returnar a Casti, ma el sperì, che el sappi ussa suvent visitar la casa paterna, stante che el hagi er da pisserar per il cavagl de siu patrun e stoppi ogni di cavalcar inturn cun quel ün per uras per che el non daventi memia selvadi cun adüna star in stalla ad ün bun perseppen. El det allura il maun als geniturs et a ses fradegliuns, montet a cavagl e s' absentet. Quella visita in casa paterna el repetet diversas gadas, fin che siu patrun era amò a Casti; ma cur quel eis allura iu a Lansch; el non haveva plü tanta libertad e stoveva mintga gada, cur el voleva ir a Sanagn, demandar il patrun per il permess d' ascar far üna visita a ses geniturs.

A Lansch Tgetg haveva cattau siu frar Albert, il qual fageva uss er üna stupenda comparsa. Albert havet er üna granda allegrezza da vèr siu bun frar absent. Quels dus frars s' amavan cun üna granda tenerezza gia dal temps cur els amò eran a casa pro lur geniturs; questa amur fraterna non se haveva diminuida durant l' absenza da Tgetg. Uss ils dus frars eran tot il di insembel e fagevan communablamein lur lavurs e fagevan er plans per il temps ventur. Albert giavüschava er da cun il temps saver ir in terras estras, et ils racquints del frar augmentavan amò plü questa brama da cercar cun il temps sia fortuna in terras estras. Cur Albert stoveva mintgamai ir cun depeschas de siu patrun sün la muntagna pro las minieras, Tgetg l' accompagnava quasi semper e haveva er ün grand plascher da saver tener compagnia al frar.

Del reminent Tgetg haveva amò da far outras cursas per siu patrun. Ün di el reçevet da quel il command dad ir a Cuira cun üna charta. Il patrun il providet cun la necessaria moneida e giavüschet, che il giuven fetgi quest viadi a cavagl. Tgetg se vestit aschi propermein sco possibel era, dovend el visitar per la prima gada la capitala grischuna. El partit gia la damaun se quenta a bun' ura. Siu cavagl che haveva pausau ün pèr dis, travacava per la strada crapusa sco ün desperau et il giuven cavalcant il poteva a peina retener e diriger. Ad onfa della nauscha strada el arrivet in pauc plü che treis uras nella citad; el non se haveva negliur fermau, et il cavagl haveva ussa er scaçiada la frappa sün questa stentusa via. Nella citad el çerchet l' osteria, inua el voleva smontar; ma quei non era üna caussa aschi facila sco el haveva cret; el audiva qua discurrer tudesc et el saveva gnanc ün plaid de questa lingua, e non incuntrand nella strada üna persuna tgi saveva discurrer romansch u italian, el intret da porta sura e sortit da porta sut senza havèr cattada l' osteria. El volvet siu cavagl e returnet tras la citad per la medema strada et era già daventau üna persuna interessenta alla giuentüna della citad, la quala il sequitava e comenzava a dar gli da totas sorts titulaturas che el, per fortuna, non capiva. Tandem arrivet ün policist della citad e Tgetg s' adresset a quel il demandand, inua se recatti tala e tala osteria. Capind il policist ün pau il romansch, el manet il giuven cavalcant nella osteria nomnada.

L' ostier tgi saveva favellar romansch, det a Tgetg ün famegl, il qual in manet nella casa, inua el haveva da remetter la

charta de siu patrun. Havend il signur, al qual la charta era scritta, let ün per plaids e la suttascripziun, el se volvet a Tgetg et il demandet, sche el sei forsa il servient del signur Gometti, et affirmand Tgetg quei, il signur il faget intrar nella stanza de sia familia e commendet a sia schenta, da portar al giuven ester da mangiar e da bever. Tgetg faget tota honur alla carn et al schambun da Cuira e laschet er implenir ün pèr gadas siu bichier cun vin da Cuira, non savend che quel sei aschi ferm; ma zieva ün' urella el sentit che quel comenzava a dar nella testa e non laschet plü implenir siu bichier. Il signur vegnit allura in stüva e communichet al giuven, che passaregien bein aune circa duas uras, fin che el hagi prompta la resposta sün la charta de siu signur patrun. Sche que gli fetgi plascher, sche sappi el far üna passeggiada tras la citad e considerar las remarcabilitads de medema. Tgetg gli respondet che que gli fetgi plascher da cattar temps per ün gir tras la citad e sortit da casa per intraprender sia inspecziun della capitala. Ma zieva curt temps el sentit, che el non era ferm in camba, il „vin della terra“ che el non haveva conoschiu, comenzet a laschar sentir sia forza. La schenta tgi mava per strada, comenzava er già da far attenziun dellas curvas che il giuven fageva, et el sez se turpegiava da se recattár in quest stadi. El vacilet vers la porta della citad per sortir da quella e cercar inzanua ün lög, inua el sappi dormir ün moment. Observand ün aual el sequitet la cursa de quel, et essend lontan avunda dalla citad e non observand negün nella vicinanza, el faget bagn nel aual, e l' aua fresca de quel havet allura prest allontanada sia eivrezza.

Havend el già vis Como, el cattet a Cuira paicas caussas che gli fussen stadas remarcablas; perquei el faget be ün piçen gir tras diversas stradas della citad e visitet er amò la curt episcopala e returnet allura in sia osteria per mirar, sche siu cavagl sei regulau in urden. Prest zieva comparet il signur, al qual Tgetg haveva portada la charta, nell' osteria e gli remettet la resposta, la quala el haveva da portar a siu patrun. Il signur l' invitet da returnar cun el in sia casa per prender ün refresc, ma Tgetg declaret, el non hagi bisögn d' ün refresc, el se vögli uss metter in via vers Lansch per poder arrivar là amò da clar. Il signur gli raccommendet da bein conservar la charta de resposta a siu signur, essend quella da granda importanza. Allura Tgetg faget sellar siu cavagl è cavalchet rapidamein vers la „collina

della Forca“, comenzand ad ascender la muntagna. Il cavalcar a munt non era aschi stentus sco il cavalcar a vall, et el animet sia bestia dad ir ün ferm pass; ma il cavagl sentiva totüna ün pau il strapazz ded oz, e Tgetg capit, che el il stoppi laschar pausar a Churwalden. El intret in ün' osteria, prendet üna fracla vin a faget dar a siu animal ün minal aveina; ma gia zieva üna mezz' ura el continuet siu viadi, stante che la sera era arrivada. El passet Parpan in ün ferm pass e paucas minutas plü tard el arrivet all' altura della planüra da Lunsch. L' aura stava per se müdar et il firmament era cuvert cun üna grossa nüvlèra pesanta. Il clar del di svanit plaun a plaun, et avant che il cavalcant arrivi al lac vescovil, la notg era gia aschi stgüra, che il giuven a peina vezeva la via. Per siu spavent il comenzet a tunar da lontan e gia il proxim moment scalarit ün ferm cametg la contrada, al qual sequitet üna tunada cun üna tala squassada, che il cavagl s' intemorit e faget ün grand sagl. Tgetg stava per cupitgar e crodar da cavagl, podet però amò se tener al collöz de sia bestia. Il cavalcant se poteva avanzar be lentamein e stoveva semper temer da crodar dal cavagl; pertgei quel se spaventava quasi da mintga camegiada, teneva la testa ad ault, agüzava las oreiglias et era semper prompt da pigliar spuletz (spulezz). A Tgetg il vegnit indament da smontar da cavagl e da menar l' animal al frein; ma el temeva da non esser ferm avunda per poder tener sia bestia e che quella podessi allura ir a frusta in quella contrada selvadia. Ma sia situaziun dovet daventar amò plü seriusa e periculusa. Sclarind üna nova camegiada il terrèn da tala maniera, che ün havess saviu anquirir aguilas dal plaun, Tgetg observet sut ün gigant pin alla strada nauscha treis bandits cun barbunas, et ün de quels stendet gia siu maun per güffar il frein del cavagl; ma Tgetg alzet sia cravaçia e la laschet schüvlar sur la testa del bandit da tala maniera, che quel det ün sgriescheivel sbratg. Allura il giuven cavalcant det ils spruns a siu animal e quel jet inavant in terribels sagliots; Tgetg se podet a peina tener in sella; per sia fortuna el arrivet in paucs moments sün il cespet d' ün prau e laschet allura liber frein a sia bestia. Per fortuna el cattet prest puspei la via che era uss ün pau plü practicabla e vegnit ussa er spertamein inavant vers Lunsch. Üna mezz' ura plü tard el arrivet a Lunsch e se fermet ayant la casa, inua siu patrun Gometti habitava. Siu frar Albert il havevà gia da ditg aspectau e vegnit subit naprò per güdar a Tgetg da

metter in stalla il cavagl; vezend però che quel era bagnau fin alla pell dalla plövia, Albert schet, che el vögli haver cura per il cavagl e Tgetg dovei ir in casa.

Tgetg intret in casa e se faget annunciar a siu patrun, che el sei arrivau e prompt da gli render quint de siu viadi. Il patrun il faget subit intrar in sia stanza et il reçevet cun benevolenza. Tgetg faget siu rapport e consignet al patrun la charta da Cuira, la quala era bein ün pau muscha dalla plövia che haveva penetrada la vestimenta del giuven; ma signur Gometti la savet facilmein leger e se musset fitg content cun siu adester servient tgi haveva fatga sia commissiun a sia compleina satisfacziun. Tgetg reçevet dal bun patrun ün bel regal e füt allura licenziau. Havend siu frar Albert surpresa la cura per il cavagl, Tgetg jet cùn üna gada a letg, essend fitg strac e fatigau da sia greva cavalcada. La cuschinunza gli haveva amò voliu preparar üna geina, ma Tgetg non voleva çenar, schend che el hagi plü grand bisögn da ruasar e da dormir che da mangiar. Durant la notg el havet ün sgrischeivel sömi, nel qual el haveva da combatter ils bandits tgi il havevan voliu attaccar durant il temporal sün la planüra de Lansch.

L'autra damaun il signur s'informet plü detagliadamein del viadi de siu servitur, e quel gli racquinet allura siu incunter cun quels bandits sün la planüra de Lansch e co el se hagi liberau da quels tras ün brav colp cun sia cravaçia. Signur Gometti pigliet granda tema, audind questa aventura de siu fidel servitur; el capiva fitg bein, che Tgetg era stau in grand pericul da perder la vita et il cavagl. El laudet la curascha e sia presenza de spirt e la promtezza, cun la quala el se haveva liberau de quest grand pericul. El augmentet la buna mana dad ier sera cun aunc quatter cruschuns per mussar, co el apprezzieschi la valorusitat de siu servient. El det allura er amò il permess a Tgetg dad ir a casa in visita per dus dis, remarcand però che quei seregi l'ultima visita che el sappi far a ses geniturs, stante chè in paucs dis els se mettien in viadi per returnar a Plurs. Tgetg surdet allura per quels dus dis la cura de siu cavagl a siu frar Albert e partit vers la sera per Sanagn. El faget questa visita a casa per tant plü bugent, savend questa gada remetter a ses buns geniturs circa 20 renschs che el nel ultim temps haveva reçerts per buna mana per part da siu bun patrun, per part dad auters signurs, als quals el haveva stoviu far qualche serveç per command de siu patrun.

„Buna sera!“ clamet Tgetg sün l' üsch della cuschina a sia buna mama, tgi stava là per pinar la çeina alla familia; „vus podeis er giust cuschinar per mei, cara mamma; pertgei jeu hai il permess da star dus dis cun vus avant mia partenza per Plurs.“ La buna mamma respondet: „Tgei, tü es già prompt da voler partir per Plurs? Quei non fa giust tanta prescha da partir; vus podeis amò star ditg avunda a Plurs.“ Tgetg intret in cuschina et explicit a sia mamma, che il patrun vögli absolutamein partir per casa già ün dels proxims dis. Il patrun sei ussa guariu aschia che el facilmein possi far il viadi a casa; a Lansch el hagi negünas façendas plü et el brami er fitg da revèr sia cara familia. La buna Gnagna vezet, che sei qua nagut da far per obtener ün plü long soggiorn del car figl nella casa paterna. A Tgetg la moneida che el portava cun se per dar a ses geniturs, ardeva in sia giloffa et el la mettet nel maun della mamma. Quella non savet il prim moment, tgei quest pachet contegni; ma pesentand quel, ella capit prest che el contegni moneida d'argent e schet a siu car figl: „O miu bun Tgetg, tgei mi portas tü puspei?“ — Il figl faget avrir la mamma il pachet, e quella observet in quel 6 bels cruschuns glüschiints. Ella pigliet tema, vezend che siu figl era in ün temps aschi curt vegniu in possess de tanta moneida, e consideret siu amau figl cun üna trista ögliada. Ma Tgetg schet alla mamma: „Non fagei scrupel d' acceptar questa moneida, jeu la hai acquistada lealmein.“ El racquinet alla buna mamma minuziusamein co el sei vegniu in possess de quels bels cruschuns.

Mamma e figl intrettan allura in stüva e Tgetg salüdet ses fradegliuns tgi se recattavan in davos meisa, e paucs moments plü tard arrivet il bab de familia in stüva e salüdet siu figl. Havend Peder pendiu sia rassa de pavlunz ad ün' aguta, l' intéra familia se mettet a meisa e donna Gnagna portet dalla cuschina la çeina, üna brava buglia e duas coppinas cun latg, e la mettet a mezza meisa. Zieva il benedicte la familia çenet cun bun appetit, ma senza far grands discurs, e pür zieva l' agimus començet allura la conversaziun tranter ils geniturs et infants. La principala persuna era questa sera il Tgetg, il qual haveva bler da racquintar, specialmein da siu ultim viadi a Cuira. Quala tema pigliettan ils brav geniturs, cur lur figl als racquinet da siu inconter cun bandits sün la planüra de Lansch. Ils buns geniturs advertittan lur car figl, da semper esser precauzius,

cur el sei in viadi, postut cur el hagi da passar contradas italianas.

Il di sequent Tgetg jet a Mon a messa e faget allura amò üna visita a siu pàdrin, a sia madriçia et ad intgüns parents e conoschents. El haveva ün presentiment, sco sche el stovess bandunar per long temps questa contrada. Zieva mezdi el jet allura a Stierva per dir vale ad ün' anda tgi el amava zun fitg. L'auter di el ascendet la muntgagna e jet fin a Ziteil. Essend il giuven ün fresc pedunz, el arrivet gia a casa inturn mezdi; el voleva amò restar ün pèr uras in compagnia de ses cars geniturs e fradegliuns; el saveva che el amò quella sera stoveva arrivar a Lansch, inua il patrun l' aspectava. Quellas ultimas uras eran grevas per il bun giuven; el vezeva la mamma in larmas, il bab fageva üna çera trista e ses cars fradegliuns havevan persa lur hilaritat. Tandem il bab stovet amò se render sùn il culm; el strenschet il maun de siu car figl e bandunet in vezibla tristezia la casa. L' ura della partenza arrivet e Tgetg s' alzet, squasset il maun a ses fradegliuns tgi eran presents, et imbraçet allura sia cara mamma cun impetuositad, sentind üna granda dolur da stover bandunar casa. La mamma era bagnada in larmas e schet cun vusch interruttu da singlotts al car figl: „Neve, miu car figl, tü mi restas semper prob e pietus in terras estras! Pensa adüna a tiu dover e non imblida las admoniziuns che tes geniturs ti han dadas. Conserva in prima linea üna buna morala e non fai caçia per beins terresters a dann e cust de tia conscienzia! Resta semper brav, miu car Tgetg, e te recorda de nus!“

Tgetg se faget tandem liber dal abbraçiamént della cara mamma e sortit da casa mez mort del cordöli che questa scena del comigiau gli haveva fatg. El jet cun pass rapids inavant, e paucas minutis plü tard la casa paterna era svanida da vista. El arrivet pür da notg a Lansch e reçevet amò quella sera da siu patrun il command da se preparar alla partenza per il di proxim. Il giuven faget amò quella sera inspecziun sur ils effects del patrun, ils quals eran da prender a Plurs. Cur el havet preparau tot per la partenza, el jet amò a visitar siu frar Albert in casa Morin. Ils dus giuvens discurrettan ditg da lur geniturs e fradegliuns a Sanagn e fagevan plans per l' avegnir. Albert exernet il giavüsch dad er vegnir a servir a Plurs u in ün auter lög in Italia; el credeva che l' exteriur gli porti fortuna. Er el se haveva instruiu fitg bein a Lansch, havend er el, sco haveva

hagiu siu frar, l' occasiun da frequentar la scola cun ils infants de ses patruns. Et el se haveva profitau de questa buna occasiun, acquistand tras sia diligenza e perseveranza bellas conoscenzas nel art de leger e scriver. El era uss avanzau in quellas scienzias in maniera che el se podesse perfeczionar in quellas er senza l' agüt d' ün magister. Tgetg l' animet dad er imprender ün pau la lingua italiana, havend el occasiun da discurrer quella cun ses patruns e cun ils infants de medems. Ma Albert musset immediatamein al frar che el sappi ün pau questa lingua, çiançiad ün pau italian cun el. Tget vezet che il frar haveva già ün bel principi in questa lingua et accorschet er, che el haveva üna bona pronúncia italiana.

Il di sequent signur Gometti partit da Lansch a cavagl; ma havend acquistai tants effects novs durant siu soggiorn a Lansch, che Tgetg non ils podesse portar, il patrun prendet amò ün cavagl da Lansch cun se insembe cun il patrun de quel tgi doveva allura haver il quitau (pisser) per l' intèra bagascha del viagiatur. Tgetg faget l' intèr viadi a pei, e quei gli plaschet il meglier, essend el ün excellent pedunz. In treis dis questa caravaneta arrivet saunamein a Plurs, inua ella füt reçerta cun grand plascher. Ma paues dis plü tard Tgetg stovet accompagnar siu patrun fin a Como, inua quel se faget visitar dad ün renommau doctur, sche sia ruptura sei medegada indretg; pertgei dal chirurg tgi il haveva tractau a Casti et a Lansch, el non haveva üna tant granda fiduzia. Ma per sia acquietaziun il doctur da Como declareret, che il chirurg hagi medegada la ruptura in urden tenor las reglas della chirurgia. De quei il bun signur Gometti se contentet e s' allegret e returnet da buna vöglia a Plurs cun siu servitur Tgetg Caleira.

A Plurs regeva da quel temps üna granda vivacitad. Il grand guadagn fatg ils dus ultims anns nellas minieras a Lansch haveva desdau ün spirt de speculazion nels Plurases, volend quels far fructifers lur grands capitals che surpassavan ils bisögns dell' agricultura de lur contrada. Divers signurs da Plurs eran in viadi tras la Lombardia per cercar qualche convenabel affar e saver métter lur moneida in moviment. Er il signur Gometti tgi era forsa il plü rich citadin da Plurs, füt infectau da questa febra e planisava dad ir a Bergamo a cercar üna congiuntura da s' acquistar qualche negozi u affar correspondent a siu gust. El füt però ils dus primi anns impediù tras diversas façendas d' intraprender il viadi projectau. Ma l' ann 1612 el pigliet curascha d' exsequir siu plan, et accompagnau dad ün de ses figls e da

Tgetg el partit la primavèra per Milaun. Fin a Colico el era viagiau cun sia propria carroçia; là el s'imbarchet per Como. In questa veglia citad el non cattet quei che el cercava; ma quei gli era indifferent, stante che la citad de Como non gli plascheva tant bein. El jet zieva ün pér dis inavant et arrivet in dus dis a Milaun; ma er in questa citad el non cattet ün affar che gli havess plaschiu. Havend godii ils plaschers de questa pompusa citad durant circa duas emdas, el bandunet Milaun e viaget a Bergamo. In questa citad el cattet zieva paucs dis conoschents della Bregaglia, tgi havevan qua lur flurints affars de seida, ils quals plaschevan benissim a signur Gometti. El se persvadet che quels affars rendien bun quint e s'associet cun ün negoziante de seida tgi era ün Italian, il qual però ils conoschents de signur Gometti tenevan per ün hum prob e galant. Tenor il contract stipulau signur Gometti stovet furnir al negozi ün capital da 80,000 renschs. Supra de quei doveva almeins ün member della familia Gometti habitar a Bergamo e se participar della direcziun e survigilanza del affar. Il contract doveva intrar in vigur gia il proxim Avust e Gometti s'obliget da gia in ün meins remetter al negozi 40,000 renschs.

Havend fatg quest contract, signur Gometti se preparet subit al return in sia patria per promptamein far liquidas las summas che el haveva da remetter a Bergamo sco soci del affar. El destinet er subit siu prob servient Tgetg Caleira per il negozi et ordinet, che quel dovei gia ussa restar a Bergamo, fin che el et il figl returnien a Plurs per prender las necessarias disposiziuns per il futur. Tgetg se declarer prompt da corresponder al giavüsch de siu bun patrun e restet dunque a Bergamo, che gli plascheva fitg. Immediatamein zieva la partenza del patrun el intret sco assistent nel negozi del patrun e se det tota stenta d'imprender las bleras caussas novas cun grand zeli e diligenza. Il Bergamasc, il soci de siu patrun, observet subit, che Tgetg era ün svelt et adester giuven e haveva siu plascher cun el. Perquei el il prendet in casa sia, non volend che l' excellent giuven vegni forsà innocentamein in nauschas compagnias corrupt, sco quei daventa suuent cun giuvens in terras estras, inua la morala non stat adüna sün fermas cambas. Tgetg se sentit fitg fortunau in casa del signur Vertugli; aschia se nomnava il soci de siu patrun. Vertugli haveva er üna bella familia, dus scorts figls e treis bellas e properas figlias bein educadas. Tgetg cattaya dunque

in temps de vancanza semper üna buna et agreabla recreaziun a casa e non sortiva la sera per ir a cercar auters compagns. El haveva er in questa casa buna occasiun de se perfeczionar nella lingua italiana; përtgei la familia Vertugli non discurriva il dialect bergamasc, dimperse ün italian correct. Er cattet Tgetg in questa casa üna bella e buna bibliotheca italiana che gli stava a sia disposiziun tenor siu plascher; et el fageva er bun adöver de quella. El legeva e s' instruiva ogni di plü u meïns, e siu gust per la lectura, cun la quala el a Plurs pauc se haveva occupau, creschet meins per meins. Ils dus figls del signur Vertugli, Giovanni e Pietro, eran circa della medema etad del Tgetg e havevan godidas bunas scolas; quels dus excellents giuvens havevan er lur plascher cun il bel e bun giuven ester e l' assistevan in totas caussas, nellas qualas Tgetg haveva bisögn d' agüt. Cur Tgetg non capiva inzatgei della lectura, el s' adressava a ses dus amitgs Vertugli, e quels gli declaravan tot e l' instruivan cun grand plascher. Aschia Tgetg se sviluppet a Bergamo benissim. Er nel affar el se musset fitg diligent et adester. Il prim il signur Vertugli il faget conoschent cun la mercanzia e cun tot ils articuls del negozi. Havend il giuven üna gada üna buna idea de quellas caussas, ün l'occupet nel comptoir u „lo studio“, sco ils Bergamascs schevan, e qua Tgetg stovet percurrer tot las diversas lavurs de scriptura. Quei gli det bein blera stenta e bler da studiar, ma el non ruaset, fin che el haveva superadas totas difficultads, et el daventet, a proporziun in fitg curt temps, ün bun comptoirist a compleina satisfacziun del principal.

Signur Gometti haveva punctualmein remessa al affar a Bergamo sia prima quota da 40,000 renschs tras casas de commerci che stavan in correspondenza cun Bergamo. Nel meins d' Avust el comparet sez cun siu figl a Bergamo cun la seconda quota da 40,000 renschs. Gometti non era intenzionau da star ditg a Bergamo; ma siu figl Cesare doveva restar là e daventar ün negoziant. Er il giuven Gometti se musset fitg adester nel affar et imprendet in curt temps las lavurs che ün pretendeva dad el. Vertugli exernet al bab Gometti sia compleina contentezza cun Tgetg. Zieva ün meins signur Gometti returnet a Plurs plein da speranza da haver fatga üna buna speculaziun, s' associand cun signur Vertugli. Siu figl Cesare e Tgetg Caleira restettan dunque a Bergamo et imprendettan là perfectamein las lavurs de negoziants. Zieva ün mez ann Vertugli als saveva confidar

scodüna lavur e saveva, che el se podava fidar dels dus giuvens. Il negozi fluriva excellentamein e rendeva bunissim quint als socis. Essend ils dus giuvens Cesar e Tgetg conoschents cun l' intèr negozi, signur Vertugli ils laschet er far viadis per il negozi; els mavan per là Lombardia inturn, comprand las galettes de seida dals divers contadins tgi s' occupeschan cun la cultura de seida. In questa maniera els füttan prest conoschents cun la terra e cun ils habitants de medema. Specialmein Tgetg se daya granda fadiglia da studiar indretg tot ils avantatgs de siu commerci e da vegnir conoschent cun tot la schenta. El capit fitg bein, che siu patrun et il signur Vertugli stoppien far grandiudas façendas. Sün ses viadis el imprendet er da conoscher amò auters affars in questa terra fructifera, et el fageva er già plans da sez fondar qualunque affar per saver lavurar a siu quint, capind fitg bein che el mai non possi arrivare ad üna beinstanza in qualitat d' ün impiegau. Dintant haveva üna fondaziun d' ün affar sias grandas difficultads. El non era in possess da blers danèrs, perquei che el semper remetteva sia paga quasi intèra a ses buns geniturs tgi havevan bisögn de siu susteniment. Ma üna caussa el era fermamein intenzionau da far, nempe dad er procurar üna plazza a siu frar Albert in Italia. Daplü che el era vegniu a Bergamo, haveva signur Gometti pres l' Albert a Plurs, inua quel stava fitg bein e bugen. Tgetg haveva animau siu frar da se profitar dalla scola, la quala el haveva occasiun da frequentar a Lansch cun ils infants del patrun Morin. Et Albert obedit bugen al consegl de siu car frar; el haveva plascher da s' instruir et impundet tota diligenza per s' acquistar las conoschenzas e habilitads, las qualas sun necessarias per la vita. Er a Plurs el continuet da s' instruir, havend qua amò megliera occasiun da se perfeczionar nellas scienzias de scola. Tgetg scriveva beinduras üna charta ad Albert, et in tot quellas chartas el l' incitava da continuar nel studi. Et Albert tgi haveva er fitg buns talents, fageva tot siu possibel per contentar siu car frar. El respundeva a Tgetg, e quest ultim se persvadet tras las chartas del frar, che sias incitaziuns non seien stadas invanas.

Cur l' ann sequent signur Gometti vegnit in visita a Bergamo, Tgetg pigliet curascha e supplichet siu patrun dad er laschar vegnir siu frar Albert a Bergamo per imprender il negozi. Signur Gometti gli respondet: „Jeu perda nuides tiu frar Albert, essend quel ün giuven stupend, del qual ün se po fidar in totas caussas.

Dintant per ti far ün plascher, jeu vögl trametter l' Albert a Bergamo, aschi prest sco jeu hai cattau ün auter servient per mia casa, il qual mi plascha e coven. Jeu sai bein, che ün sa adovrar l' Albert per inzatgei meglier che be per ün servient de casa; el ha talent, eis spert et adester e sa er scriver e leger bein per ün giuven tgi ha fatg be aschi paucas scolas. Jeu vögl er discurrer cun il signur Vertugli, che el dovei impiegar tiu frar in nos affar, e jeu sun persvas che el fa quei fitg bugen, conoschend tei per ün giuven da vaglia.“

Tgetg se contentet cun la resposta reçerta, savend che siu patrun era ün hum tgi stava da plaid. Et in verdad, ün quart ann plü tard comparet Albert inaspectadamein a Bergamo per grand plascher de siu bun frar Tgetg. El portet cun se üna raccomendaziun de siu signur patrun Gometti a signur Vertugli, e quest ultim impieget il giuven cun plascher, havend giust bisögn da novas forzas nel affar. Quei che Tgetg haveva aschi vivamein desiderau, era uss daventau; el haveva uss siu car frar Albert sper se a Bergamo, et el era ussa plein da speranza da cun il temps forsa vegnir patrun d' ün propri affar cun agüt del frar. Albert se musset nel affar fitg adester e diligent, da maniera che el nel decurs d' ün ann era habel da far qualunque lavur nel negozi e nel comptoir. Tgetg il haveva instruiu cun la plü granda premura in tot ils rams del negozi, et Albert haveva er plascher e zeli d' imprender tot sias lavurs in urden. Er el füt reçert nella familia Vertugli sco ün figl della casa et era contentissim cun il tractament in questa casa.

Fratant che ils dus frars Caleira prosperavan e flurivan, il Cesar Gometti fageva üna trista figura. Ils dus prims anns de siu soggiorn a Bergamo el era stau ün fidel compagn de Tgetg e dels dus figls della casa, Giovanni e Pietro. Quels quatter giuvens e las treis figlias della casa, stupendas giuvnas bein educadas, formavan üna bella societad da dis de vacanza, da festas e domengias. Tandem però Cesar comenzet plü suvent a bandunar la casa la sera e da frequentar outras societads. El daventet allura plaun a plaun bler plü indifferent nella lavur, era suvent distrac e fageva beinduras tot il contrari de quei che el haveva da far. Tgetg observet quei e l' admonit cun tota discreziun, ma senza success; anzi Cesar se mussava plütost indignau, che ün impiegau de siu bab prendi la libertad dad il voler correger et admonir. El evitet tant seo possibel la

compagnia del Tgetg e passava per sias proprias vias. A Tgetg displascheva quest contener de Cesar, et el se sentit obligau da dar part al bab Gometti, che siu figl Cesar se hagi totalmein müdau. El scrivet tandem üna charta a signur Gometti, nella quala el descrivet il contener de siu figl; el gli relatet er, che quest müdament del Cesar stetti probabilmein in connexium cun lás compagnias e societads las qualas el suvent frequenti. Il bab Gometti arrivet ün meins plü tard a Bergamo, capind fitg bein che el non seregi in cas da correger siu figl be tras chartas. El s'intemorit, vezend la figura che fageva siu figl tgi era stau aschi flurint, cur el bandunet la casa paterna. El il prendet subit in examen per comenzar la cura cun el; ma Cesar se contenet aschi indifferent vers las admoniziuns del bab, che quest ultim pigliet la resoluziun da prender a Plurs il giuven per in questa maniera l'allontanar dels periculs che gli sminaçiavan. Be nuides accompagnat Cesar siu bab a Plurs, inua el doveva far pönitenza per ils excess commess a Bergamo. Cun Tgetg e siu frar Albert signur Gometti se musset contentissim, havend siu soci Vertugli dau a quels ün bunissim attestat, tant per lur exemplara conduita, sco er in rapport a lur diligenza e capacitat nel negozi.

Ils dus frars Caleira eran fitg lets, che lur compagn Cesar era repatriau; els havevan hagiü be displaschers cun quel nel ultim temps; schi els se turpegiavan de lur giuven patrun da Plurs, perquei che el non se deportava plü sco ün giuven decent gnanc in casa del signur Vertugli. El haveva fatgs divers affrunts allas signorinas Vertugli, da maniera che quellas l' evitavan, cur quei las era possibel. Tant plü grand respect però ellas havevan pér Tgetg et Albert, ils quals sper lur lavorusitad, capacitat e diligenza mussavan üna conduita exemplara. Ils dus frars Caleira eran dus giuvens, sco tals ün da rar vezeva a Bergamo, ils quals però non s' insuperbivan pervia de lur preferenzas, anzi els eran e restettan semper modests e gentils. Quei plascheva all' intèra familia Vertugli, specialmein er allas figlias tgi non eran indifferentas per ils excellents giuvens. Las relaziuns per ils Caleiras eran dunque fitg agreablas in casa Vertugli, et els se mussettan er adüna digns dell' affecziun che ün als demusava in questa bella familia.



IV.

Tra l' agüt dels dus figls a Bergamo la familia Caleira a Sanagn era daventada ün pau plü possenta. La moneida che ils figls havevan tramessa a lur cars geniturs, queste ultims non havevan dissipada, dimperse els la havevan applicada per comprar funds. A Mon era morta üna vidua tgi era stada nativa dalla Surselva, et ils parents de medema havevan vendii tot ils beins giaschents dell' anda. Peder Caleira era da quel temps in possess d' üna discreta summetta e l' applichet per la compra de quest funds venal. El haveva cun questa occasiun comprau intgüns praus e dus èrs et üna piçna accla giaschenta sün il territori da Stierva. L' augmentaziun de sia campagna faget necessari dad er ingrandir il muvel; ma havend applicada tot la moneida per l' acquista dels beins, la moneida manchet a Peder Caleira, et el stovet, non volend far debits, spetgar fin che ses figls tramettien üna nova quota de moneida. Peder haveva uss lavur plü che avunda cun sia öconomia, non essend plü sia familia aschi granda. Siu terz figl creschiu cun nom Paul e la figlia Mengia, la quala era la veglia de sias figlias, se recattavan a Lansch in serveç; il quart figl e las duas figlias plü giuvnas eran bein amò a casa; ma quels treis infants eran aunc d' üna tala tenera etad, che els non savevan substituir ils geniturs in totas lavurs. Els güdavan però a lur buns geniturs, inua els savevan e podevan per als levgiar lur stentusa vita. Paul e Mengia servivan tots dus a Lansch in casa del signur Morin e guadagnavan er qualche moneida. Havend quels dus fradegliuns audiu dalla compra che lur bab haveva fatga, els capitton fitg bein, che il bab hagi bisögn da moneida per comprar bestiam, e reçevend els ün tempset plü tard lur pagaglias, els se consigliettan d' imediatamein portar lur moneida als geniturs. Paul ingrandit questa summetta, unind cun quella tot la moneida che el haveva reçerta üna gada u l' altra per buna mana. In questa maniera ils dus fradegliuns havevan raspada la summa da 24 renschs, la quala Paul üna sera portet a Sanagn a ses cars geniturs. Peder e Gnagna ingraziettan a lur buns infants per quest bel susteniment, e Peder schet a siu figl Paul: „Tot quei che vus spargneis e remetteis a vos geniturs, vus cattereis ün di in forma d' ün fondo, che vus serà util per vos avegnir.“

Cun questa summetta Peder savet comprar üna vacca et üna sterla et augmentet aschia siu muvel per dus tgaus. In sequit el augmentet ann per ann il numer de siu muvel e dopo paucs anns Peder Caleira possedeva 8 bellas vaccas, intgüñas trimas blera sterlamenta, cauras e nursas. El era, sco ün sola dir, ün hum fatg e comenzet er a haver qualche influenza pro ses convischins. La primavéra proxima ün voleva er metter Peder nel magistrat; ma Peder non acceptet negüns officis; el saveva bein avunda, che quella favur valeva plü a siu muvel che a sia persuna. El haveva plü vis et amò plü audiu, co ün in bleras vischnaucas et in divers circuls metta sün il thron l' ignoranza, perquei che ella eis richa, et ignorescha suuent la prudenza e l' adestrezza, perquei che ella ha üna nauscha capella.

L' ann 1618 era arrivau e portet divers eveniments da sgrischur. In diversas contradas se musset danovamein la pesta cun ün fitg nausch character; tgi la pigliava, quel era pers; ma per fortuna ella non se deraset fitg. Er in intgüñas valladas grischunas ella se haveva mussada, ma pareva dad esser be sporadica. Dintant il pövel era da pertot in granda tema et implorava da Deus misericordia cun orar e far bunas ovras. Da quel temps passavan er da totas sorts vagants tras nossas valladas e vischnaucas, parlërs, molets, zigeuns et autra genüra. Quella schenta soleva specialmein er da frequentar casas isoladas e piçens acclauns, inua ün temeva fitg similas bandas. Tot quella razza vaganta viveva a dann e cust della terra, u cun rogar l' almosna, u cun involar et ingannar ils contadins. Dalla Domlesca passet üna tala banda de vagants il „crap s. Gian“ e Motta et arrivet er üna sera fin a Sanagn e campet là nellas ruinas de duas casas arsas. Peder Caleira non haveva grand plascher de quels nauschs hospes e se resolvet da star all' erta, per che la banda non gli involi inzatgei, u occasioneschi forsa qualche dann a ses edificis. La banda consisteva in humens e femnas et infants quasi del tot nüds. Intgüns de quels bandits eran er vegnii nel serrar notg in casa da Peder a rogar per diversas caussas. Peder als det üna bella almosna per se deliberar da quels schanis tgi sagevan çeras fitg suspectusas. A peina che quella schenta era sortida da sia casa, el fermet la porta della casa e jet in sia stalla per mirar, sche quella bragada hagi forsa l' intenziun da pernottar in siu clavau. Essend la notg arrivada, la quala era fitg stgüra, ils vagants fagettan ün föc e comenzettan a sunar et a ballar

tranter pèr da tala maniera, che ün havess podiu crèr, il barlott se hagi raspau questa notg a Sanagn. Da speras ils vagants banchettavan e mangiavan e bevevan, sco sche els havessen da celebrar üna perdunanza.

Essend Peder returnau dallà stalla in casa, el non se disvestit per ir a letg, dimperse el vigilet in sia stüva sper üna fenestra, dalla quala el podesse vèr ils göcs della banda. La festivitat dels bandits duret fin la damaun, cur il di comenzet a spuntar. Tandem ils vagants fagettan ün nov föc sper üna caglia e Peder non saveva declarar, tgei che quels schanis intenzioneschien da far; ma el savet prest contentar sias miraviglias. Duas femnas s' avicinettan al föc, l' üna cun üna granda padella l' altra cun üna granda coppa implenida cun pasta. La padella, füt messa sur il föc sün ün alar e conteneva ün grand toc grass; a peina che il grass era cauld e liquid, l' altra femna mettet la rara pasta nella padella per cuschinlar üna pultrostrida (taç, pulzani). Dus humens pigliettan allura las caglias storschiblas sper il föc e las tenettan nella pasta della padella, truschand cun quellas amò la pasta. Zieva ün' urella els laschettan libras las caglias e quellas, causa lur elasticitat, saglittan ad ault cun la pultrostrida a lur manzinæ. Ussa il det üna risada phrenetica tranter ils vagants, et els saglivan, saltavan e ballavan inturn la caglia, sco sche els fussen or da senn. Ma subit els fagettan allura lur fagott e bandunettan il lòc de lur solazz, caminand a güvland e cantand vers Mon.

Essend la banda ün brav toc distanta da Sanagn, Peder Caleira jet pro la caglia per vèr meglier, tgei spergaments quels bandits hagien fatg inturn quella. El vezet qua pender üna bella e grassa pultrostrida allas frastgas et alla föglia della caglia e capit er fitg bein, che quella banda hagi cun quest excess voliu far beffas cun contadins, dals quals els havevan rogau u involau la materia da far quest göc impertinent. Racquintand allura d' ansolver a sia familia tgei sei success questa notg a Sanagn e qual adöver quels vagants hagien fatg dallas almosnas reçertas da humans beneficents, donna Gnagna non voleva crèr che existessen talas bestias tranter ils humans; ma Peder la manet insemlamein cun ses infants pro la caglia, e Gnagna vezet che siu mariu non haveva racquintadas be phantasias. Ella tramettet allura üna dellas figlias in sia cuschina per üna sadella e faget metter la pultrostrida in quella per paschentar cun quella ses glimaris de casa.

Cur Peder Caleira la proxima domengia racquinet a Mon da quels excess dels vagants, il prim ün non gli voleva crêr; ma ün hum vegl da Mon schet, che seien gia avant blers anns success simils excess da part da quellas bandas de vagants, e che ils contadins d' üna vischnaunca hagien üna gada pigliada üna tala banda e bastunau humens e femnas tenor merit per haver fatg üna tala scrocaria. Curt temps plü tard se deraset la fama, che sei arsa üna casa a Marmorèra e che quest incendi probabilmein sei stau occasionau tras excess d' üna banda de vagants, tgi se havevan campai là üna notg e fatg da totas sorts extravaganzas.

Las lavurs campestras mavan quel ann be lentamein inavant; l' aura era consecutivamein humida e favoreivla per la creschenza dels frûts de campagna, ma per fenar e raccoltar ella era nau-schissima, e perquei ün vegniva mai alla fin cun las lavurs campestras. Quest ann Peder Caleira haveva saviu ir pür ils 20 d'Avust in siu primaran a fenar, dunque circa desch dis plü tard che auters anns normals. El haveva bandunau Sanagn et era iu cun sia intèra familia sün la muntagna, sco quei che el ogni ann soleva da far. Gia ils 25 d' Avust comparet ün di ün bel signur giuven a Sanagn. El s' avvicinava cun cor battent alla casa de Peder, e cattand quella serrada, el spluntet, sperand che inzatgi gli avriregi. Ma tot spluntar era invan; il signur jet nella stalla vicina per mirar, sche el catti là inzatgi della familia; ma er la stalla era vöda. Quest signur però era negün auter che il Tgetg Caleira, il figl da Peder. Il gli displaschet fitg da non cattar ses geniturs e fradegliuns a casa; ma zieva haver reflectau ün moment, il gli vegnit indament, che ses geniturs seien forsa amò occupai cun fenar nel primaran. El se resolvet dunque d' ascender la muntagna per ir a cercar ils geniturs, et el se mettet subit in via. Conoschend el amò ogni trutg che manava nels primarans, el arrivet in circa 40 minutias al primaran de siu bab. El observet gia in intgüna allontananza diversas persunas, tgi rastellavan il fein e fagevan runellas e panuglias. El s' approximet adascusamein alla seiv del primaran e se zuppet aunc ün moment davos üna caglia per spiunar, tgi lavuri nel primaran; el conoschet subit il bab et il frar; ma sias duas soras, tgi eran stadas be piçnas avant otg anns cur el bandunet la casa paterna, el non conoscheva plü. La mamma el non observet nel primaran et el supponeva, che lezza seregi probabilmein in tegia per preparar üna merenda als fenunzs. El se retirit ün pèr pass e jet per il trutg

che manava dal auter maun alla tegia senza esser observau dals lavurants nel primaran. Arrivau alla tegia da vart sura, el sentit ün piçen fracass in tegia. El s' avicinet tot adascusamein al üsch della tegia e l' avrit, ma observet negün in tegia; ma l' üsch del cellèr era avert. El intret in tegia. In quest moment comparet donna Gnagna alla porta del cellèr e surstet da ver in tegia ün signur ester. Ma Tgetg non haveva il cor da giocar la rolla d' ün ester cun sia cara mamma, et el clamet: „Mamma, mia cara mamma! non me conoscheis vus plü?“ Nus non volein descriver questa commoventa scena del revèr tranter la mamma et il figl. Alla mamma curriwan las larmas d' allegrezza et il figl teneva imbraçiada la cara mamma sco sche el temess da perder la, sche el la laschass libera.

Passada la primaemoziun, la mamma demandet a Tgetg, sche el hagi già salüdai il bab et ils fradegliuns nel primaran, e schend Tgetg, el hagi il prim voliu salüdar sia mamma e se hagi adascusamein avicinau alla tegia senza esser observau dals fenunzs, la mamma schet, ella clami uss il bab et ils infants a merenda. La mamma avrit allura subit l' üsch della tegia e clamet pro a sia familia: „Ve, Peder e vegni vus cars infants a merenda, la quala vus plascherà oz extra bein!“ Ils lavurants apusettan lur rastells e trivorçs allas runellas et obedittan subit al invit della mamma. Il prim intrettan las duas mattellas in tegia e zieva ellas il figl. Quels treis fradegliuns fagettan ögls gross, vezend ün signur ester in tegia sper la mamma; ma quella als schet: „Vus non conoscheis, sco il para, quest giuven e totüna eis el vos parent. Indovinei tgi el eis!“ Il mat e las duas mattinas considerettan il hosp ester cun granda attenziun, ma non il conoschettan. Allura Tgetg als schet: „Vegni, jeu sun vos frar, vos Tgetg, il qual eis stau aschi ditg absent in terras esteras!“ El imbraçet allura ses fradegliuns et ils carezinet cun la tenerezza d' ün ver frar. In quest moment intret allura er Peder in tegia et observet questa scena de beneventazion. El conoschet subit siu bun figl et il beneventet cordialmein. Tgetg se stovet allura participar della merenda, il che el faget fitg bugen, stante che el quest di haveva amò mangiau quasi nagut. O co gli gustava il latg bugliu che la buna mamma haveva serviu alla familia!

Zieva la merenda Tgetg declarer a ses geniturs, el stoppi per questa sera returnar a Casti, stante che el hagi laschau là

siu fagott. Ils geniturs schettan, els sperien da l' auter di finir cun il fenar e sappien la sera returnar a Sanagn. Tgetg declareret, el vögli questa notg restar a Casti, allura damaun far üna visita a signur Morin, siu prim patrun a Lansk et a ses fradegliuns Paul e Mengia; la sera el vögli allura returnar a Sanagn. El det ussa comgiau als geniturs e fradegliuns, volend aunc arrivar da di a Casti. L' autra damaun zieva la colaziun el jet dunque a Lansk. Siu vegl patrun e sia familia sco er il frar Paul e la sora Mengia non conoschettan al principi lur hosp, e Tgetg se stovet sez presentar all' intèra familia. Tots havettan ün grand plascher de questa visita e Tgetg füt reçert in casa Morin sco ün member de familia; el portet a signur Morin blers salüts da Clavenna e da Plurs e la lagreivla nova, che signur Gometti da Plurs intenzioneschi da fär il proxim autun a Lansk üna visita. Tget stovet allura er racquintar da Bergamo e specialmein dal affar de seida, nel qual el era activ. Tot quellas novas interessavan zun fitg il signur Morin. Er el racquintet a Tgetg dallas façendas dellas minieras al Piz coçen, e co la societat fetgi quest ann buns affars, essend che las minieras seien quest ann plü ubertusas che mai. Morin invitet allura Tgetg da voler vegin zieva mezdi cun el pro las minieras; ma Tgetg se stgüset, schend che el hagi impromess a ses geniturs da questa sera vegin a Sanagn. Signur Morin se musset fitg mal content, che Tgetg vögli gia oz bandunar Lansk et il supplichet instantamein da returnar ün auter di a Lansk per üna plü longa visita. Tgetg impromettet quei, e zieva haver passentau ün agreabel di a Lansk cun la familia Morin e ses fradegliuns, el returnet a Casti per aunc quella sera ir a Sanagn.

Cur Tgetg quella sera arrivet a casa, el cattet ils geniturs e fradegliuns a casa, havend quels ussa finiu da fenar lur primaran. La valisch che el portava cun se, pareva dad esser fitg pesanta. Et in verdad, ella conteneva er bleras et importantas caussas. Alla cara mamma el mettet nel scusal üna bella bursa emplenida cun pezzas d' aur, schend: „Quei eis per vus cars geniturs, e jeu spera che vus saveies bein applicar in vossa öconomia quella moneida. Albert e jeu la havein spargnada per saver sustener noss cars geniturs, als quals nus havein d' ingraziar tant del böñ. Sche nos affar a Bergamo prosperescha inavant sco fin ussa, allura nus sperein da ogni ann vus saver remetter üna bella summetta, stante che nus essan bein salarisai in nossas

plazzas; nus sperein aschizun da cun il temps forsa saver fondar ün propri affar cun nos guadagn e cun susteniment de buns amitgs.“ Bab e mamma ingraziattan a lur bun figl cun larmas nels ögls per il bun agüt che el als haveva gia portau avant e per il bel regal che el als haveva remess oz; ma Tgetg als schet, che el et il frar Albert non hagien fatg auter che lur dover, remettend a lur buns geniturs ils früts de lur lavur. E se volvend vers ses fradegliuns plü piçens tgi eran presents a questa bella scena, el schet, el sperì che er els ün di, cur lur forzas seien creschidas, improveregien da sustener ils cars geniturs e da preparar a quels üna bella sera de lur dis. El prendet allura dalla valisch per scodün de ses fradegliuns ün regal che als faget granda allegrezza.

Quant divers eis suvent il contener della giuventüna del temps present da quel dels frars Caleira. Quants giuvens e quantas giuvnas applicheschan oz in di lur guadagn de grevas uras be per divertiments mundans e per s' ornar cun lustrign da pauca valur. Ils giuvens curran per las osterias, se participeschan de luxurius tramagls senza pensar de lur geniturs tgi suvent ston patir della paüpüra! E co daventan nossas figlias suvent damas! Han ellas acquistada intgüna moneida, ellas applicheschan tot per se vestir alla moda, frantant che suvent lur geniturs sun cuverts da sdraçia. Cun quella vanidad de se vestir alla granda s' unischa allura amò suvent l' adversium vers la lavur, et ellas daventan esteras nellas lavurs fin ussa usitadas nell' öconomia e che eran l' ornament dellas mammas. Sche tals costums vegnan plü generalmein in moda pro la posteritad, allura cun il temps il darà üna curiosa generaziun in nossas muntagnas. Il mund modern cun sia legiun de vizis che stan all' erta per clappar la giuventüna, fa absolutamein necessaria üna buna educaziun morala als infants sper üna rigurusa disciplina. Il stadi e las communitads han er ün grand interess, che la simplicitad regi in nossas valladas e che vegni mess terms alla sfrenatezza che catta aschi facilmein ses discipuls in totas classas della societad humana.

Tgetg Caleira sustenet ils proxims dis ses geniturs nellas lavurs campestras sco sche el mai fuss stau in terras esteras, et el saveva amò tot las manipulaziuns cun ils utensils de campagna aschi bein sco mintga famegl. Ils geniturs non il volevan laschar lavurar, essend che el non sei plü adüsau a talas lavurs, ma il bun figl non se laschet strementar da se stanclentar cun quellas

lavurs; pertgei el non apparteneva a quella classa de giuvens, ils quals miran, cun la cigarra in bucca, co lur paupers geniturs se ston stendar, per che lur figls ozius sappien far ils signurs.

Ils contadins da Mon e da Stierva tgi vezevan co Tgetg se stentava da agüdar a ses geniturs, havevan ün grand respect del excellent giuven. La domengia proxima el frequentet il serveç divin a Mon e faget er zieva mezdi üna visita a Stierva. Tot se miravagliava della bella comparsa del bel e brav giuven; ün saveva er che Tgetg haveva già tramess blera moneida a ses geniturs e che quels havevan d' ingraziar a lur bun figl lur presenta beinstanza, e quei ingrandit amò il respect per il giuven. Ils compagns da Tgetg a Mon et a Stierva fagevan er ögls gross, vezend quel in ün aschi bun stadi e vestiu aschi proper sco ün signur della capitala, et er non mancavan las mattas, tgi havessen hagiur lur ögl per ün tal spus; ma Tgetg se musset bein gentil vers tots quels tgi il beneventavan, senza però mussar l' inclinaziun da voler far plü intimas conoschenzas.

Il di sequent Tgetg communichet a ses geniturs, che el vögli oz ir a Lansch e che el probabilmein resti la per treis fin quatter dis, essend invitau da signur Morin dad er passentar intgüns dis a Lansch in sia compagnia. El prendet quella gada üna plü longa via per ir a Lansch, el jet nempe il prim a Vaz per far üna commissiun als geniturs d' ün compatriot, tgi se recattava er a Bergamo in condizion. Ils geniturs de quel habitavan a Madulein, et el ils cattet fortunadamein a casa. El faget conscienuisamein sia commissiun e remettet als dus paupers vegls ün piçen pachet cun moneida che il figl a Bergamo haveva tramess cun Tgetg. Ils buns vegls volevan servir a Tgetg da totas sorts caussas per mussar lur gratitud e lur plascher de sia visita; ma Tgetg non acceptet auter che ün pau latg, non havend de bisögn da mangiar. El communichet allura als vegls, che el returni prest a Bergamo e che el sei prompt d' exsequir üna eventuala commissiun a lur figl, sche els gli vögliien dar üna tala. Allura il bab de casa se mettet a racquintar tot quellas caussas che Tgetg dovei relatar a siu figl; e cur il bab fageva üna pausa, la mamma cattava subit ün nov cavazin per continuar il discurs. Passa ün' ura haveva Tgetg stoviu tadlar il discurs dels vegls et il voleva üna buna memoria per tener indament tot quei che quels geniturs volevan far communicar a lur figl. Havend tandem finida questa façenda, Tgetg partit per Lansch, inua el

arrivet amò ad uras per saver gentar cun signur Morin e sia familia.

Ils proxims dis Tgetg faget cun signur Morin e siu frar Paul diversas excursiuns nella contrada; els visitettan Parpan et ün pèr gadas la minieras al Piz coçen. Ils dis passettan fitg agreabla mein al giuven, ma per siu displascher ils dis de sia permissiun jettan uss prest alla fin et el discurreva gia cùn l' inspectur Morin da sia partenza. Inaspectadamein arrivet üna sera üna sgrischeivla novella a Lansch, nempe la fama, che Plurs sei totalmein destruiü dad üna bova. In casa Morin tot pigliet granda tema de quella nova; ma ün non voleva crèr quella caussa, e signur Morin, passada la prima impressiun de questa fama, declaret, quei sei be üna çiancia de buccas bleçias, el non savessi, dinunder havessi doviu vegnir üna tala bova per saver cuvrir questa granda communitad. Ma dus dis plü tard el reçevet dad ün parent a Clavenna üna charta, la quala il faget conoschent cun la terribla disgrazia. Quest parent gli scrivet:

„Car cusrin! Il burg de Plurs non exista plü. Üna sgrischeivla e spaventusa catastropha eis successa nella vicinanza da Clavenna, ün eveniment che fa tema e horrum nell' intèra contrada. Nus havettan in nossa vallada l' ultim temps ün' aura fitg bleçia. Dal 25 fin al 30 d' Avust il ha contiguadamein ploiu; quel di allura l' aura se serenet et ün haveva speranza che vegni uss ün' aura favoreivla; ma già lezza notg returnet la burasca pir che mai e duret fin alla damaun del 3 da September. Marsdi, il 4 da September, era ün bel di serein. Zieva mezdi però comenzettan da rödlar dal munt Conti in ün lög, inua ün haveva avant temps cavau plattas de pignas, crappa e glera che fagevan grand' dann allas vignas che giaschan da vart da Clavenna. Ma ils habitants da Plurs non fagettan attenziun de quei, perquei che quest lög eis ün toc sut Plurs et er perquei, che talas bovas vegnivan qua suvent. Dintant advertittan intgüns contadins da Roncaglia ils Plurascs da bandunar lur citadina, essend che il sei da preveder üna disgrazia. Dal temps cur la sera il sunet d' Ave Maria, ils catholics se havevan raspai nella baselgia de sanct Cassian all' oraziun, e circa 40 personas reformadas tgi er habitan a Plurs, eran er radunadas in üna casa al medem scopo. Il çel era serein e sclariu magnific dal mez discus lunar, e negün presumava inzatgei del mal; ma tot annetgamein se precepitet il munt Conti in ün moment cun terribla forza et ün sgrischeivel

sfracc nella vallada. Quest sgrischeivel sfracc et il tunar nus auditann a Clavenna et era simil all' explosiun da blers canuns. Schilano che haveva 78 casas, e la citadina de Plurs cun 125 casas e novçent e trenta persunas sun totalmein cuvertas dalla stremmentusa bova. La forza della bova era stada aschi granda, che la tur della baselgia de Sancta Maria, nella quala ils reformai tenevan lur serveç divin, füt büttada dal vent alla riva dretga del flum. Da quest curt rapport tü pos comprender, quant terribla eis stada questa catastropha. Jeu non hai voliu mancar d' aschi prest sco possibel era ti dar rapport de questa terribla disgrazia, savend che blers signurs da Plurs sun sociis dellas minieras a Lansch che stan sut tia direcziun. Jeu suppona che quest eveniment faregi bein necessaria tia presenza in nossa vallada, e cun la speranza da te prest revèr, jeu resta cun salüt tiu cusrin Giovanni Ramello.“

Signur Morin pigliet üna granda tema, legend questa charta de siu cusrin. Zieva haver reflectau ün di intèr, tgei consequenzas questa disgrazia podessi haver per las minieras al Piz coçen, essend la granda part dels sociis era da Plurs, els se resolvet da far ün viadi a Clavenna per s' informar da questa caussa meglier. El communichet a Tgetg Caleira il contegn della trista charta reçerta e l' invitet da far cun el quest viadi per er se poder informar della sort de siu patrun Gometti. Tgetg se musset subit prompt d' accompagnar signur Morin e quei amò per tant plü, essend sia permissiun er quasi spirida. Els se convegnittan allura da partir la damaun del terz di subsequent e se volevan cattar quella damaun a bun' ura a Casti. Tgetg prendet comgiau dalla familia Morin e da ses fradegliuns e jet cun pass rapids a Sanagn. Arrivand a casa, el racquinet a ses geniturs dalla terribla catastropha da Plurs e communichet er als ses, che el puschmaun stoppi partiir da casa. Quei attristet zun fitg la familia; ma la caussa non era da müdar et ella se stovet remetter alla voluntad de Deus. La damaun mamvegl del terzi Tgetg prendet comgiau da ses geniturs fradegliuns e jet a Casti per aspectar signur Morin; quel arrivet là prest zieva il giuven et els continuettan subit lur viadi a pei, e volend els pernottar quella sera a Casaccia, els se stovettan festinar per arrivar aunc a temps in quest lög. Per Tgetg non era quei ün strapazz, ma signur Morin tgi era ün pau da vegl e latier er amò pesant, ün tal viadi non era üna bagattella. Dintant arrivettan ils dus viagiaturi fortunadamein al lög, inua els volevan pernottar.

Arrivand l' auter di nella vicinanza del lög, inua stava la bella citadina de Plurs, els pigliettan üna granda tema, vezend la terribla devastaziun che quella bova haveva fatga. Plurs era svaniu. Sün la bova se recattavan humens e lavourants tgi cavavan nella ruina, u per cercar tesors u per forsa amò poder liberar qualche habitant sutterrau. Havend considerau ün' urella quest lög della disgrazia e non vezend qua tranter quels humens tgi lavouravan, conoschents per se poder informar dellas persunas tgi se hagien forsa salvadas, els continuettan lur viadi et arri-vettan avant la notg a Clavenna. Signur Morin jet directamein pro ses parents, e Tgetg prendet siu albergo nella prima osteria della citad. Da pertot la schenta discurrevan be dalla disgrazia de Plurs e la consternaziun dels Clavennascs era üna generala. Blers citadins da Clavenna havevan parents a Plurs tgi havevan persa lur vita; per inconter eran intgüns habitants da Plurs stai quel di absents da casa et eran in questa maniera scappai cun la vita. Tgetg, il qual conoscheva tot ils habitants da Plurs, cattet aunc quella sera ün hum da Plurs tgi era stau absent da casa il di della disgrazia. El il demandet, sche el non conoschi la sort della familia del signur Fabian Gometti. Il hum gli relatet, che l' intéra familia Gometti sei sepellida sut la bova, cun excepziun della figlia Adelina, la quala se recattavi il di della disgrazia in visita pro üna amitga a Clavenna, et ella se dovei amò recattar qua, ma mezza morta dell' afflicziun e del cordöli sur la perdita de ses geniturs, fradegliuns, parents e conoschents. Savend quest hum da Plurs er dir, in quala casa Adelina se recatti qua a Clavenna, Tgetg se resolvet da visitar la l' auter di.

L' altra damaun zieva la colaziun Tgetg jet il prim a cercar il signur Morin per gli comunicar quei che el haveva audiu dal hum da Plurs davart la familia Gometti, ma signur Morin haveva er già audiu dalla sort dels Gomettis e che l' Adelina se recatti qua a Clavenna in anguscha e mezza desperaziun. El consigliet a Tgetg, el dovei ir a visitar la giuvna; forsa che el, seo quasi ün member della familia Gometti, la possi confortar ün pau. Tgetg jet allura directamein nella casa, inua se recattava la disfortunada giuvna, e se faget annunciar a quella. El savet subit intrar nella stanza de sofferenza dell' abandonada signurina, la quala il recevet cun las larmas nels ögls. El provet da confortar la giuvna aschi bein seo el saveva, et in verdad ella daventet ün pau plü quieta, conoschend il giuven Caleira per ün hum galant tgi era

estimau da tot la familia Gometti. Tgetg la consigliet da restar a Clavenna, fin che ils fatgs e las façendas de sia familia seien reguladas; ma sche ella vögli forsa vegnir cun el a Bergamo, sche sei el er persvas che il signur Vertugli la concedi cert e fitg bugen ün asil, fin che ella se hagi decisa, inua ella vögli prender sia dimora per il futur. La giuvna schet, che ella in verdad preferissi dad ir a Bergamo, fin che ella hagi recuperada ün pau la resignaziun per poder portar sia granda disgrazia. Tgetg s' offerit da manar la a Bergamo, ma in cas che ella vögli vegnir cun el, ella se stovessi prest decider e far prompta al viadi, stante che el stoppi far tant plü prest da returnar in sia piazza, essend gia passau il temps de sia permissiun.

Bandunand quella casa, Tgetg passet per la strada maestra per ir in üna osteria, inua el doveva cattar ün conoschent, cun il qual el haveva da far üna façenda. El era a peina trenta pass distant dalla casa, dalla quala el era sortiu, intupet el — siu frar Albert. Ils dus frars se salüidettan e Tgetg schet: „Ma dinunder vens tü, car Albert, che jeu te catta a mez Clavenna, fratant che jeu te supponeva a Bergamo?“ Ma Albert respundet, che la disgrazia da Plurs sei er vegnida conoschenta a Bergamo e signur Vertugli il hagi allura subit tramess a Clavenna, per che el s' informeschi della sort della familia Gometti a Plurs. El sei arrivau qua avant ün' urella e sei intenzionau da ir pro la ruina da Plurs per s' informar de quella caussa; ma Tgetg gli schet: „Quei non eis necessari, jeu conoscha gia la sort de nos bun patrun; l' intéra familia eis sepellida sut la sgrischeivla bova, cun excepziun della signurina Adelina, la quala per fortuna eis stada in visita qua a Clavenna dal temps della disgrazia. Ella se recatta amò qua e jeu ven giust dad üna visita, la quala jeu la hai fatga. Ma er tü, car frar, la stos visitar; la paupera giuvna eis in üna imensa anguscha e ha da bisögh da confort. Ve ün moment cun mei nell' osteria e jeu te manerà allura plü tard pro la casa della disfornunada Adelina.“

Albert accompagnet allura siu car frar Tgetg nella menzionada osteria, et ils dus frars se consigliettan là, tgei che els vögliien far a favur et in avantatg de lur giuvna patruna. Els füttan perüna, da zieva gentar se render pro las ruinas da Plurs per mirar, sche füss forsa possibel da far üna scavaziun per cattar la casa de lur patrun. Zieva haver pres ün refresc, Tgetg manet siu frar Albert pro lur giuvna patruna Adelina. Quella sentit ün

grand allevgiament, vèzend ils dus fidels impiegai de siu bab prompts da sustener la in sia abandumanza. Ella se decidet dunque da viagiar a Bergamo, sperand che signur Vertugli l'acceptaregi ad interim in sia familia, fin che ella sei acquietada e habla da pensar a sia futura dimora; ella se musset prompta da gia in dus dis partir per Bergamo. Ils dus frars bandunettan allura la disfortunada signurina per se preparar alla exsecuziun de lur plan per zieva mezdi. Els gentettan a bun' ura e se mettettan allura subit in via vers Plurs. In üna buna mezz' ura els arrivettan pro la strementusa bova e jettan inturn, spiunand, inua podessi esser stada la casa de lur bun patrun Gometti; ma els cattettan negüns vestitgs da quella e non savettan conoscher il lòc, inua quella era stada. Vezend l' immensa altezza della bova, els capitann fitg bein, che els sappien intraprender nagut per cercar la casa e poder salvar la richezia sepellida in quella; perquei els returnettan subit a Clavenna e rapportettan a lur giuvna patruna che ad interim ün non sappi intraprender nagut per descuvrir la casa de ses cars geniturs. Albert supplichet sia patruna e siu frar Tgetg da lubir gli, da far üna visita a ses buns geniturs a Sanagn; el non hagi voliu demandar signur Vertugli per il permess da far quest viadi, stante che el non hagi saviu d' incuntrar siu frar qua a Clavenna; uss però, che il frar returni a Bergamo cun las novas da Plurs, non sei siu return aschi pressant, et el sei persvas, che signur Vertugli gli concedessi da repatriar per qualche dis. Adelina e Tgetg se mussettan prompts da laschar far Albert üna visita a ses geniturs et assumer la responsabilitad per quest permess visavi a signur Vertugli. Albert partit allura gia quella sera per aunc arrivar in Bregaglia e l' autra sera poder esser a casa pro ses buns geniturs.

Albert arrivet la seconda sera a Sanagn per grand plascher de ses buns geniturs e fradegliuns. Il giuven fageva üna comparsa stupenda, et ils habitants da Mon e Stierva comenzavan gia a dir: „Nos Peder Caleira a Sanagn ha ils plü bels aspects da daventar ün grand signur, sche ses dus figls se refan da tala maniera in terras estras.“ Quels plaids, plidai cun üna certa ironia, mussavan che era gia resvegliada üna certa invilgia nella schenta per rapport alla fortuna che fluriva a Sanagn, cumbein che la buna familia Caleira semper se haveva mussada humila. Il dat suuent tranter ils humans schenta tgi scuvischa ad auters humans la fortuna; ma quei eis veramein üna nauscha qualitat che mussa ün bass spirt et üna insufficienta educaziun.

Albert faget durant quels treis dis che el era casa, intgiunas visitas a Mon et a Stierva, et ün di el jet a Lansch per visitar la familia de siu prim patruu Morin, il che el haveva hagiu impromess a quel, havend discurs cun el il di de sia partenza da Clavenna. El havess er amò bugen fatg üna cursa fin allas minieras del Piz coçen, ma el non havet quella gada temps e peda da far questa excursiun; pertgei el non voleva restar memia ditg absent da Bergamo, a motiv che signur Vertugli non saveva inzatgei da siu viadi a casa sia. Gia il quart di zieva siu arrivo a Sanagn el partit da casa, prendend cun se la benedicziun de ses buns geniturs e las bunas e cordialas admoniziuns de sia cara mamma Gnagna.

Fratant che Albert se recattava a casa pro ses geniturs, Tgetg se profitet dels dus dis che el stovet spetgar a Clavenna fin che la signurina se faget prompta dad ir a Bergamo, per esser activ in favur de sia giuvna patruna. El saveva amò dal temps che el era stau a Plurs, che siu signur Gometti haveva intgiuns considerabels capitals a Clavenna e conoscheva er ils debiturs, essend el avant temps stau diversas gadas per commissiun del patrun in lur casa. El communichet quella caussa a sia giuvna patruna e s'offerit da far la tentativa, sche quels capitals fussien da saver incassar. La giuvna saveva er sezza, che ses geniturs havevan capitals a Clavenna et in Bregaglia, ma non conoscheva ne ils debiturs ne lur relaziuns öconomicas; dintant ella se musset fitg contenta, sche Tgetg vögli far üna prova d'incassar quellas postas. Ma la caussa haveva sias grandas difficultads, stante che las obligaziuns per quests capitals giaschevan sut la bova da Plurs e non savevan dunque esser presentadas als debiturs; ma sche quels eran humens probs e da character, que era üna posibilitad da receivever la moneida imprestada, u almeins üna nova obligaziun per ils capitals. Tgetg jet amò quel di nella casa d'ün de quels debiturs e communichet a medem che el sei tramess dalla signurina Adelina Gometti per incassar il capital della familia Gometti, havend la figlia ussa de bisögn de quella summa. Il debitur, ün hum prob e galant, declarèt che el in quest moment non sei in cas da restituir l' intéra summa, ma la metad de quella vögli el pagar il di sequent. Tgetg se musset content cun questa offerta e relatet la caussa alla patruna. Il di sequent jet allura signurina Adelina Gometti in compagnia de Tgetg nella casa del menzionau debitur, e quel haveva da veras gia pinau üna summa

da quatter milli renschs e faget per il rest dels auters quatter milli renschs üna nova obligaziun sut la condizion che sia creditura annülleschi l' obligaziun sepellida sut la ruina da Plurs. Tgetg concepit subit üna concernenta declaranza, Adelina Gometti l' affirment cun sia suttascripziun e la façenda era regulada a compleina contentezza della creditura. Dad ün negoziant da Clavenna, il qual debitava 6 milli renschs a signur Gometti, els recevettan er milli renschs e la renovaziun dell' obligaziun per il rest da çinc milli renschs. Dad ün terz debitur els recevettan almeins la renovaziun dell' obligaziun e se contentettan cun quella, non havend da present bisögn da plüra moneida. In questa maniera Tgetg haveva conservau a sia giuvna patruna ün capital da 15 milli renschs.

L' auter di signurina Adelina Gometti partit in compagnia de Tgetg Caleira per Bergamo, imua els arrivettan già l' auter di a bun' ura. Signur Vertugli e sia familia recevettan cun grand plascher la figlia del soci de lur affar, et Adelina era contenta dad esser acceptada in üna aschi bella e buna familia, la quala era respectada nell' intèra citad. Racquintand Tgetg a signur Vertugli, co el hagi cattau siu frar Albert a Clavenna e co la giuvna patruna et el hagien concess a medem da far üna curta visita als geniturs, signur Vertugli approbet questa permissiun. Avant che sei passada l' emda, Albert arrivet a Bergamo per plascher del patrun e del frar. El relatet al frar, che ils dus ultims dis ün hagi fatg provas a Plurs da tras scavaziuns descuvrir intgünas casas, ma che non sei reussiu da vegin bass avunda, essend che la bova sei amò memia humida e sminaciavi da sutterrar ils lavurants. Ün sei uss intenzionau da desister ad interim dad ulteriuras scavaziuns, sperand però che plü tard, cur la bova se hagi çentada plü ferm, ün possi forsa far outras provas cun meglier success.

Ils proxims dis la giuvna Gometti se consigliet cun signur Vertugli e Tgetg davart il regulament dels quints de siu bab. Ella saveva, che siu bab haveva divers capitals in Bregaglia et a Cuira, ma non conoscheva ils noms dels debiturs; a Cuira, pretendeva la giuvna, hagi il bab üna casa per hypotheca, aschia ella hagi diversas gadas audiu discurrer il bab in familia, ma ella non sappi quala casa sei hypothecada et ella non conoschi il nom del debitur. Zieva haver ponderada quella caussa madüramein, füt conclus che Tgetg dovei ils proxims dis returnar in Bregaglia

per far la prova, sche el possi descuvrir ils debiturs del patrun Gometti. A Cuira haveva signur Vertugli ün agent del affar, del qual el se podeva fidar; el s' offerit da scriver a medem e da quel secretamein far investigar, tgi podessi esser quest debitur, quala casa sei hypothecada e per quala summa. Se mussand Adelina contenta cun quest plan, signur Vertugli scrivet amò quel di a siu agent a Cuira, e l' emda proxima Tgetg partit per la Bregaglia per far la tentativa, sche el possi cattar ils debiturs de siu patrun. Et el era in verdad fortunau in sia façenda. Zieva duas emdas el returnet a Bergamo senza moneida, ma cun treis novas obligaziuns nel importo da 7 milli renschs circa. Quindesch dis plü tard recevet er signur Vertugli novas da siu agent a Cuira; quel haveva cattau il debitur della familia Gometti et er la casa, che era hypotheca per 6 milli renschs. Il debitur, essend er quel ün hum galant, haveva renovada l' obligaziun. In questa maniera las façendas d' interess della signurina Gometti eran reguladas a sia compleina satisfacziun. Signur Gometti poteva bein haver amò plürs auters debiturs; ma non savend ne la figlia ne Tgetg ded auters, la giuvna se contentet cun quei che ella haveva podiu salvar dalla facultad de ses buns geniturs.



V.

Adelina Gometti se haveva fatga amitga dellas treis figlias de signur Vertugli, e quellas fagevan tot lur possibel per far alla giuvna plascheivla la vita a Bergamo. Havend las soras Vertugli godidas plüras e meglieras scolas che lur amitga Gometti, quest' ultima haveva occasiun da se perfeczionar in bleras caussas, in lavurs manualas, nella literatura et in bleras otras caussas utilas. Essend semper occupada et in üna agreabla compagnia, siu cordöli e sia immensa dolur pervia della trista sort de ses geniturs e fradegliuns se mitiget et ella daventet plau a plau plü suscep-tibila per las allegrezzas della vita. Ella füt presentada allas familias della conoschenza dals Vertuglis e non cattet plü tanta peda da pensar a sia disgrazia, la quala il prim temps la haveva deprimida e mortificada. A peina passau ün mez ann, ella se sentit sco da casa a Bergamo e nella familia Vertugli. Ma avant

tots auters la giuvna respectava et amava ils dus frars Caleira, il Tgetg e l' Albert, sco sche els fussen ses propriis frars. Al Tgetg ella remettet l' administraziun de ses affars; el la stoveva rappresentar sco soci nel affar a Bergamo et er visavi a ses debiturs, cun ils quals ella stoveva star in correspondenza. Tgetg faget fitg bugen tot quellas lavurs; el haveva ün grand plascher, cur el saveva prestar ün serveç alla buna giuvna.

Dus bels, scorts e prudents giuvens sco ils dus frars Tgetg et Albert Caleira ün non cattava a Bergamo. Els füttan er considerai sco dus members della familia Vertugli e se stovevan participar da totas recreaziuns, che füttan beinduras arranschadas in casa. Principalmein las seras della domengias se radunavan in casa Vertugli intèras societads da parents e conoschents per passentar in compagnia ün' agreabla sera. Er ils dus frars da Sanagn stovevan prender part de quellas societads, et els capivan er fitg bein da se conversar cun auters senza se mussar immodests et importuns. Els eran specialmein bein viss dallas giuvnas tgi se recattavan in quellas societads. Ün rich negoziant cun nom Paolo Fumagalli visitava er suuent cun sia muglier e sias duas figlias la familia Vertugli; el era ün special amitg del signur Vertugli e bein vis in casa de medem. Las figlias del signur Fumagalli frequentavan negünas societads plü bugen che quellas in casa Vertugli; specialmein la figlia veglia cun nom Pelagia visitava beinduras er durant il di las soras Vertugli sut ün u l' auter pretext. Quellas visitas ella haveva comenzadas specialmein nel ultim temps. Il motiv de quellas frequentas visitas negün conoscheva; be l' Adelina Gometti comenzet tandem a far suspects, pertgei la signurina Pelagia hagi üna tala predilecziun per la casa Vertugli. Ella haveva diversas gadas observau, qualas öglidas languintas la giuvna dava, cur Tgetg discurreva, e co ella provava da se far observada cun gli responder in üna maniera agreabla e cun vusch lama. Havend fatgas diversas gadas questas observaziuns, Adelina vegnit alla persvaziun, che l' amitga Pelagia non sei indifferenta per il giuven Tgetg, anzi che spunti nel cor de medema l' aurora d' üna ardenta amur. Ma de quella scoperta Adelina pigliet granda tema e sentit in siu cor üna profunda dolur. Ella s' occupava tot il di cun quest pensier e daventet fitg trista e taciturna. Questa tristezza s' augmentet e creschet da tala maniera, che l' intèra familia Vertugli l' accorschet; er ils frars Caleira, specialmein il Tgetg, haveva fatga questa observaziun,

ma non poteva capir dinunder questa malenconia derivi. Tot sias specialas observaziuns che el fageva ussa per descuvrir quest misteri, restettan senza success.

La primavèra era arrivada cun ün' aura magnifica; la schenta della citad comenzava a far passeggiadas sün las numerusas campagnas che circumdavan la citad. Er la familia Vertugli haveva üna bella campagna nella vicinanza della citad, e la mamma e las figlias visitavan quasi ogni di la campagna per passentar là qualche uras all' umbriva de bella pomèra che stava gia in flurizun. Ellas havevan er beinduras visitas da donnas e figlias da familias conoschentas sün la campagna. La familia concludet da tener üna piçna festivitat sün lur campagna la domengia proxima, e las figlias e la donna invitettan er intgùnas parentas, conoschentas et amitgas a questa recreazion campestra. Tranter las invitadas se recattavan er la donna e las figlias Fumagalli. Havend gentau e passada la plü granda calüra, che era uss a Bergamo gia sensibla, la familia Vertugli se rendet, accompagnada er dals figls e dals frars Caleira, sün la campagna che era a peina ün quart d' ura distanta dalla citad. Tandem se haveva raspada là üna bella societad, e tranter ils members de medema se recattava er la familia Fumagalli. Las figlias de quella familia eran oz ornadas cun ün' eleganza extraordinaria e fagevan granda parada. Las giuvnas et ils giuvens arranschettan divers tramagls e göcs della giuentüna per passentar il temps tant plü agreablimein. Pro questa occasiun Tgetg observet duas caussas, las qualas non gli plaschevan, primo che la signurina Pelagia gli s' avicinava suuent e cun/üna familiaridad memia surprendenta; e secondo el quitava d' observar che il Vertugli plü giuven demussava üna speciala attenziun ad Adelina Gometti, la quala però pareva dad esser trista e da haver persa sia ordinaria hilaridad. El stet dunque tot il di all' erta per descuvrir il motiv della malenconia della signurina Gometti, e tandem el credeva da haver cattada üna declaranza de quest contener d' Adelina; el observet nempe diversas gadas, che lezza svolveva dad el ils ögls, cur el discurreva cun la giuvna Pelagia. El observet er che quest' ultima se dava tota stenta da gli s' avicinar aschi suuent sco possibel era, e che ella metteva in sia vusch üna tenerezza languinta, cur ella discurreva inzatgei cun el. Quei gli avrit ils ögls, et el comenzet ad evitar tant sco possibel era sia admiratura.

Tgetg era daventau taciturn e non se participet plü aschi vivamein als göcs sco avant, et il pareva sco sche siu reteniment havess fatg perder la signurina Pelagia il humor. Tgetg non era ün giuven, a cui ün stoveva dar cun üna perca per il fa capir üna caussa, et el daventet tandem, cumbein che el se recattava in üna allegra societad, da totafatg taciturn e serius. Cur la sera la familia Vertugli se mettet amò a meisa per çenar, Tgetg mancava, e la servienta tgi serviva a meisa relatet, Tgetg hagi bandunada la casa e la hagi incombensada da dir alla signuria, che el non possi returnar a çeña, havend amò da far üna piçna façenda; ün non dovei dunque spetgar fin che el returni. Quei pareva curios all'intèra familia, stante che Tgetg mai non haveva fin uss mancau üna gada alla meisa, auter che cur el era inzanua absent in façendas del affar. Negün della familia fageva dintant suspects, che il brav giuven se havessi forsa laschau sollecitar dad ir in ün lög che non füss stau decent, u zun forsa periculus. Ma ad Adelina havevan quests plaids della servienta fatg impressiun, et ella pensa in siu intern: „O Pelagia, tü il mi rubeschas er amò dalla meisa!“ Ella se finget ün pau indisposta e bandunet la sala a mangiar per se retirar in sia stanza e daventar la preda dels torment de siu cor battent. A peina arriuada in sia stanza, ella fermet la porta, se mettet alla meisa, possand sia testa dolenta nels mauns e laschet currer las larmas tot a fila. Siu cordöli e sia malenconia creschet amò semper e pür tard la sera, cur ella audit la vusch de Tgetg discurrer cun la servienta sün il corridor, ella s' acquietet ün pau, se mettet allura in letg per passentar üna inquieta notg, che la haveva portada sömis tormentants.

Ma Tgetg non era stau quella sera in casa Fumagalli e non haveva çenau cun signurina Pelagia, na, el haveva bandunada la citad per far solet üna passeggiada nella libra natura; el era questa sera tant façendau cun se sez e cun las observaziuns fatgas oz nella campagna del signur Vertugli, che el consideret ne pomèra ne flurs et amò bler meins la schenta, la quala el intopava. El, ün giuven d' ün natural aschi quiet e temprau, maya oz sco ün desperau per sia via, da maniera che ils passants comenzavan a mirar, qual sturn ün hagi oz mess per la prima gada in libertad zieva üna plü longa retenziun. Tandem el arrivet pro ün banc sut ün gigant castagnèr che derasava gia üna spessa umbriva, e se fermet. El se mettet sün il banc e comenzet a meditar tot

quei che el oz haveva vis et experimentau. El non haveva a far longs studis, siu intern gli scheva: „La buna Adelina te ama, et ella eis er quella tgi ha observada l' adulaziun che signurina Pelagia mi ha demussada da plü qualche temps; ma ussa jeu sai, tgei jeu hai da far.“ Et in verdad, Tgetg se müdet fitg durant il proxim temps. El era ün giuven, il qual era superb da saver e poder lavurar et aschia guadagnar siu paun quotidian et amò sustener ses geniturs. El era tot il di activ a favur del affar, al qual el serviva, e mai gli era fin uss vegniu indament da cercar üna richa muglier per saver far il signur e poltrun a cust d' üna donna, seo fan oz in di blers giuvens, cur els cattan inzanua ils vestitgs d' üna richa artavla, la quala els persequiteschan cun lur adulaziun e cun üna lingua svelta, cun la quala els san dir desch mensögnas nella secunda. Na, Tgetg non apparteneva alla classa de quels aventuriers, essend el da tot ün' autra morala. Supponend el uss però, che el non sei indifferent alla buna Adelina, senza che el inzacuras havess mussau a quella sentiments d' amur per la trer in ses laçs, el pigliet la resoluzion da cun la prima buna occasiun demandar alla giuvna, tgei la maunchi che ella pari aschi trista et er aschi cauta vers el; el non se regordi da haver fatg üna caussa che la havessi podiu displascher u zun offender. Havend ditg ponderada quella caussa, el daventet ün pau plü quiet e principalmein a motiv, che el se sentit da totafatg inculpeivel da scodüna caussa che poteva forsa haver disgustada la buna giuvna.

Ma, seo il dal ordinari va, dal plan fin all' exsecuziun passettan divers dis. Tgetg non voleva demandar ün' audienza d'Adelina in sia stanza, dimperse el voleva aspectar il moment, cur el la cattass inzanua casualmein soletta. Stovend el ün di ir nella citad, el bandunet il Borgo s. Antonio, inua la familia Vertugli haveva la casa et il negozi, el observet ün toc avant se üna signurina, la quala passava il borgo cun lev pass; el non conoschet al principi la persuna, essend la distanza memia granda. Tandem intopet la giuvna üna dama conoschenta e pro questa occasiun ella svolvet amò la testa ün pau inavos per dir l' ultim „adio“ alla signura. In quest moment Tgetg conoschet subit che quella signurina sei negüna autra che Adelina Gometti, cun la quala el havess aschi bugen discurs ün pèr plaids senza testimonis. La giuvna il stoveva er haver hagiу observau, pertgei ella accelleret ses pass, seo sche ella temess dad esser persequitada. Ma Tgetg

non la perdet da vista, et accellerand er el ses pass, el vegniva mintga moment plü da vicin alla giuvna. Accorschend quella che non la seregi possibel da müciar dal giuven, ella l' aspectet ün moment e Tgetg la salüdet cun tota cordialitat, schend: „Inua vas, Adelina, et amò aschi svelt, che ün non te po azievar? Jeu sun per auter ün bun pedunz e te hai a peina podida suatir. Vas forsa er in citad?“ — „Schi“, respondet Adelina cun debla vusch ün pau vibranta. Tgetg la schet: „Teidla, mia buna Adelina, e mi disch, pertgei tü es stada quella domengia nella campagna dels Vertuglis aschi trista! Jeu te hai observada bleras gadas che tü fagevas üna çera, sco sche tü havesses il cridar sün la lingua; mi disch, Adelina tgi ne tgei te ha offesa!“ Dand il giuven in quest moment üna ögliada sün la signurina, el observet che ils ögls della giuvna eran bleçs e che il cridar era orasum. El pigliet tema e non saveva, co el dovess continuar siu discurs sche gia quels plaids la havevan commossa in tala maniera. Ma la giuvna revegnit ün pau e schet a Tgetg: „Mi dai tiu braç, sche jeu ti sto avrir miu cor, sche non sa quei daventar sün strädas della citad; nus volein sortir dallas portas e passegiar ün pau nella libra natura.“ Tgetg era content cun questa proposta et il pèr se convegnit, da il prim ir in citad a far las façendas che ogni ün haveva da far, las qualas per fortuna non eran ne grandas ne longas, e d' allura se cattar in plazza granda. In desch minutus Tgetg cattet gia la giuvna in plazza, la det il braç e la manet ad üna porta, dalla quala ils plü paucs passagiers sortivan.

A peina sortii dalla porta, Adelina schet a Tgetg: „Tü me has demandada, pertgei jeu sei stada trista quella domengia nella campagna. Non has tü zun negün presentiment, tgei sto esser stau il motiv de mia immensa dolur, de miu vehement cordöli che ruiva a miu cor? O, üna persuna, cun la quala tü quel disfotunau di te has façendau cun tanta predilecziun, ha occasionadas las dolurs de miu cor. O, Tgetg, tü sas, tgi eis quella persuna, la quala ha alienau da mei miu frar, il giuven, senza il qual la vita mi para mòrt, e la mort liberaziun.“

Tgetg, commoss al extrem, retenet la giuvna, e la guardand in façia cun üna expressiun da surpresa, ma er da beatezza, la schet cun debla vusch: „Dovess jeu forsa esser quel tgi ha fatg impressiun sün tei, o respunda Adelina!“

„Tgi auter dovess quel esser che tü, Tgetg? Has tü forsa vis, che jeu inzacuras havess dau occasiun in qualunque maniera

ad ün giuven da m' avicinar auter che nella plü extrema decenza? Has tü vis, Tgetg, che jeu hai dau oreglia all' adulaziun de giuvens? Na, Tgetg, jeu sun pura da scodüna umbriva d' üna amur per humens, ils quals jeu non conoscha e non vögl conoscher. Na, l' imatg che jeu porta gia divers anns inclus in miu cor, dovei restar pur fin a mia fossa.“

„Ma mia cara Adelina“, respondet Tgetg, „jeu comenza uss a capir plü u meins tiu discurs. Ma in prima linea jeu ti sto remonstrar, che jeu nella campagna Vertugli non me hai occupau cun qualunque persuna da plü che quei che demandet la convenienza. Que eis ver, che signurina Pelagia me ha suvent ocupau quel di, ma na per miu plascher, dimperse per mi daventar molestusa et importuna.“

Havend Tgetg pronunciai quests plaid, Adelina strenschet siu maun e siu frunt se serenet. „Me dovess jeu haver ingannada?“ schet ella; „o quant bugen jeu vögl demandar per perdun! Tü mi prendas üna granda peisa da miu cor.“

Il benevul lectur facilmein po indovinar il resultad da quest dialog tranter Tgetg et Adelina. In üna mezz' ura els returnettan alla casa Vertugli, tots dus contents e beai et implemii da dulçs sentiments. Lur cors se havevan cattai. Tgetg haveva adüna honorada, amada et estimada sia giuvna patruna, essend quella in tots rapports üna giuvna da valer, üna giuvna d' ün character nobel et elevau; ma da voler s' avicinar a questa richa signurina cun lusingas d' amur e forsa se voler profitar de sia abandunanza per la tender laçs d' amur, quei mai non gli era vegniu indament; dad üna tala bassezza el mai non se havess podiu far culpabel. Ma uss, uss che la giuvna sezza haveva fatg il prim pass d' avici naziun, el faget negün scrupel plü d' acceptar il maun della buna giuvna. La certezza da s' acquistar questa buna, nobla giuvna per sia muglier haveva però totüna mess Tgètg in üna certa extraordinaria agitaziun et el stoveva bein dar adatg, che el non se laschi transportar a qualche negligenza nel affar. El tenet per il plü opportun da prest spusar sia amanta, et Adelina, alla quala el haveva communicada questa idea pro üna buna occasiun, era compleinamein d' accord cun el. Ma Tgetg non voleva far nozzas avant che el hagi discurs cun ses geniturs e da quels reçert il permess per siu matrimoni. El proponet er ad Adelina da celebrar las nozzas a Mon in presenza de ses cars geniturs e fradegliuns e d' allura er giust habitar ün fin dus meins zieva

las nozzas a Sanagn nella casa paterna. Er cun questa proposta Adelina se musset fitg contenta, havend ella ün viv desideri d' imprender a conoscher ils dus conjugals Caleira a Sanagn, ils quals havevan dus aschi bravs figls sco Tgetg et Albert.

Tgetg scrivet a ses buns geniturs, tgei el intenzioneschi da far, sche els gli dettien lur consentiment. El als tramettet er tras üna casa da commerci 400 renschs cun la supplica, da gli voler laschar preparar la stüva sura nella casa paterna per che el as-chi offerir la habitaziun a sia giuvna muglier durant ün pèr meins de vacanza. La charta per ils geniturs era arrivada inclusa in üna charta del plevan da Mon, al qual Tgetg haveva er scrit tot quei che el era intenzionau da far. Veginnd Peder Caleira la domengia proxima a Mon per assister al serveç divin, il plevan il faget clamar in casa perbenda e gli remettet la charta da Tgetg e gli communichet er quei che Tgetg gli haveva scrit, specialmein che el habitassi bugen ün piçen temps nella casa paterna cun sia muglier. Veginnd Peder da mezdi a casa cun la charta da Tgetg e cun las novitads dal signur plevan, l' intèra familia se miravigliava de quellas novitads; ma ils geniturs eran contents da dar a Tgetg il permess da maridar. Gnagna haveva ün particular plascher che Tgetg voleva far sias nozzas a casa et er habitar ün curt temps nella casa paterna, cun quala occasiun ella saveva imprender da conoscher sia nura e forsa la saver dar qualche bun consegl per la vita. Havend il rev. sig: plevan declarau a Peder, che el scriti oz amò a Tgetg üna resposta, Peder returnet zieva mezdi in casa perbenda e supplichet il signur plevan, dad er voler scriver a Tgetg in siu nom et in nom de sia donna, che ils geniturs seien fitg contents da laschar maridar Tgetg e che als fetgi ün grandissim plascher, sche el fetgi las nozzas a casa e vögli allura er aunc habitar cun els per qualche temps. Il signur plevan impromettet da subit scriver la charta e schet, el sperì che Tgetg la reçeveregi al plü tard in otg dis. Peder discurret er aunc quel di cun ün mastregnèr da Casti, il qual casualmein se recattava a Mon, pervia della reparatura de sia casa, et il mastregnèr vegnit gia quel di cun Peder a Sanagn per mirar, qualas reparaturas seien necessarias alla stüva sura, per la metter in ün stadi che plaschi a Peder. Ils dus humens se convegnittan subit per rapport al prezi, et il mastregnèr tgi da present non haveva bler da far, impromettet da subit començar la lavur. Peder preparet gia il di sequent il material, che il

mastregnèr haveva stima necessari per far la projectada reparatura. La proxima domengia il mistral regent da Mon laschet clamar Peder in casa sia e gli remettet ils 400 renschs che Tgetg haveva tramess a Cuira ad üna casa de commerci e che il mistral haveva reçerts per remetter a Peder Caleira.

Dintant era il meins de Matg arrivau, e Tgetg et Adelina cattettan ussa per necessari da comunicar a signur Vertugli lur spusalizzi e da gli dir, che els in ün meins vöglien repatriar per celebrar lur nozzas in presenza de lur parents. Signur Vertugli faget bein ün pau öglis gross; pertgei el havess fitg bugen cuvida la buna e richa Adelina a siu figl Giovanni; ma el era prudent avunda da vèr che qua non sei plü da müdar inzatgei e det er fitg bugen a Tgetg üna permissiun da treis meins per che el sappi far il projectau viadi a casa cun sia spusa. Tgetg haveva er pür quel di communicau a siu frar Albert, tgei el intenzioneschi da far. Quel sentit üna granda allegrezza, che siu bun frar doveva far üna aschi buna fortuna. La proxima domengia signur Vertugli faget preparar in casa sia ün extra convivi a sia familia et amò ad intgüns buns conoschents et amitgs del Tgetg, e cun questa occasiun el communichet allura all' intèra mesada il spusalizzi de Tgetg cun signurina Adelina Gometti. Ils promess spus recevettan las gratulaziuns de tots presents, ils quals per auter eran stai surprii da questa novitat, non havend fin ussa hagiun zun negüns indicis, che Tgetg et Adelina podessien daventar aschi inaspectadamein ün pèr.

Conter la fin del meins de Matg Tgetg prendet permissiun per treis meins per saver repatriar e celebrar sias nozzas a casa sia. El haveva reçerta üna resposta e la gratulaziun de ses buns geniturs e sentiva ün grand desideri da revèr ses geniturs e fradegliuns e presentar a casa sia spusa. Inturn il 20 de Matg el partit da Bergamo e viaget il prim a Milaun cun sia spusa. Havend considerada ün pèr dis questa capitala della Lombardia, ils viagiaturi partittan per Como. Là els se fermettan be ün mez di e viagettan allura per barca a Colico, e da là per carr a Clavenna. In questa citadina els reposettan dus dis e passettan allura la muntagna del Splüga cun l' intenziun, da al principi se render a Cuira. In treis dis els arrivettan tandem zieva ün fitg stentus viadi nella capitala grischuna, inua els volevan er ruasar ün pèr dis. A Cuira Tgetg haveva da far qualche façendas de commerci e negozi, e quellas el faget già il prim di zieva siu

arrivo nella citad. Il quart di se rendet Tgetg cun sia spusa a Lansch e faget amò quel di a signur Morin et a sia familia üna visita cun sia Adelina. El musset er a sia carina spusa ses dus fradegliuns, Paul e Mengia; quels dus beneventettan lur frar e lur quinada in spe fitg cordialmein e havevan ün grand plascher da poder far la conoschenza cun la spusa de lur frar. L' auter di Tgetg cattet a bun' ura a Casti las duas cassas, che el haveva tramessas cun l' ordinaria expediziun de lur negozi a Bergamo fin qua. El las faget aunc quella sera transportar fin a Sanagn nella casa de ses geniturs. El e sia spusa veginattan pür l' auter di a Sanagn. Vezend Gnagna avicinar ün pèr alla casa a Sanagn, ella penset subit che quei podessi esser il car Tgetg cun sia spusa, et ella jet ün pèr pass inconter als arrivants. La mamma avrit la braçia e strencchet siu car figl al fidel sein matern, spandend larmas d' allegrezza. Ma Tgetg schet allura alla mamma: „O cara mamma, qua jeu ti presenta üna nova figlia cun il plü ardent giavüsch, che tü la vöglies er inserrar in tiu larg cor d' amur sco tes auters infants!“ La mamma cun larmas nels ögls imbraçet la bella, ma modesta giuvna e la det sün il frunt il büç matern. Adelina era commossa fin allas larmas, vezend agir la simpla contadina cun tala pura affecziun, et ella strencchet sia söra ventura cun impetuositad a siu sein. La mamma manet Tgetg e sia spusa in casa et als musset subit il local, il qual Peder haveva laschau pinar per lur avdanza durant lur soggiorn a Sanagn. Tgetg et Adelina se mussettan fitg satisfatgs de questa piëna habitaziun. Ün' urella plü tard arrivettan ils fradegliuns de Tgetg dalla lavur a casa e se deportettan visavi a lur ventura quinada aschia, che Tgetg et Adelina eran compleinamein contents cun els. Adelina haveva cun üna gada priu possess della bella stüveta e laschau portar las duas cassas che eran già arrivadas da Casti, in quest local.

La mamma Gnagna haveva cun üna gada voliu cuschinari inzatgei a Tgetg et a sia spusa; ma quels declarettan che els absolutamein non hagien da bisögn da mangiar, els spetgien bugen fin la sera da ceina. Ma Tgetg e sia spusa havevan ussa ün' autra lavur; els eran occupai cun svödar lur cassas, las qualas contenevan divers bels regals per ils geniturs e fradegliuns de Tgetg. Havend finida questa lavur, els clamettan la mamma Gnagna in lur stanzetta e la mussettan tot quei che els havevan preparau per repartir als geniturs e fradegliuns. Talas rauas

finas Gnagna amò mai haveva vissas et ella faget reproschas a Tgetg, che el e sia spusa hagien fatgas tantas expensas per regals; ma Tgetg schet alla buna mamma, ella havessi meritau amò bler plü prezius regals; ma el mai non la vögli imblidar. Tgetg jet allura à clamar ses fradegliuns et ils faget vegnir in stanza sura. Quels fagevan ögls, vezend qua quellas bellas caussas novas, sco els talas mai non havevan vissas. Tgetg et Adelina repartittan totas quellas bellas caussas tranter ils members della familia, resalvand però er la part dels dus fradegliuns Paul e Mengia a Lansch.

L'autra damaun, cura Peder arrivet dal primaran, per il qual el haveva stoviu partir ier gia avant che Tgetg arrivi cun sia spusa, il det üna nova scena de beneventaziun tranter bab e figl e la giuvna nura. Tgetg relatet ussa als geniturs tot quei che el intenzionava da far e cur e co el vögli celebrar sias nozzas. Il past el voleva tener nella casa paterna, et el remettet gia oz üna bella summetta de moneida alla mamma per che quella sappi comprar in abundanza tot quellas caussas che eran de bisögn, vaschella, posadas, mantins, bevrandas, carn e da quellas caussas. Tgetg non voleva giust far nozzas sco ün princip, ma decentas sias nozzas doveyan totüna esser. Zieva la colaziun Tgetg faget cun sia spusa üna piëna passeggiada nel conturn da Sanagn e la musset la contrada e las vischnauncas che ün pödeva vér. O co plaschevan ad Adelina quellas gigantes muntagnas cun lur frescs pasculs verds! Ella declareret a Tgetg che ella habitassi fitg bugen qua in quella bella contrada, et ella sperì da suuent poder vegnir ils proxims anns in visita a Sanagn. Tgetg haveva bugen che Sanagn, ad onta de sia granda quietezza, plascheva a sia spusa, et el la schet, a Sanagn ella sappi vegnir mintga estad, sche ella vögli. Zieva gentar Tgetg manet sia carina spusa a Mon per far cun ella üna visita al signur plevan, cun il qual el haveva amò da discurrer davart sias nozzas. Il signur plevan reçevet il Tgetg e sia spusa cun exquisita cortesia, e savend el er ün pau italian, er Adelina se podet participar del discurs dels dus humens. Las nozzas füttan fixadas per la proxima domengia ad otg dis, et il signur plevan impromettet da quellas gia proclamar e publicar la domengia proxima. Tgetg remettet er al plevan üna bella summetta de moneida, destinada per ils paupers della vischnauncia, e communichet nel medem temps al plevan, che el intenzioneschi da far üna plü granda donaziun a favur del fondo pauperil.

Il di sequent Tgetg manet sia Adelina a Stierva, inua el voleva far üna visita a parents e conoschents. Er al plevan da Stierva el remettet la summa da çent rentschs per ils paupers da repartir gia ussa questa moneida tranter ils paupers, u da incorporar quella al fondo pauperil. Havend passentau a Stierva ün fitg agreabel di, el returnet a Sanagn cun la resoluziun, da far il di sequent, sche sei favoreivla l' aura, üna visita al peregrinagi da Ziteil. Mussand la sera tots aspects da bell' aura, Gnagna preparet l' autra damaun gia allas quatter ün ansolver e clamet Tgetg. Ma savend Gnagna che sia futura nura non possi far il viadi a Ziteil e retur in ün mez di, ella haveva preparau a Tgetg üna pesanta valisch cun üna merenda consistenda in carn crüa, andutgels, schambun, ovs, paschada, paun, petta e da diuersas qualitads veschlas et ün pèr butiglias cun vin. Ils dus viagiaturi se mettettan cun curascha in viadi; ma l' ir a munt paret totüna ün pau stentus ad Adelina tgi non era adüsada da far talas passeggiadas per ils munts; dintant els arrivettan totüna a proporziun in curt temps fin a Ziteil. La damaun era magnifica et il prospect sur la natura, sur las valladas, munts-e pizzas grandius; Adelina non füt unfisa da considerar quella stupenda contrada e se sentit fortunada e superba dad er daventar üna figlia de questa terra. Lur prima visita els fagettan alla baselgia; els cattettan in quella üna roscha peregrins della Surselva, ils quals havevan pernottau nel peregrinadi. Tgetg et Adelina assistettan a tot las funcziuns in baselgia, e pür zieva che ils peregrins esters eran partii e la baselgia era serrada, intraprendettan els excursiuns nella vicinanza del peregrinagi. Tgetg voleva ascender il Curvèr, ma sia spusa non havet la curascha da intraprender questa difficultusa montada; els jettan però ün pau plü septentrional et arrivettan allura sün ün fil, dal qual els podettan goder üna bella vista sur la vallada de Schons e nella Surselva. Il plü remarcabel pareva ad Adelina, che els dus savevan amò ir grandas tendas sur neiv a samada. Adelina haveva in sia intèra vita vis pauca neiv, e qua, nella patria de siu spus, els savevan amò ir durant l' estad sur intèras tendas a samada. Adelina iüt mai unfisa da considerar las magnificas cadeinas dellas muntagnas dal fil, inua els se recattavan. Tandem els se stovettan metter in via vers casa; ma Tgetg stovet imprometter a sia spusa, da far auc plüras de quellas excursiuns, durant che els seien a Sanagn. Els arrivettan ün pau da tard a casa, e Gnagna discurreva gia da far ir siu figl giuven ad anquirir ils passegianti da Ziteil.

Ils proxims dis Tgetg non haveva buna peda da far passeggiadas cun sia spusa; pertgei il di de nozzas s' avicinava ussa rapidamein. Tenor l' usit della contrada el non voleva far nozzas üna domengia, dimperse il Marsdi. Essend l' aura magnifica, Tgetg non volet tener il convivi in stüva, dimperse avant la casa all' umbriva d' intgüns çerschërs che ornavan il conturn della casa. Non havend meisas avunda e non volend ir a far imprestar talas, Tgetg e siu bab Peder fagettan sezs meisas cun aissas, che Peder haveva in abundanza in clavau. Els caçettan pals nel terraç e centettan e fermettan allura aissas sün quels. In questa maniera els havevan construidas meisas per passa 40 persunas sün üna bella piazza planusa avant la casa. Peder squassava bein ün pau la testa, havend amò mai vis ün convivi sut çel avert; ma Tgetg gli declaret la caussa aschia, che el tandem se laschet persvader, che ün alla fin sappi er mangiar nel liber. Tgetg procuret er per tot la vaschella che mancava; el det moneida alla mamma e quella supplichet allura Peder dad ir a Casti a comprar tot quellas caussas che eran absolutamein necessarias. Peder faget quei et arrivet la sera grevamein cargau a Sanagn e stovet allura amò il di sequent far üna seconda cursa a Casti per poder contentar compleinamein sia buna consorta. Tgetg procuret allura er tot la vivanda, carns e farina et il vin necessari per la festa. Essend ussa tot pinau per il past, il qual doveva esser aschi splendid sco possibel, el havet uss amò ün' altra lavur da far, nempe dad ir ad invitar las persunas tgi se dovevan participar de sias nozzas. Il prim di el jet cun sia spusa a Lansch per invitar signur Morin, tot sia familia e siu frar Paul e la sora Mengia a nozzas. Sia spusa Adelina il haveva accompagnau sün questa passeggiada, et els havevan passentau ün fitg agreabel di a Lansch in compagnia del signur Morin e sia bella familia.

Ils dus proxims dis Tgetg jet a far las invitaziuns a Mon et a Stierva. In intgünas casas era Adelina er stada cun siu spus, et ella se miraviglia fitg, quala nettezza ella da perfot hayeva cattada in quellas casas de contadins, ils quals parevan dad esser vers signurs in confrunt cun ils contadins italians, tgi mal mangian, mal se vestischian e tgi habiteschan miserablas speluncas. Tandem eran fatgas totas preparativas per il di dellas nozzas e damaun quellas dovevan esser celebradas nella baselgia a Mon, schi in baselgia, pertgei da quel temps il non era amò vegniu indament ad inzatgi da snegar al matrimoni il character sacramental e da

laschar exercitar ün tal act tras humens civils, tras officials tgi non han la dretga idea de quei che els fan.

Il Marsdi de nozzas arrivet. Gia inturn las 8 della damaun comparet signur Morin cun sia familia e cun ils fradegliuns de Tgetg a Sanagn, et er ils hospes da Stierva eran gia là presents, volend er els se participar dal tir festiv a Mon. Tandem se mettet l' intèra societat in via vers Mon. A Sanagn restettan be duas cuschinunzas et üna giuvna tgi las agüdava in lur greva e difficultusa lavur. Arrivand la societat de nozzas al ingress da Mon, ella füt là reçerta dad üna salva da sclopets; pertgei ils paucs mats da Mon volevan far honur a lur convischin Tgetg Caleira et a sia parentela. La societat formet ussa subit üna processiun. Alla testa de medema se mettettan ils mats tgi portavan sclopets; allura sequitet la giuventüna dels nozzadurs, las mattas cun scusal e fazolett alv; a mez il tir se recattavan il spus e la spusa et a quels sequitetan ils geniturs de Tgetg et allura ils auters maridai tranter ils hospes de nozzas. Las funcziuns comenzettan subit, il prim cun la s. messa, allura sequitet la communiu del spus e della spusa et ultimamein la copulaziun. Il rev. signur plevan tenet allura er amò ün curt dicurs sün l' altar, nel qual el dilucidet cun bels plaids l' importanza del matrimoni e faget er attents ses auditurs sün l' instabilitad della fortuna in quest mund, co las plascheivlezas della vita suvent bandunan il human, che el dunque er in dis d' allegrezza dovei moderar sias aspectaziuns, aciò che la realitat della vita non il catti non preparau al combatt.

L' intèra festivitat in baselgia haveva durada circa ün' ura e mezza, et ussa la nozza se mettet in via vers Sanagn. Er il signur plevan da Mon, tgi era er invitau a nozzas, prendet part de quest tir a Sanagn, inua quel arrivet in bun urden allas ündesch. Essend il past prest pinau, donna Gnagna comenzet a plazzar ils hospes; ma fin che quels se mettettan a meisa, nus volein far üna visita alla cuschina. In quella ardevan dus fôcs e se recattavan bleras padellas sün et inturn la platta; totas fûmavan sco carbuneras e fagevan ün calüra in cuschina sco nel infiern. Davos la casa se recattava üna bella caldèra implenida cun da totas sorts carns. Gnagna faget allura inspecziun in cuschina et ordinet, co las tratgas hagien dad esser servidas. Ussa füttan ils hospes plazzai a tavla; alla tavla principala ün haveva postau il signur plevan; da vart dretga de quel prendettan il spus e la spusa

plaz e visavi a quels sesevan ils geniturs; allura vegnittan parents e fradegliuns, amitgs e conoschents tenor usit della contrada. In aspectamein comparet amò ün nov hosp, il qual negün haveva aspectau per quel di, nempe — l' Albert Caleira, il figl della casa. El haveva obteniu da signur Vertugli il permess da repatriar per qualche dis per saver prender part dellas nozzas de siu car frar. Causa üna ferma burasca sün il lac de Lecco el se haveva interdau per ün mez di e non haveva podiu arriviar a temps a Mon, cumbein che el era passau per Salogf e Deal per aunc poder arriviar alla copulaziun. Albert füt beneventau da tot la familia e dals hosphs presents cun granda curtesia e stovet subit se metter a meisa spesia giuvna quinada Adelina tgi haveva üna particolaral allegrezza che siu quinau era vegniu aschi da lonsch per se participar dell' intèra festa della familia.

Il past prendet uss siu principi, et ils hosphs fagevan tota honur allas plattas servidas. Nus non volein descriver tot las tratgas che comparettan sün la meisa, cumbein che l' intèr gentar era fitg solid e sedistingueva favureivlamein da blers convivis del temps modern, ils quals fan plü parada cun custeivla vaschella che cun quei che quella conten. A totas quatter meisas regeva üna plascheivla hilaritat, libera da tota indecenta canèra e sfrenatezza. Il padrin de Tgetg portet plü tard ün bel toast alla nozza, nel qual el ingraziet al spus et alla spusa in nom de tots hosphs per la curtesia che ils novs conjugals hagien hagiü d' invitar tot ils presents ad üna aschi plascheivla festivitat. Tot ils nozzadurs intonettan frescamein al vivat che il padrin haveva propost e portau. Zieva üna curta urella s' elevet il signur plevan e tenet ün piçen discurs. El comenzet: „Mes buns hosphs de nozzas! Nus havein oz celebrau ün fitg important di. Nos bun Tgetg se ha oz alligiau per sia vita intèra cun sia fitg estimada e honorada spusa Adelina Gometti. Il pass nel matrimoni eis adüna ün moment de granda importanza nella vita del human. Tenor la lescha divina il dat nel matrimoni negüna separaziun, negün divorzi. Ils conjugals sun obligai da se tener inseme in dis d' allegrezza et in dis da tristezza e disfortuna. Ils dis da combatt non restan mai spargnai als matrimonis. In blers de medems aulza zieva paucs anns la miseria sia testa e müda ils dis d' allegrezza in dis da cordöli. In auters matrimonis ils figls e las figlias non grategian, u per negligenza dels geniturs u tras l' influenza de nauschas compagnias, dellas qualas ün non sa

adüna pertgürar la giuentüna. Disgrazias de malattias, perdita nella substanza pon fitg suvent amaregiar la vita dels conjugals. In summa ils dis del matrimoni passan da rar in allegrezza sco il di dellas nozzas; perquei il tocca da passar cun ögls averts in quest important stadi. Ils plü fortunai seran nel matrimoni quels conjugals, ils quals fan adüna lur dover, se regordan adüna de quei che els han impromess al spiritual al altar e vivan tenor la lescha divina. Nos Tgetg e sia honorada spusa sun tots dus educai aschia, che els conoschan lur obligs vers Deus, vers auters humans sco er lur dovers matrimonials e nus podein sperar, che els mai imblidien quels, anzi che els semper dettien curascha l'ün al auter da tener lur promissiuns. Els non imblideran mai che la vera fortuna e felicitad non eis da cattar auter che in Deus, et a Deus nus volein raccomandar nos Tgetg e sia spusa!"

Zieva quest discurs del plevan la societat de nozzas faget üna pausa. Il podèva esser circa las treis; la giuentüna, mats e mattas, tgi eran a nozzas, se divertittan uss ün' urella cun göcs e tramagls; ün jet aschizun in clavau e provet da ballar ün pau sün l' iral al rhithmus dellas melodias d' üna schamforgna. Ils hospes plü vegls sesevan a meisa e discurrevan dal temps passau e dallas novitads della terra. Albert se profitet de questa pausa per discurrer cun ses geniturs e fradegliuns, cun ils quals el durant il past haveva saviu çiançiar be pauc, stante che el seseva sper sia quinada Adelina e la haveva da racquintar bleras novitads da Bergamo. Discurrente italiano cun quella, el la haveva alla tavla saviu confidar diversas novitads, senza che quels tgi sesevan da vicin, havessen intelligiu il contegn de lur discurs. Ma Adelina fageva ögls gross, audind da quellas caussas da siu quinau. Il se tractava da nagut meins che dad üna seconda maridaglia, nempe d' ün matrimoni del Albert Caleira cun la signurina Catharina Vertugli, figlia del signur Vertugli, soci del Tgetg. Albert credeva da haver descuverta a sia quinada Adelina üna caussa absolutamein nova; ma Adelina confesset ad Albert, che Catharina la hagi già avant blers meins confidau, che ella ami l' Albert e che ella spera che quel non sei insensibel per ses sentiments d' amur. Vezend Albert che sia giuvna quinada conoscheva già la part essenziala de quella historia, el la racquinet tot e specialmein er che el questa gada sei vegniu a casa per demandar da ses cars geniturs il permess da poder spusar la Catharina. Signur Vertugli sei content da dar gli sia

figlia e dad er pisserar per siu avegnir a sia compleina contentezza. Adelina approbet quei che Albert voleva far, sincerand che la Catharina Vertugli sei in ogni cas üna giuvna sco ün da rar üna tala catti. Ella sei prudenta, diligenta, adestra e scorta et er sur tot religiusa e dad üna morala exemplarica. Albert s' allegret dels plaids de sia quinada, sperand che quella sustegni sia supplica als geniturs, sche quels non fussen propens da dar gli il permess da spusar sia amanta.

Albert jet uss durant quella pausa in casa a cercar la mamma; el la cattet in cuschina, inua ella preparava cun agüt dellas cuschinunzas las ultimas tratgas. Havend uss regulau e preparau tot per la fin del past, ella jet cun Albert in stüva, inua mamma e figl eran bels solets. Albert rapportet totas novitads da Bergamo e da siu viadi. El haveva diversas gadas averta la bucca per coménzar ün nov discurs supra üna causa che pareva da squiçiar gli il cor. Tandem el pigliet curascha e racquinet alla mamma dal torment de siu cor e dals plans che el haveva fatgs da spusar la Catharina Vertugli e supplichet allura la mamma per siu consentiment e per l' intercessiun pro il bab a sia favur. La mamma gli replichet, quella caussa dependi il plü da Tgetg e sia consorta Adelina; quels conoschien la familia Vertugli e sias relaziuns, sco er las qualitads della giuvna tgi el vögli spusar. Sche Tgetg et Adelina sappien raccomandar quest matrimoni, sche seien ella et il bab cert contents da dar lur consentiment per quest matrimoni. Albert era contentissim cun questa resposta et imbraçet cur impetuositat sia cara mamma tgi haveva discurs cun tanta raschun e giudici.

Dintant las cuschinunzas e la matta de cuschina havevan da novamein pinadas las meisas cun novas delicatezzas, cun gramma, veschlas, uaçs e suaçias de totas qualitads, et ellas clamettan ussa naprò ils hosps tgi se divertivan per part nel clavau, per part nell' umbriva davos la casa. Tot ils hosps s' approximettan da novamein allas meisas et occupettan lur plazzas d' avant. Amò ün' ura circa duret l' alleger convivi, allura ils hosps bandunettan in diversas gruppas Sanagn, ils üns per ir a Stierva, ils auters per se render a Mon et a Dèal. Tgetg et Albert accompagnettan amò il signur Morin e sia familia fin a Casti e returnettan pauc avant la notg a Sanagn. Essend uss tot ils nozzadurs absents, la familia Caleira se mettet alla meisa in stüva per amò discurrer in familia. Scodün saveva racquintar inzatgei della festa familiara dad oz. Ma Albert stovet uss er amò rapportar

da Bergamo e da siu viadi a Sanagn. Pür tard la sera intret questa sera il ruaus nocturn nella casa da Sanagn, et ils geniturs, Peder e Gnagna, non cattettan amò il ruaus, havend Gnagna uss aunc da relatar a siu bun mariu la façenda del Albert. Peder faget ögls gross, audind che er siu figl Albert vögli prender donna; ma sia muglier Gnagna il savet da calmar, gli descrivend la buna partida che Albert doveva far. Peder se laschet persvader, che el dovei dar sii consentiment a quest nov matrimoni.

L'auter di Albert comparet sez avant ses geniturs et ils supplichet da voler approbar sia intenziun da maridar la signurina Catharina Vertugli, sincerand che quella sei in tots rapports üna giuvna da valer, il che er il frar Tgetg e la quinada Adelina stoppien attestar. Tgetg e sia giuvna muglier eran giust quest moment returnai dad üna passeggiada, et audind da tgei que se tracti, tot dus confirmettan la buna opiniu, la quala Albert haveva dalla giuvna, la quala el voleva spusar. Ils geniturs, audind quest laud general della giuvna, se declarettan contents cun quest matrimoni de lur second figl. Il temps, cur quest matrimoni doveva esser conclus, non füt amò precisau, stante che Albert declaret, che el in ogni cas stoppi far sias nozzas a Bergamo pervia della familia de sia spusa. Peder e Gnagna havessen preferiu che Albert fagess sias nozzas a casa, capittan però fitg bein, che lur car figl stoppi plü u meins prender riguard dalla familia Vertugli; perinconter impromettet Albert, da immediatamein zieva sias nozzas far üna visita a Sanagn, per che ses buns geniturs imprendien er da conoscher sia muglier. Aschia Albert haveva uss acquistau da ses cars geniturs quei che el haveva giavüschau, et el declaret, che el gia in treis dis stoppi returnar a Bergamo, stante che el sei là, in absenza del Tgetg, absolutamein necessari nel affar. Et in verdad, il terz di zieva las nozzas del Tgetg, Albert partit per Bergamo, accompagnau dals buns auguris dels buns geniturs e fradegliuns. Tgetg e sia muglier però, alla quala la cordiala simplicitad del sör e della söra e dels fradegliuns del Tgetg plascheva aschi bein, concludettan da restar amò dus meins a Sanagn. Cur arrivet il temps da fenar Tgetg mava a segar cun siu bab Peder, sco sche els füss ün famegl della casa; er Adelina improvava da se far utila a Sanagn. Ella mava cun sias duas quinadas giuvnas ad inserdar et a rastellar e se recattava fitg bein pro quest moviment. Tgetg fageva allura er passeggiadas cun sia giuvna muglier nellas muntagnas, e la buna aria alpina haveva dau

alla buna Adelina üna vera aria e çera d' üna muntagnarda, et ella se sentit bler plü ferma e plü robusta che ils anns antecedents.

Nella seconda metad del Avust Tgetg stovet totüna pensar a siu return a Bergamo. Il di della partenza arrivet. L' intéra familia da Sanagn era trista, e na meins tristas eran las duas persunas tgi dovevan partir. Adelina tgi haveva recattau a Sanagn buns e carins geniturs et ina nova patria, spandeva gia la sera avant la partenza grossas larmas da stover bandunar quest löc, inua ella era da novamein daventada l' amau member d' üna simpla, ma buna e fitg respectabla familia. Ella impromettet a sia buna söra da returnar ün' autra gada a Sanagn, aschi prest sco quei la seregi possibel. Nel moment del dolorus camgiau Adelina strenschet sia buna söra a siu sein e la remettet ün pachet cun la supplica da voler reçever dad ella quella piëna bagatella. Gnagna teneva amò brancada sia cara nura e mirava in sia façia cun ün' ögliada aschi carina et amureivla, che Adelina be cun il plü grand sforz podet far üna fin a questa scena. Tandem Gnagna schet: „Deus vol in quest moment nossa separaziun; ma nus volein haver speranza, che El nus detti ün bel revèr! Mei uss dunque, mes cars infants! Deus vus protegi in terras estreras e vus detti la forza da poder viver adiüna in sia grazia.“

Tgetg et Adelina se mettettan uss in via, accompagnai dal frar de Tgetg, il qual haveva da portar ün pachet dels dus viagiatur. A Casti el haveva gia il di avant impostau dus cavalls, cun ils quals el voleva viagiar fin in Bregaglia. Siu viadi era stau fitg agreabel; be passand la bova da Plurs, ils dus viagiatur sentittan immensas dolurs, cur els vezettan la terribla fossa che teneva sepellida l' intéra familia Gometti. Arrivai a Bergamo, Tgetg restet sco avant siu matrimoni activ nel affar sco soci del signur Vertugli. L' affar flurit semper da plü e fageva grandissimas façendas, da maniera che la substanza de Tgetg s' ingrandit dad ün ann al auter. Zieva ün mez ann Albert faget nozzas cun la signurina Catharina Vertugli. Il sör gli mettet a disposiziun üna dota da 50 milli renschs, cun ils quals el saveva operar a siu plascher. Essend Albert üna testa speculativa, el penset da fondar inzanua ün propri affar. Stovend far in curt temps ün viadi per l' affar da Bergamo, el vegnit sün quest viadi er a Verona, inua el cattet occasiun d' eriger ün propri affar. La proxima primavèra el se voleva collocar a Verona e comenzar siu nov negozi. Ma amò avant che intraprender l' affar, el voleva far üna visita a Sanagn cun sia giuvna muglier. Que era vers

la fin d' Avril, cur el üna sera inaspectadamein arrivet a Sanagn cun sia Catharina. La familia Caleira reçevet er quels dus infants cun allegrezza, et Albert e sia muglier passentettan quindesch fitg agreabels dis nella familia dels geniturs. Gnagna haveva ün dun particular da subit conoscher la valur dellas persunas, cun las qualas ella haveva occasiun da se conversar. Ella accorschet subit che sia nova nura era üna donna da granda pietad e dad ün excellent character e s' allegret de quei. Ils dis de questa visita passettan fitg agreablacein ad Albert et a sia muglier e pür memia prest els stovettan pensar a lur partenza da Sanagn. Ils partents impromettettan da returnar ün' autra gada a Sanagn, aschi prest sco quei als sei possibel.

Il pachet che Adelina, la donna de Tgetg, haveva remess a sia söra Gnagna il di de sia partenza, haveva contenui 500 renschs in pezzas d' aur. Quei era ün regal che Adelina voleva far a sia buna söra, per la quala ella haveva pigliada üna profunda affecziun et amur. Ils custs che la familia haveva hagii cun Tgetg e sia muglier durant il temps de lur visita a Sanagn, Tgetg haveva bonificai per plü che per il dubel. Gnagna faget ün pau scrupel da salvar questa bella summa; ma tandem la vegnit üna buna idea. Ella proponet a siu hum Peder da reparar la habitaziun nell' alzada sura de lur casa, aciò che Tgetg e sia Adelina hagien ün' autra gada, cur els vegnien in visita a Sanagn, plü granda commoditätad et ün plü agreabel allogiament. Peder era content da far quei, capind fitg bein che üna reparaziun del edifici sei er avantagius per la familia. Quest plan füt allura er exsequiu durant l' inviern et al principi della proxima primavèra. Els havevan ingrandida la habitaziun sura per duas stanzettas et imbellidas las stanzas vedras. Cun ils rest della moneida regalada d' Adelina Peder havet occasiun da comprar ün bel funds nella vicinanza de sia possessiun da Sanagn. Peder passava ussa per ün dels plü richs contadins da Mon e Stierva et ün respectava la familia da Sanagn in totas duas vischnauncas. Ma specialmein la familia da Sanagn era postut respectada et amada dals paupers, ils quals cattavan adüna succurs et agüt pro la buna donna Gnagna. Questa beneficenza portet er fortuna in casa; Peder Caleira era semper fortunau cun siu muvel, haveva ann per ann üna excellenta rendita del muvel e de sia campagna et ingrandit aschia ogni ann sia facultad. Ma cun la sanadad del Peder Caleira il non stava il meglier. Las bleras e stentusas lavurs che el haveva da far durant quels blers anns de sia propria öconomia, il havevan

tandem spossau da tala maniera, che el a peina podesse plü lavurar siu grand e bel funds. Per quest motiv el stovet far veginir a casa siu figl tgi serviva a signur Morin a Lansch. Cun agüt de ses dus figls giuvens e de sias duas figlias plü giuvnas tgi eran adüna restadas a casa, il gli reussit da manar inavant sia öconomia senza agüt de forzas esteras.

* * *

Treis anns eran gia passai da plü che Tgetg et Albert havevan bandunada l' ultima gada la casa paterna et els non havevan amò mai saviu visitar lur buns geniturs a Sanagn. Albert se haveva stabiliu a Verona e l' erècziun de siu nov affar gli haveva portadas bleras stentas e blers pissers. El füt susteniu generusamein da siu frar Tgetg, il qual gli haveva imprestada üna bella summa per che el possi cun forza metter in moviment siu affar. Il prim ann Albert non fuva segür del tot che sia intrapresa reussischi; ma cun il second ann sia façenda prendet ün fitg contenteivel andament, da maniera che el haveva ils megliers aspects da far bunissimas façendas nel futur. Üna caussa gli mancava, nempe ils servients et impiegai dels quals el in totas occurrentzas se havess podiu fidar. El haveva nempe fatgas tristas experienzas cun dus giuvens italians, ils quals el haveva impiegau in siu affar. Quels eran stai infidels e gli havevan occasiunau ün considereivel dann; perquei el pensava da far veginir siu frar Paul a Verona et amò ün giuven parent da Mon, il qual el conoscheva per ün giuven talentus e giudicius. El correspondet da quella caussa cun siu frar Tgetg a Bergamo, e quel approbet siu plan e s'offerit da stimular ils geniturs a Sanagn, che els laschien veginir il frar Paul a Verona. Quella caussa però era ün pau difficultusa, stante che ils geniturs havevan fitg de bisögn del Paul a casa. Ma inaspectadamein quella caussa se müdet per da bler. La sora Mengia tgi fin ussa era stada a Lansch pro la familia Morin, era l' ultim autun returnada a casa a Sanagn, essend intenzionada da maridar. Siu spus era ün prudent giuven da Lansch cun nom Giusep Tragn. A quels il giuven Tragn non plascheva mal, stante che el godeva üna buna reputaziun et era, sche na rich, sche totüna possent. Il giuven doveva ils proxims dis se presentar a Sanagn per demandar dals geniturs il maun della Mengia.

La sera, cur ils infants eran gia a letg, Peder e Gnagna tenettan consegl tgei sei da far in quella caussa. Non cattand Peder ün cantun per metter in urden quella façenda, Gnagna schet: „Teidla, miu bun Peder, quala eis mia opiniun. Nus savein dar nossa

Mengia al Giusep Tragn; el eis ün giuven da valer. Nus savessen allura forsa remetter nossa intèra öconomia al Tragn sut favoreivlas condiziuns, e nus savessen viver dalla discreta entrada che noss beins nus portassen. Noss figls, Tgetg et Albert, s'offerittan da nus mantener bein a lur spesas, senza che nus stoppien lavurar sco galeots. Jeu sun persvasa che noss dus buns figls non han fatga üna tala offerta be per se far de grands. Nos Paul sa allura ir a Verona pro l' Albert e forsa che er nos figl il plü giuven catta pro l' Albert u pro il Tgetg ün impiego. Tü et jeu e nossas duas figlias giuvnas havein larg avunda in nossa habitaziun sura, e lavur serà bein er da procurar a nossas figlias. Et ussa tgei dis tü, miu car Peder, da quest plan?"

Peder, adüsau d' adüna metter sia confidanza nel agir de sia buna donna, se musset fitg content cun quest plan et impromettet da discurrer in quest senn cun siu schender ventur. Vegrind quel la proxima domengia a Sanagn in visita, el demandet dals geniturs la Mengia per sia spusa e Peder gli declareret, che el e sia donna Gnagna seien contents da dar gli lur figlia. El faget allura er menziun, che el e la donna fussen disposts da gli remetter lur intèra possessiun a Sanagn sut fitg acceptablas condiziuns. Tragn se musset subit prompt da far ün contract sur quella caussa. Gia quel di els füttan perüna davart las principales condiziuns. Dus dis plü tard Tragn returnet a Sanagn per far perfect quest contract. Els fagettan üna taxaziun de tot il muvel e dels auters animals casans, e Tragn s' obliget da remetter, cur il contract dovess esser dissolt, a siu sör animals per il medem importo. Peder se contentet cun la terza part della rendita del funds. In summa Peder e Tragn se havevan convegnii aschia, che tots dus eran e savevan esser contents de lur convenziun. Ün meins plü tard fagettan Tragn e Mengia nozzas e Peder remettet subit a siu schender sia intèra öconomia. Paucas emdas plü tard Paul partit per Italia per ir a Verona pro l' Albert.

La primavèra, la quala quest ann era stada bellissima, mava già conter sia fin; ma ella haveva portau tristezza alla familia da Sanagn. Peder daventet conter la fin del Matg seriusamein infirm. Gnagna haveva subit fatg scriver de quella caussa a ses figls in Italia, e Tgetg, recevend questa charta dalla mamma, se decidet subit dad ir in visita a Sanagn. Communicand Tgetg sia intenziun a sia cara muglier, quella il roget e supplichet, che el la dovei er prender cun se insemlamein cun lur bambin. Tgetg se strementava bein da far ün aschi long viadi cun ün infant d' üna

etad aschi tenera; ma el non podet resister alla supplica de sia buna muglier. La granda part del viadi els savettan far per carr e per barca, e daven da Clavenna el prendet dus cavalls et els arrivettan allura cun stenta a Bivio. Il quart di Tgetg arrivet allura a Sanagn paucas uras avant che il bab Peder morit. L' intèra familia era in granda tristezza; postut inconsolabla era la buna donna Gnagna, la quala haveva vivida tants anns in üna exemplara harmonia e concordia cun siu pacific hum. Tgetg e sia muglier habitavan durant ils dis de lur visita a Casti, non volend occasionar incommoditat a Sanagn. Zieva la sepultura Tgetg discurret cun la mamma e la voleva animar da veginir cun el e sia muglier a Bergamo; ma Gnagna non voleva far quei, schend che ella non possi bandunar Sanagn, inua ella sei stada aschi fortunada cun siu hum. Vezend Tgetg che el non possi stimular sia cara mamma da bandunar del tot Sanagn, el la roget da veginir almeins in visita a Bergamo; el vögli spetgar a Casti, fin che seien passadas totas funeralias e las s. messas per il bab. Cun ditg rogar el obtenet tandem dalla mamma il plaid, che ella vögli veginir per ün curt temps a Bergamo. Tgetg e sia muglier Adelina havevan üna grandissima allegrezza che la mamma ils voleva accompagnar a Bergamo. Tgetg prendet tot las necessarias disposiziuns per far il viadi alla mamma aschi fácil sco possibel.

Lur viadi era bein stau ün pau stentus, ma per auter fitg agreabel. La buna Gnagna se miravigliet dellas bleras bellas caussas novas che ella vezet sün siu viadi, ma aunc bler da plü della pompa che ella cattet a Bergamo e nella habitaziun de siu car Tgetg. Durant il temps che ella restet a Bergamo, ella s' occupava il plü cun siu abiadi Peder. Tgetg haveva dau part als frars Albert e Paul, che la mamma se recatti pro el in visita. Paues dis plü tard Albert comparet inaspectadamein a Bergamo cun l' intenziun da prender la mamma, almeins per intgüns dis, cun se a Verona, aciò che ella imprendi er da conoscher sia familia. Havend fatga questa visita a Verona per contentar l' Albert, ella returnet a Bergamo e füt allura accompagnada a casa, fin a Sanagn, da Tgetg. Ils figls havevan impromess alla mamma da suuent far visitas durant l' estad alla mamma et els stettan er da plaid. Quasi ogni ann veginiva ün u l' auter dels frars cun lur mugliers et er cun infants a Sanagn, e Gnagna havet, sco ella haveva meritau, üna bella sera de sia vita.

